

Math. P.

631

Fiche



C.

~~D~~

S. VI.

131.

8^o

Math. P. 631

Ficke

Mathesis. Geometria generalis

251.

R

Johannis Wallisii, S.T.D.

Geometriæ Professoris SAVILLIANI,

In Celeberrima Academia

OXONIENSI,

ELENCHUS GEOMETRIÆ HOBBIANÆ.

Sive,

GEOMETRICORUM, quæ in ipsius *Ele-*

mentis Philosophia, à THOMAS HOBBS

Malmesburienſi proferuntur,

REFUTATIO.



OXONIÆ,

Excudebat H. HALL. Impensis JOHANNIS CROOK,

apud quem proſtant LONDINI ſub inſigni

Navis in Cœmiterio Paulino, 1655.

Johann W. v. D.

Geometrische Proportionen

In Geometrica Academia

OXONIA

ELIYCHUS GEOMET


TRIA HORROR

1712

GEOMETRICORUM

in ipso

1712



OXONIA

Excelsior H. Hall-Imperialis Johannis Georgii

et alii per ipsum Johannis Georgii

1712

Insignissimo Viro

IOHANNI OVVENO SS. Th.D.

Ædis Christi apud Oxonienses Decano,

Academiæ Vice-cancellario:

**JOHANNES WALLIS Geom. Prof. Savilianus
D. D.**



Uæ duo solent (Insignissime Vir) in hujusmodi Epistolis (Dedicatoriis) utramque implere paginam; Eorum scilicet quibus inscribuntur prædicatio, & imploratio patrocinii; Ea mihi prætereunda potius videntur utraque. Illud enim quamvis prolixè dicturo materiam suppeditaret satis amplam; cum tamē tu aliunde notior es quam meā tui prædicatione fieri possis, quorsum ego, Quis & Quantus es, dicendo, candle- lam Soli accenderem? Hoc autem quod at- tinet; utut patrocinio persona indigeat vel ma- ximè, ea tamen operis est natura, ut vel non indigeat, vel, si indigeat, frustra petat. Quippe in re Geometricā si desint argumenti vires, frustra quis illud autoritate vel suā vel patroc- ni supplendū putet. His igitur omissis, suscepti potius operis rationem, paucis exponendam duxi; quod, ut muneris mei ratio faciendum postulat, ita Tui poscit ut tibi offeratur. Quanc- to ille se fastu effert & fastidio, quicum agitur,



qui ipsius scripta vel leviter inspexerit, nemini dubium esse potest. Quantâ item *ἐπερηφανεία*, & pro imperio satis, humana pariter & divina conculcans omnia, tremenda plane & horrida, de Deo, de Peccato, de Scriptura sacra, de Substantiis incorporeis universim omnibus, de hominis Anima immortalis, cæterisque gravioribus Religionis apicibus, (quorû ego è multis pauca sub finem cap. 18. & cap. 20. aliquoties, & tandem sub finem operis, obiter attingo,) dolendum magis est quam dubitandum. Cùm autem illum, *Leviathanis* instar (quod sibi nomen fecit) aut *Goliath* incircumcisi, tanto incedentem fastu intuebar, omnino occurrendum judicabam, ut videat nec impunè sibi quidlibet licere, nec omnino esse cur supra communem hominum sortem se superbus efferat. Cur autem, omissis Theologicis, aliisque Philosophicis, Geometrica sua susceperim refutanda, cùm tamen aliàs periculosius multò erratum fuerit; Causa erat non una. Illa etenim quod attinet, abunde suppetit virorum undique, qui, cùm illud optimè valeant, velint etiam, si id necesse videbitur, illius inibi petulantiam castigare: His autem cùm pauciores sint qui se exercent studiis, eò mihi magis visum est incumbere hoc quicquid est oneris in me suscipere, sed neque illud fortasse deinceps detrectare si et id futurum sit necesse. Quod non ita intellectum velim, quasi solus ego in Academia valeam id suscipere, complures enim sunt (quic-

quid ille in contrarium insinuat eum eat) qui ipso longè rectius norint *μαμαρτεῖν*, ejusque *ἀντιμαρτεῖν* detegere. Quod enim ille persuadere satagit, vel non exstare Mathematicos, vel saltem non in Academia, mera est calumnia; quamvis enim paucos habeamus sui similes, meliores tamen multos. Verum quidem est, hunc nostrum Philosophiæ instauratorem de ipsius in Mathematicis peritiâ opinionem concepisse quam maximam, aliosque omnes sive Philosophos sive Mathematicos (quasi solus ipse hæc intelligat) è longinquo despicere; idque adeo ut si quos ipsi in Theologicis aut Philolophicis contravenientes videat, aut dictata sua minùs admissuros, supercilioso hoc putet responso amandandos, quòd, cùm Geometriæ sit imperiti, hæc sua non intelligant: Cum interim ipse eousque sit harum rerum ignarus, ut quæcunque id genus de suo protulerit, puerilia planè sint & nugæ meræ, quæq; risum magis mereantur quam refutationē. Hæc ego igitur ocyus castiganda judicavi, non quidem quòd Geometriæ prospiciendum putaverim nequid hinc illa detrimenti capiat (quippe quæ disciplina omnium minime à paralogismis metuit) sed ut punctâ hac vesiculâ, ventrosus ille quo inflata fuerat vapor exeat, sciantq; alii, utut rerum Geometricarum minùs periti, ab hoc Leviathane non eo nomine magis metuendum, cum ipsius squamæ (quibus confidebat maxi-

mè) sint facile penetrabiles : partim etiam ne
exteri (si illum hæc impune tulisse viderint)
Geometras existiment sive Anglos sive Oxoni-
enses hujus esse similes. Libri igitur mense Ju-
nio editi, refutationē sequentibus Julio & Au-
gusto (nempe post peracta Comitiorum solene-
nia mense Julio celebrata) ut per alia negotia li-
cuit, absolvebā : quidquid enim deinceps huc-
usq ; est temporis Typographi moris dandum
est. Stylum autem quod attinet, est quidē ille,
quā pro more meo, aliquantō acrior : sed quē
rei necessitas invito extorsit. Didiceram enim
ex Prov. 26. 5. respondendum nonnunquā esse,
non tam pro more nostro, quam prout eorum
mores postulant qui sunt redarguendi. Atque
huic quidem mitiūs respondere perinde esset
atq; urticā molliūs tractare. At interim vix uf-
piā acrius agitur quam ubi suis ipsi verbis re-
spondetur : quibus si quos inesse sentiat acule-
os, eosdem esse sciat quos ipse aliis nil tale me-
ritis intentos strinxerat : suisq ; se pungi telis,
non est cur ægrè ferat. Diximus autem, illum
refutando, non quæ dici possent omnia, sed
quantum sufficiat : ita tamen ut sicui vacaverit
alii, errata ipsius reliqua, Theologica & Philo-
sophica, eādē evidentiā refellere quā nos ip-
sius Geometrica refutavimus, non multum su-
per futurū autumo de quo in posterū gloriatur.

Dabam è Typographéo

Oxonienſi, Octob. 10. 1655.








Cap. VII






Cap. VII



Cap. XVI.







Cap. XVII




Cap. XVIII.

fig. 1. 2.








$i \equiv q$
 m


0

1


00



Cap. XX.



Copy





IOHANNIS WALLISII SS. Th.D.

Geom: Prof: Saviliani.

ELENCHVS GEOMETRIÆ

H O B B I A N Æ.



Irabere forsan (Erudite vir) cur ego tibi, neque beneficio, neque injuriâ notus, tam properè ad tua Geometrica responsum edam. Dicam quod res est. Ingens illa quam de te tuisque opinionem soleas concipere, fecit ut curiosius inquiram quid vir tanti nominis, novi ferat. Audiveram siquidem, quod jam erat in ore omni populo, quam magna de te sentias, quam aliorum ferè omnium, live veterum, live recentiorum scripta habeas contemptui; quasi præ te cœcuriant omnes, nil quicquam præter phantasma aut spectrum, & inanem eruditionis umbram habentes, à te tandem vera cognitionis principia expectaturi, quasi tecum eruditio nata esset, & tecum solo habitet sapientia; atque ante te natum nusquam fuerit. (Et quidem, ne longius abeam, id ipsum loquitur epistola ista tua, satis fastuosa, quam huic libello præfixam habes; ubi non modo Philosophiam, sed & Religionem omnem te antiquiorem luce tuâ dissipatum iri spem facis.) Audiveram quam fueras speciatim in Geometriâ, magna pollicitus, circuli putà quadraturam, angulique in data ratione sectionem, aliâque nescio quæ mira præ quibus hæc sordeant. Neque domi tantum sed & foris hæc facta est expectatio; Nam & à partibus transmarinis illud accepi Ego igitur,
 B omissis

omissis reliquis ad Geometrica illa tua me statim cōtuli, avidus ea videndi quæ Mathematici per omnia elapsa secula frustra quaesierunt, & te tandem invenisse spem faceres. Atque hoc eò feci potius partim quod illius quo fungor muneris ratio videatur illud postulare: partim etiam quod in eodem pulvere (nec irritò planè labore) versatus ipse fuerim; & quidem rem illam eò saltem perduxerim ut jam quarto abhinc anno propositionem illā Cyclometricam quam nuper divulgavi, invenerim, (cujus rei testes habeo quamplurimos egregios viros & Mathematicos, tam in Angliā nostrā, quam etiam alibi terrarum, quibuscum tunc temporis rem illam communicaveram;) Et quidem ne me à te putaveris ansam accepisse, prodit illa typis Oxoniensibus impressa, jam tertio antè mense quam tua prodierint. Nempe sub Solstitio Æstivo, aut paucis post diebus, prodire tua: nostra autem illa propositio Cyclometrica sub Æquinoctio Verno, ipsoque Paschatis festo: eo nempe tempore quo illa quæ tu de Circuli mensurā jam habes, neque edita erant, neque impressa, & credo quidem, ne excogitata. Habueras, non nego, etiam ante tempus illud, molam quandam malè conceptam: quam, ut intelligo, tunc typis commiseras, &, ni fallor, operæ jam tum absolverant: sed cujus sub eo tempore abortum fecisti. Nempe non ita multò post quam ego propositionem meam divulgaveram, pseudotetragonismum tuum cum amicis communicasti, quem ubi ab illis intellexeras nil sani continere, *Empusa ista tua, (ut tecum loquar) non pugnando, sed diem inferendo exterrita est, atq; abacta penitus.* Adeoque deinceps deletò toto capite vicesimo (de Circuli dimensione) prout tunc erat, & laceratis iis quæ tunc impressa erant, novum ipsius loco substituiisti. (uti liquet ex laceris chartis octernionis M. ipsoque principio capituli 20, ut nunc se habet.) Sed neque hic superfœtatio meliùs cessit quam prior illa mola. Nam ubi post secundas curas lacerato octernione M, & abjecto planè octernione N, eorū loco alios substitueras, tandem etiam quem substitueras octernionem N, secundò laceras; (nam quæ jam habentur laceræ paginæ in isto octernione, illæ sunt quas secundæ curæ adjecerunt, non quæ primitus impressæ erant, uti ex ipsis inspectis patet:) & tertiis saltem curis, jam tandem habemus, infantem utcunque editum; verum & illum reliquis non multò felici rem, sed ab ipso patre protinus strangulatum, ut liquet ex ultimis istius capituli verbis. Nempe postquam & domi & foris, hic (inquam) & alibi terrarum, professus eras te præter Circuli quadraturam (ut quod exiguum quid apud te foret) etiam alia nescio quæ mira præstitisse; post primas, secundas, &

& saltem tertias curas, primò, secundò, tertio impressas, disertè tandem fateris te neutiquam præstitisse quod pollicitus eras: Atq; ea tandem *tanquam problematicè dicta* accipienda petis, quæ tu satis magisterialiter & quasi apodicticè pronunciaveris, & unde ingentes tibi nescio quas deberi laudes (ut tuo de *Vindice* verbo utar) *stultè* somniaveris. Quin redeamus eò unde digressi sumus. Quum librum tuum jam tandem prodiisse audiveram, bibliopolam statim aggressus illum quæsi. Dum ego autem volumen aliquod magnum exspectavi, (audivi enim jam per aliquot annos sub prælo fuisse,) porrexit ille *μεγα βιβλίον*. At inquis, est quidem *libellus mole exiguus, plenus tamen*, (ineptiarum credo,) & *siquidem valeret pro magno rectum, satis magnus*. Imò verò, nisi fuisset magis rectus, est nimis magnus. Ego statim cum nactus eram laxa folia evolvere (libros enim compactos bibliopola nondum habuit) & video hinc inde folia lacera, quæ mutati aliquoties animi erant indicia. Quærebam autem caput vicesimum, (ubi capitum lemmata libro præmissa, indicabant ea quæ Circuli dimensionem spectant quærenda esse,) ut viderem num eadem nobiscum de circulo sentias, vel nostris habeas meliora. At ubi huc perveneram, inveni statim spes meas cassas esse, & post inpressas, suppressas, repressas, & aliquoties immutatas nescio quot paginas, id unum invenio sub capitis calcem superesse, ut *delegantur omnia*: (& reverà, modò liberè loqui liceat, optandum esset ut eandem medelam & præcedentibus & subsequentibus plerisque capitibus applicuissess quibus una litura, modo ea sit satis magna, plus valitura esset ad sanitatem quam emendationes mille.) Postquam verò spes meas ita deceptas deprehendi, non tamen protinus abjeci librum, sed ad reliqua etiam placuit oculum convertere. Fieri enim posse putabam, ut post illam capitis diminutionem reliqua sana fuerint. At ô spes fallaces! quanta de spe decidi? reliqua etiam ejusdem farraginis deprehendo: eadem leprâ, eadem pruriginè, conspersa. Vin' scire qui me ad hæc affectus occupârunt? Dicam igitur, modo velis. Nempe irasci primò (indignum siquidem ratus viro Mathematico ut sic ineptiat, vel ut, qui sic ineptiat, Mathematicus interim haberi velit.) mox ridere, & tandem planè tui cœpi miserescere, qui tam meritò te omnibus exponas ludibrio. Notabam autem inter legendum aliqua quæ legenti obvenerunt, non tamen eo primum animo ut publici juris facerem, sed ut sphalmata quæ non speraveram multa fore: quis enim illud à tanto, quantus tu haberi velles, viro id exspectaret! quanquam etiam viris doctis nonnunquam

contingere possint leviores lapsus. Cum verò erratorum molem iam crescentem viderim spissaque adeoque nubila ut excludant diem, & metus sit ne penitus obruamur; (vix enim uspiam quicquam constat sani: ego planè, ut tuis iterum verbis utar, *contra hanc Empusam*, hos lemures tuos, *Exorcismum credidi meliorem excogitari non posse, quam illos non pugnando, sed diem inferendo exterrere atque abigere*. nempe nocturni lemures non ferunt diem. Nolim tamen expectes ut ego μέγα tuum βιβλίον evolvam totum tuæque Philosophiæ fundamenta omnia radicitus evel- lam; (utut erunt fortasse qui illud volent;) neque enim opus erit. Sufficit ex ungue Leonem, vel, si mavis, ex squamis Leviathanè dignoscere aut etiam (ut loquuntur) ex pede Herculem, nisi tu malis ut *Empusam* dicam. Erat enim & *Empusa tua*, Dæmorium illud Atheniense, ex pede dignoscenda, quippe erat (uti ais) *pedibus altero Æneo, altero Afinino*, (& utro horum tu dignosci malis, penes te sit optio,) sed utut (uti videtur) duos pedes habuerit non tamen nisi uno incedebat, ut aliunde si opus sit discas (unde liquet ex eorum lemurum numero fuisse quos nos Anglicè dicimus *Hob.goblins*,) nempe ab ἔν & πῆς factum est nomen illud: unde & puerorum ludus ille, *Empusæ ludus* dictus (Anglicè *Fox, fox, come out of your hole*, hoc est, *heus vulpes de foveâ prodi*) nomen sortitur, quo puer ille qui *vulpes* audit, altero suspensio pede, altero subsultans incedit, (quod est Anglicè *to Hop*,) à reliquis flagellandus si utroque terram tetigerit. Sin quæras cur Geometriam tuam intactis reliquis castigandam susceperim. Non ideo hoc factum est quod reliqua rectiora putem, (qui enim in Geometricis, ubi ἀποδείξει locus, tam foedè cespitaverit, haud putandus est in reliquis, ubi conjecturâ non ratio agendum erit, tutius inces- sisse) sed quod hæc contigerit primò intueri, quæ cum viderim perinde esse credidi an reliqua perlegero necne: & quidem, (ut vera fateor,) ego dum hæc scribo reliqua ne legi quidem, fieri tamen potest ut deinceps aliquando, ubi ocio abunda vero, (ne nihil agam, legam & illa. Ne tamen de illis securus sis, dicam tibi & illa ad examen revocanda esse: scio enim qui est illud præstiturus; Nempe ille à quo tu laudari nolis. Quippe Academi- arum *Vindex*, quem tu, (quod obiter aliquando petulantiam tuam, & procaciores in Academias universim omnes, insultus *Leviathan* tuo insertos lepidè castigaverit,) indignis modis laceras, simulque ostendis quam sis irâ impotens atque impa- tiens veri, ut, (quicquid de reliquis criminibus sit,) te *Iracun- dum* esse in posterum nemo dubitaverit, *in q; moribus*, ut tuis

verbis

verbis utar, ut non multum metuas ne à cordatis viris nolens lauderis: Vindex inquam ille & vindicias suas & Philosophiam simul quantocyus vindicabit. Qui quidem & iis moribus est & illâ eruditione tam in Mathematicis quam in reliquâ literaturâ (quod & tibi ignotum esse non potest, nosti etenim virum,) ut tu illum contemptui habere non debeas, sed è longinquo potius suspicere ut qui teipsum multis parasangis superet. Sed Empusam hanc tandem tuam aggrediamur, ut videamus utro pede incedat, & utrum Hercules an Cacus ex pede judicandus sit hic Leviathan, qui tanto fastu aliorum omnium & Philosophiam & Religionem despiciatui habet. Ut si tandem Mathematicis compedibus te vinctum scias & pedicatum, ut ne hiscere quidem audeas aut habeas quo te vertas, eò æquiùs feras & patienti magis animo, ab aliis item vapulare: & discas in posterum vel rectiùs sapere vel modestiùs insanire.

IN CAP. 8.

Incipit ea pars libri tui, quam Geometriam appellas, à Cap. 15. Verum cum aliquoties me video ad anteriora remissum, necesse est ut ex illis nonnulla hinc inde sparsa colligam quæ ad sequentia viam faciant. Et quidem velitaribus armis primò utendum erit, definitiones & distributiones aliquot incommode positas, & locutiones incommodas castigando, (decretoriis autem deinceps, ubi de propositionum veritate & demonstrationum certitudine agetur.) Quamvis enim Mathematicis licere non negem definitiones suas, hoc est verborum aut phrasium explicationes, sive determinatas aut definitas significationes pro arbitrio ponere, quibus illæ phrasæ aut locutiones apud illos deinceps intelligendæ sint: cavendum tamen ne hæc suâ libertate abutantur. Cum enim verborum aut rerum notiones eadem apud eos cum aliis explicandæ occurrunt, illas ubi explicatum eunt curandum est iis locutionibus id faciant quæ tantundem significant: & deinceps limitatis illis aut definitis significationibus perpetuò insistant, ut neque latius neque strictiùs quam par est accipiantur. Quâ in re multoties te peccare qui animadverterit facile deprehendet. Sed & curandum est ut ejusmodi definitiones terminis quam fieri potest simplicissimis exponantur: non introductis quæ ad rem non faciunt hypothesis, aut quæ non nisi ex posteriori & fortassis etiam ex accidenti eò pertingunt. Nam, præterquam quod contra Logicæ leges id fieret, eò difficiliùs in sequentibus ejusmodi defini-

tiones in usum accommodantur, cum ea quæ in definitionibus continentur symptomata in secuturis demonstrationibus deinceps probanda erunt ubi definiti mentio facienda est. Quod quam accuratè tu observes, vel potius non observes, passim videre est. Distributiones autem quod attinet, non putandum est eas pro arbitrio ponendas esse, sed ita ordinandas ut totum distributum accuratè exhauriant: Quippe illæ non minus quam aliæ propositiones demonstrandæ sunt. Qui enim verbi gratia triangulum rectilineum in acutangulum & obtusangulum distribueret, nã ille malè distribuit, oporteret enim eum demonstrare non ullum esse posse triangulum rectilineum quod horum alterum non sit: quod tamen nunquam demonstraturus sit, cum triangulum rectangulum sit horum neutrum. Sed & hic etiam te vacillantem reperiemus. Instantias ego huiusmodi errationum nonnullas quasi in transitu ostendam. Quanquam enim hæc contra eam quam *Mathesis postulat* & *κρίεται* peccentur, tamen præ tuis aliis quæ sequuntur gravioribus levicula sunt.

Sic cap. 8. art. 12. *Si corporis (inquis) quod moveatur magnitudo (etsi semper aliqua sit) nulla consideretur, via per quam transit, Linea, sive dimensio una & simplex dicitur; spacium autem quod transit, Longitudo appellatur.* At quis unquam mathematicus huiusmodi vel Lineæ vel Longitudinis definitionem expectaret? Vera quidem sunt quæ hic affirmas; at definitiones non sunt. Imò quidem neque propositiones reciprocae. Quid motus notione opus est, aut corporis moti, ut quid sit Linea intelligatur? Annon lineæ corpori quiescenti insunt, non minus quam moto? quid igitur sit motus mentio? Annon duorum punctorum etiam quiescentium distantia erit Longitudo, non minus quam mensura transitus? quorsum igitur corporis moti mentio? Sed & dic mihi, Annon Longitudo, est dimensio una & simplex? dimensio certè est, duplex non est nedum multiplex. At dimensio una & simplex definitur idem esse atque Linea, (facis enim hæc Synonyma.) quidni igitur & Longitudo idem esset atque linea? certe vel Linea & Longitudo id ipsum sunt; vel saltem si differant, Dimensio simplex potius longitudinis notioni conveniret quam lineæ.

Sed pergis, *Ipsumq; corpus Punctum appellatur.* At verò quis unquam mortalium huiusmodi definitionem Puncti speraret, *Punctum est Corpus quod movetur, cuiusq; magnitudo, etsi semper aliqua sit, non consideratur?* 1^o. Quis unquam, ante te, definit

definivit punctum esse corpus? Quis unquam (sobrius) puncti (mathematici) ullam esse magnitudinem asseruit? Si corpus est, si magnum est, tum punctum puncto additum efficiet majus: nempe illud de corpore, credo, non negabis, ergo nec de Puncto, si modo punctum sit corpus. Si autem unius Puncti additione nihil accedat, ergo nec duorum, trium, centum, mille, aut etiam infinitorum. Nempe sic tu alicubi de impetu disputas, cur non id de magnitudine valeret? Dices forsan, ipsius magnitudo, utut aliqua sit, non tamen consideratur. Esto. At quæro num interim consideretur esse corpus? Si non, quorsum corporis mentio in definitione, vel saltem cur ipsa corporeitas non pariter excludatur, atque ipsa magnitudo? Cur non igitur sic definis, *Punctum est corpus quod non consideratur esse corpus, & magnum quod non consideratur esse magnum?* Deinde, siue consideretur ipsius magnitudo necne, si magnitudinem habeat, fieri non potest, quin quantitatem (homogeneam) augeat, siue quis illud advertat necne. At, inquis, *Terra Punctum dici solet, & via ejus annua Linea Ecliptica.* Bellè admodum! dicimus aliquando terram (respectu firmamenti) esse quidem instar puncti, & forsan ἀκρόως loquendo, punctum nonnunquam dici potest, aut etiam nihil. An verò tu hanc ἀκρολογίαν in definitionibus admittendam censes? vel etiam putan' tu Terram eo sensu punctum dici posse quo tu hic punctum definis, nempe quod ita se habeat ad magnitudinem atq; ciphra ad numerum? (nam & hoc etiam alicubi habes;) annon terra aliquoties multiplicata poterit tandem corpus etiam quam maximū æquare? quod tamen de ciphra respectu numeri non affirmabis. (vel saltē si tu affirmes, nemo affirmabit alius.) Vel deniq; , num tu hic definis Punctū per eum quem habet respectum ad grande aliquod corpus, an Punctum simpliciter? hoc certè faciendum erat, non illud. 20. Sed esto, sit corpus. At quare corpus motum? Annon corpus quiescens æquè punctum dici poterit atque corpus motum? Imò verò annon tu aliquoties in sequentibus *punctum quietis* memoras? Dic quæso; num *punctum quietis* est corpus quod movetur? an tu deliras qui sic definis? 30. Imo verò etiam dum movetur, est tamen motus ipsius planè accidentarius, nec ad ejus essentiam quicquam pertinet ut mirum sit motum in definitione aut puncti aut lineæ reperiri. Quod autem de Puncti & Lineæ definitionibus dictum est, pariter & de sequentibus *Superficie* nempe & *Solidi* definitionibus accommodari potest, quæ illis neutiquam sunt meliores.

Artic. 13. *Corpora æqualia* definis quæ eundem locum possidere possunt. Egregiè quidem! Sed cur non et *Hominem* pariter

ter definiveris qui possit esse princeps Transilvaniæ? nempe ovum ovo non est similis quam hæc definitiones inter se, nisi quod hæc illâ potior sit. 2. Pyramidem aliquam Cubo æqualem esse, hoc igitur apud te significat, quod Pyramis illa (non quidem in sensu composito, dum Pyramis est, sed) *præter flexione & transpositione* (prout tu te explicas) in aliam figuram transmutari potest, quæ tandem eundem locum occupare poterit quem nunc habet Cubus. At verò, etiam dum manet Pyramis, non minus est æqualis, (utut, non similis,) quam ubi transformatur; atque, dum alibi manet, æqualis est, (utut, non ibidem,) non minus quam ubi in eundem locum movetur. Quid igitur *motus*, & *locus*, & *transmutatio* ad *æqualitatem* spectant? Potest siquidem æqualitas esse ubi illorum nihil est: & quidem, ubi sunt eorum vel aliqua vel omnia, sunt tamen æqualitati omninò accidentaria. 3. Si loci mentionem facere voluisses, per eum quem habent, non per eum quem habere possunt locum, definire debuisses; ut enim eundem, ita non minus alium, habere possunt: quod autem potest vel esse, vel non esse, quomodo dicendum erit *essentiale*?

4. Dixisses igitur potius (si velles per locum definire,) æqualia ea esse corpora, (non, quæ eundem, sed) quæ *tandem loci occupant*, vel etiam quæ occupant *æquales locos*.

5. Quin discutiamus, si libet, illud *posse* tuum. Annon putas tu corpus aliquod grandius eundem locum implere, occupare, possidere, posse, quem implet corpus aliud exiguum? Annon, verbi gratiâ, orbis terrarum eum implere vel occupare locum potest quem implet ipsius aliqua particula? non negabis, credo; possidet enim & hunc & insuper majorem longè. An igitur dices totum terrarum orbem ipsius cuilibet particulæ æqualem esse? utpote cujus locum (utut non solum) occupare potest, & quidem actu occupat? (nempe illud vult tua definitio.) At, inquires, tu non hoc vis, sed &c. Esto. At verò tu hoc *dicis*. Quàm accuratè tu videris. Verùm si non hoc velis, quid igitur vis. Dices forsan, quæ *eundem præcisè* locum occupant, vel *eundem locum adæquatum*. At, inquam, illud igitur *præcisè* vel *adæquatum* in definitione tuâ deest; quod quidem in definitione mathematicâ deesse non debuit, nec est ferendum. Deinde eundem inquam *præcisè* locum occupat; (ecquam enim ipsius particulam non occupat totus ille terrarum orbis?) sed & alium, fateor. At, inquires, per illud *præcisè* & *adæquatum*, intelligendum erit *hunc & non alium*. Itane verò? num igitur hoc vis, æqualia ea esse corpora quæ *eundem*

dem locum possidere possunt & non alium? Cave quid dicas; possunt enim & alium certo certiùs. At, inquires, non eodem tempore. Imò, inquam, nec eundem possidere possunt eodem tempore. Quocunque igitur te vertas, multum (mihi crede) deerit ad ἀνεξέχαστον definitionis mathematicæ. At illud, inquires, tu vis, quod locus ille qui jam est locus præcisè adæquatus unius, potest alio tempore fieri locus adæquatus alterius. At, inquam, quidni igitur ita dixeris: est enim hoc longè aliud ab eis quæ tu hic habes. Aut etiam si sic dixisses, quid sibi vult vox illa *adæquatus*? num illa notior erit quam *æquale*; quod erat definiendum? Dices, per locum *adæquatum* illud intelligis qui neque major est neque minor sed exactè convenit. Benè habet; sed annon ipsum *æquale* pariter definire posses? sine vel ulla loci mentione? Sed & insuper; annon adhuc vides te circulum committere? nam illud *maius* & *minus*, mox per ipsum *æquale* definienda erunt. Sed hæc de formâ sive ἀνεξέχαστον tuæ definitionis; quæ est mirè ἀτεχνόν. 6 Definitionis tuæ materia est etiam adhuc magis peccaminosa. Procedit enim ex suppositione eorum quæ vel vera non sunt, vel si vera, saltem non supponenda, sed probanda. Dum enim æqualitatem aut inæqualitatem corporis unius ad aliud definis, non per locum eum quem occupat, sed quem occupare potest. Quæro quid fiet si possit idem corpus nunc majorem nunc minorem (putà propter rarefactionem aut condensationem) locum occupare? Nempe si hoc fieri posse concedatur, poterit idem aliquod corpus respectu alterius cujusdam simul & æquale & majus & minus esse. (quod quam absurdum sit, non potes non videre.) nempe fieri potest ut (quicumque demùm sit locus ille quem jam actu occupat) deinceps aliquando locum tam eundem, quam vel majorem vel minorem (successive, quomodo necesse est ut tua definitio intelligatur) occupare possit. Nec putes te nodum hunc evadere posse dicendo, quod si hoc verum sit, tum corpus illud quod jam est æquale poterit deinceps fieri inæquale: non enim sic evadis. Cum enim tu præsentem æqualitatem definias per locum eum, non quem possidet, sed quem possidere potest, utcunque transformetur, nam & hoc supponis,) si poterit eundem, & poterit majorem, & poterit minorem locum occupare, tum (non inquam esse poterit, sed) per tuam definitionem jam est & æquale & majus & minus eodem. Fatebere, credo, (saltèm fatendum erit) hoc inde secuturum absurdum, si modò id concedatur: sed interim non concedendum esse, sed planè impossibile, ut idem corpus

pus nunc majorem nunc minorem locum possidere posset. At cur non erit concedendum, hoc esse possibile? Nempe, quia tu dicis. Art. 5. *unius locati plures esse diversis temporibus loci possunt, plures magnitudines esse non possunt.* At, inquam, non propterea quod tu hoc dicis ideo necessariò verum erit. Aut etiam si verum sit, (quod tamen ego non concedo,) est tamen, uti tu nescire non potes, res admodum controversa, & ex utràque parte acriter defensa, atque adhuc sub judice. Sed & quodcunque tandem in eâ controversiâ (physicâ nempe, & à præsente negotio penitus alienâ) statuendum erit: tu saltem admodum imprudenter facis (nequid gravius dicam) qui æqualitatis definitionem adeoque totam æqualitatis & inæqualitatis doctrinam, & consequenter universam geometriam inde pendere voles, ut si tuam hâc in re opinionem (quam & plerique philosophorum tibi sunt negaturi) contigerit falsam esse, tota simul (saltèm tua) ruat Geometria: adeò tu tenui filo (quæ tua est prudentia) suspendis omnia. 7. Verùm si esset quam maximè indubitatum; cum tamen illud planè Physicum sit, nec ad rem præsentem quicquam spectet, aut ei sit ullo modo conjunctum, quorsum ipsius ulla mentio facienda erat in hâc tuâ definitione mathematicâ? Sive enim verum sit, sive non verum, utcunque eadem erit *æqualitatis* notio, nec ab istius aut veritate aut falsitate omninò dependet. 8. Sed, ut hæc tandem missa faciam; Dic obsecro, cur tu seorsim definis æqualitatem Corporum, artic. 13. æqualitatem Temporum artic. 16. æqualitatem Velocitatum, artic. 17. & tandem æqualitatem Motuum, artic. 18. Annon eadem est *Æqualitatis* notio in his omnibus? imò & in rebus aliis omnibus quotquot æqualitatis aut inæqualitatis sunt capaces? Si non sit eadem istius ubique notio; cur, quæso, tu (cum aliis mathematicis) à rationibus in uno subjecto, ad rationes in alio subjecto, discurrere soleas? verbi gratia, eandem dices esse rationem corporis ad corpus, quæ temporis ad tempus, si sit utrobique ratio æqualitatis? Nam si non sit eadem & univoca *Æqualitatis* in corporibus atque in temporibus notio, certè nec erit æqualitas corporum & æqualitas temporum eadem ratio, & similiter de aliis. Si autem eadem sit in omnibus *æqualitatis* notio (quod certè dicendum erit, nec quisquam illud dubitat,) quorsum hæc tanta *ματαιολογία*; cur non potius simul & semel dixisses quid sit *æquale*? quam primò, quid sit in corporibus; tum quid in temporibus; deinde quid in velocitatibus; & tandem quid in motibus? Annon simul & semel

mel dixisse posses, *id alteri æquale est, quod tantundem est atque ipsum?* vel *æqualia sunt quorum est eadem quantitas?* vel, si neutra harum placeat, saltem aliam definitionem invenisse, qua ostendatur quæ sit *æqualitatis* notio in quocunque tandem subiecto reperiatur? Vel denique, si id necesse seorsim in his subiectis definire; cur non & illud etiam in aliis subiectis definitum eas? cur non doces quid sit *æquale* in lineis, quid in superficiebus, quid in numeris, sonis, ponderibus, &c? nam & in his omnibus æqualitati locus erit; quam tu tamen ni fallor nusquam definis, utut linearum æqualium, aut etiam superficierum, mentionem facias sæpissimè. 90. Sed sistamus paulisper, jam enim video, (quod prius non animadverti,) saltem *æquales magnitudines* definiri, (quicquid tandem fiat de æqualibus aliis:) nempe in calce hujusce articuli hæc habes. *Eadem ratione magnitudo magnitudini æqualis vel major vel minor dicitur; videlicet quando corpora quorum illæ sunt magnitudines, majora, æqualia, vel minora sunt.* Quin dic, quæso, ut te intelligam; num *magnitudinis* vocem ad sola solida extendis, an etiam ad linearum & superficierum magnitudinem? Si illud tantum vis, ego nihil habeo quod dicam in contrarium; nam procul omni dubio, quæ corpora sunt æqualia, hoc est æquè magna, eorum magnitudines item sunt æquales: sed tibi submissas gratias agimus qui nos docueris hanc profundam veritatem, nempe *corporum æque magnorum æquales esse magnitudines.* Sed, credo, etiam de lineis & superficiebus, vel saltem earum magnitudine, hæc intelligenda velis. Nam & illæ etiam Magnitudines dici solent; et tu etiam de magnitudine linearum, et figurarum in plano, non rarò verba facis; ut non dubium sit quin & has etiam sub *magnitudinis* voce comprehendas, vel saltem comprehendere debeas. Videamus igitur quam bellè hanc definias *Æqualitatem*, nempe *eadem ratione* (quæ corpus corpori, sic universim) *magnitudo magnitudini æqualis dicitur: videlicet quando corpora, quorum magnitudines sunt, sunt æqualia.* hoc est, ni fallor, longitudo longitudini, vel superficies superficiei æqualis erit quando corpora quorum illæ sunt longitudo aut superficies sunt æqualia. Nonne hoc vis? Imo proculdubio, cur (inquis) hæsitem? nempe illud *præterea* affirmat definitio: quippe de omni magnitudine agitur, sive sit linea sive superficies sive aliud quodvis magnum. (Ignoscas, quæso, hæbitudini meæ, qui in re tam planâ hæsitaverim, & conabor saltem si potero in posterum rotundiùs procedere.) Quin dic sodes, mi Hobbi, Num tu adeo insanus es, ut putes hoc verum esse?

Putan?

Putan' tu, æqualium corporum quorumcunque æquales esse protinus & superficies? & longitudines? & contra? Putan' tu fustem, quo dignus es ut cædaris, & crinem equinum ejusdem longitudinis, æqualia esse corpora? Putan' tu aurum bracteatum (in tenuissima folia malleo redactum) atque auri globulum qui tantundem contineat, quia corpora sunt æqualia, æquales ideo & superficies habere? Vel annon multo tibi opus est helleboro qui hæc putes? Dicam tibi, modò id nescias; Parallelepipedum rectangulum, altum & latum pedem unum, longum pedes mille: atque cubum, cujus latus pedes decem: esse corpora æqualia, (nam $1 \times 1 \times 1000 = 10 \times 10 \times 10$;) at superficies illius est superficiei hujus plusquam sextupla, & longitudo longitudinis centupla. At sunt in novâ Geometriâ Hobbianâ, utræque illæ magnitudines (tam longitudines nempe quam superficies,) omninò æquales: quippe quia æqualium corporum. Sed hæc hæctenus. videamus quid sequitur.

Art. 14. Probaturum is, *Unius & ejusdem corporis unam & eandem semper esse magnitudinem.* Benè est quod hoc tandem probatum eas. nempe multum tuâ interest, ut verum sit; uti ex nuper dictis patet. Videamus igitur quam strenuè hoc probes. (Quamvis enim hæc Physica sit disquisitio, non Mathematica, adeoque nisi magni res esset, eam penitus omissem: attamen cum ex hoc cardine totam tuam Geometriam suspenderis, ut nuper dictum est, eò, si libet, divertamus.) *Cum enim, inquis, corpus, & magnitudo, & locus ejus, animo comprehendendi non possint, nisi ut coincidentia:* (nempe $\alpha\upsilon\tau\omicron\varsigma$ $\epsilon\phi\alpha\upsilon\varsigma$. Sed esto: quid tum? num hinc sequitur ejusdē corporis unā semper & eandem esse magnitudinem? Fortassis quidem. Sed cave ne eodem argumento concludas, & eundem semper esse locum: quippe tam locum quam magnitudinē corpori coincidentem facis. Sed utcunque videamus istius consequentiæ probationem.) *Si corpus aliquod quiescere, id est, in eodem loco pro tempore remanere intelligatur,* (nempe hic est casus unus,) *sicq; magnitudo ejus in unâ parte temporis illius major, in alia minor, locus qui idem est coincidet modo cum majore modo cum minore magnitudine, id est idem locus & major & minor erit seipso, quod est impossibile.* Benè habet. Concedamus igitur si placet, (non libet enim minutiora carpere,) corpus aliquod, dummodo planè immotum manet, & eundem præcisè locum occupat, eandem etiam magnitudinem retinere. Sed & casum etiam alterum perpendamus, nempe *si non supponatur planè quiescere, sed locum mutare,* (credo enim non esse planè impossibile ut corpus locum mutet,) quid tu ad hunc casum?

putant

putant enim nonnulli (à te nondum satis edocti) quod, utut corpus, dummodo eundem præcisè locum retinet, eandem retineat & magnitudinem, fieri tamen possit ut locum aliquando mutet; & non modo alium (quod an tua permittat argumentatio necne tu videris,) sed & maiorem vel minorem acquirat ampliatae vel contractae suae magnitudini æqualem. Videamus igitur quid tu habes in adversum, quo probes nempe non posse idem corpus & locum simul & magnitudinem mutare. Imò verò tu ad hoc ne *per* quidem. Hoc igitur solum habes; fieri non posse ut corpus, eundem præcisè locum retinens, magnitudinem mutet; neque magis probas non posse magnitudinem mutare, quam non posse mutare locum. Egregiam verò laudem! Quin dic seriò; putan' tu hanc legitimam esse probationem? nempe, quia non potest augeri corpus aut minui quin locum aliquatenus mutare sit necesse, ideo ejusdem corporis eandem semper fore magnitudinem? Viden' tu interim, nisi hæc tua stabilis sit assertio cui tam debile substernis fundamentum, etiam omnem apud te *Æqualis & Inæqualis* differentiam tolli? (cum nempe nisi hoc constet, erunt eadem iisdem, per definitionem tuam, & æqualia & inæqualia, ut ostensum est.) adeoque & totam ruere Geometriam? Ecquis enim Geometriæ locus erit si æqualium & inæqualium discrimen nullum sit? Sed, inquis, *rem ita per se manifestam demonstrare opus non esset*: (Belle quidem! nempe quod tu facere non potes, illud opus non est. Sed quid porrò? *nisi viderem*, inquis, aliquos ita de corpore & magnitudine ejus sentire, tanquam idem corpus divulsum à suâ magnitudine existere & majore mox vel minore donari posset; (nempe, sicut divulsum à suo loco ex stare potest & mox alio donari, aut divulsum ab eâ quam jam habet figurâ aliam induere; utut non sine omni magnitudine magis quam sine omni vel loco vel figura existere possit: sunt quidem qui ita censent, quos tu si possis refellere debuisses; & quidem id tuâ multum interest facere, cum totam tuam hoc cardine suspendas Geometriam. Sed audiamus reliqua; nolim enim hujusce articuli vel syllabam omittere,) & ad *Rari & Densi naturam explicandam hoc uti principio*. Rectè quidem. Nempe cum eadem materia in minores terminos redigitur, condensari dicuntur cum in majores expanditur, dilatari. Et quid, quæso, tu hic habes, cur non ita dicere possint? cum non magis probes impossibile esse ut corpus mutet quantitatem, quam ut mutet locum?

Sequuntur alie definitiones vix melioris commatis quam
ea

ea quæ modò examinavimus. Sed longum esset singula prosequi; ideòque eas missas facio, ut & alia hujusce capitis, quæ non tam Mathematica sunt quam Physica, quibus ego abstinendum duxi. Illud tamen non possum non notare, quod habes artic. 25. Nempe, cum tu nuper effatum illud tuum, quo totam tuam suspendis Geometriam, [*ejusdem corporis unam & eandem semper esse magnitudinem,*] æquum esse putes sine demonstratione postulare, quippe qui *rem ita per se manifestam demonstrare opus non esse* putes; non interim Euclidi permit- tis ut circa demonstrationem hoc sibi gratis assumat, *Totum esse majus suâ parte.* Quasi quidem hoc, quam illud tuum, minus esset manifestum.

In CAP. XI.

Deindè, omissis capp. 9. & 10. ut quæ nostræ considerationis non sunt: In cap. 11. id saltem ad nos spectare video, quod de Ratione sive Proportionione habes, art. 3. 4. 5.

Artic. 3. *Ratio, inquis, nihil aliud est quam æqualitas vel inæqualitas antecedentis comparati ad consequens secundum magnitudinem.* Verùm cum quantitatatum, puta, Inæqualitas considerari potest, vel quoad Residuum, vel quoad Quotum, (nempe prout quæri potest, vel quanto sit hoc illo majus, vel quotuplum seu quantuplum sit hoc illius; quorum prius Subductione innotescit, posterius Divisione;) videamus utra istarum considerationum illa est quam tu hic *Rationem* esse velis. *Exempli causâ*, inquis, *ratio ternarii ad binarium aliud non est, quam ternarium superare binarium unitate; & ratio binarii ad quinarium aliud non est quam binarium à quinario deficere ternario.* Bene habet. Videmus igitur *Rationis* æstimationem esse (secundum te) penes Residuum, non penes Quotum; & Subductione non Divisione quærendam esse. Nempe ratio 3 ad 2, est excessus unitatis, + 1; ratio 2 ad 5, est defectus ternarii, sive - 3: quia nempe $3 - 2 = + 1$, & $2 - 5 = - 3$. Et ne dubitemus, illud etiam ulterius adhuc confirmas; *itaque*, inquis, *in ratione inæqualium, ratio minoris ad majus Defectus, ratio majoris ad minus Excessus dicitur.*

Hinc autem sequitur; (saltem secundam Logicam nostram, tu videris an secundam tuam;) si quantitatatis ad quantitatem ratio sit nihil aliud quam ipsius ad hanc excessus vel defectus; tum ubicunque est idem excessus vel defectus, ibi est eadem ratio:

ratio: & ē contra, ubicunque non est idem excessus aut defectus ibi non est eadem ratio. (quī enim hanc consequentiam negare possis, ego non video.) Et consequenter eadem est ratio 3 ad 2 quæ est 5 ad 4, nam utrobique est excessus unitatis 1. Item 3 ad 2 & 6 ad 4 non est eadem ratio quoniam excessus est illic 1, hic 2. At horum utrumque falsum esse tu non ignoras, (vel, si ignores sciunt,) alii: Ergo & falsa est tua Rationis definitio unde illa consequuntur.

Artic. 5. illud destruis quod artic. 3. affirmaveras Jam enim *consistit*, inquis, *ratio antecedentis ad consequens in Differentia sive Residuo non simpliciter*, (imo verò simpliciter; nam, si ratio^{ternarius} ad binarium aliud non est, quam ternarium superare binarium unitate; consistet in differentiā sive Residuo, simpliciter. Sed esto; non simpliciter; quomodo igitur:) Sed ut comparato cum alterutro relatorum. Esto, sed quomodo comparandum est? (sunt enim multi comparisonum modi;) dic igitur (si nondum definiveris) ut sciamus quid secundum te sit Ratio: nempe ut ratio binarii ad quinarium est ternarius, quo quinarium binarium superat, non simpliciter, sed quatenus cum binario vel quinario comparatus. At, inquam, quomodo comparatus? aut quid sibi volunt hæc verba? vel quem habent sensum? vel quem tu mortalium ex his verbis discere posse credas quid sit Ratio? Dixti modò, *rationem binarii ad quinarium aliud non esse quam binarium à quinario deficere ternario*, quod nemo non intelligit; jam verò ratio illa est aliquid aliud, nempe ternarius quo quinarium binarium superat, non simpliciter sed quatenus cum binario autem quinario comparatus, sed comparatione tali quam nec tu scis ipse nec aliis explicare potes. Nempe, ita tu Rationem definis ac si omnis esses rationis expers. Et dum ea tradere velis quæ tute non intelligis, non mirum est, si neque ab alio quovis intelligaris. Sed esto; quicumque tandem sit sensus istius comparisonis, saltem hoc in binarii ad quinarium ratione satis obvium est, ut nempe sit numerus ternarius, (quomodocunque tandem hic numerus comparandus sit,) adeoque quæcunque illa sit ratio quæ non est numerus ternarius (ignosce, quæso, huic phrasiologiæ, nam tua est, quodcunque tandem significet,) non eadem est ratio quæ est 2 ad 5. Exempli gratia, 4 ad 10, non est eadem ratio atque 2 ad 5, (secundum te,) nam ratio 2 ad 5 est numerus ternarius &c. Sed ratio 4 ad 10. non est numerus ternarius &c. ergo eadem non est. Quod falsū esse nemo nescit. Adeoque quamvis nec ego
nec

16 *Elenchus Geometrie HOBBIANÆ. CAP. 13.*

nec quisquam credo alius, intelligam quem sensum commodum hæc admittant verba, (quippe quæ nullum,) quilibet tamen intelligat ridiculam te & sine omni ratione Rationis explicationem tradidisse. Illud, credo, dixisse velles, (saltem illud dicendum erat,) rationem duarum ad invicem quantitatum æstimandam esse non ex earum differentiâ, Subductione quærendâ, (prout tu supra tradideras,) sed ex Divisionis quoto, (cotuplex nempe est quantitas quantitatis quot indicat Divisionis quotiens.) adeoque quæ hic dixisse velles contraria sunt eorum quæ dixti art. 3. ut intelligamus te neque admodum veracem esse, neque satis memorem.

Priusquam autem hoc dimittam, video tandem quomodo tu te explicas. Nempe cap. 12. art. 2. hæc habes: *comparatio magnitudinis cum magnitudine, per ea quæ dicta sunt capite præcedente, id ipsum est quod vocatur Ratio.* Adeoque cum id sit comparari, verborum illorum *Ratio binarii ad quinarium est ternarius quo quinarium binarium superat, non simpliciter, sed quatenus cum binario aut quinario comparatus, videtur hic esse, Ratio binarii ad quinarium est ternarius, non simpliciter, sed quatenus est ratio binarii ad quinarium.* Accuratè quidem?

In CAP. 12.

CApit 12. quamvis multa contineat satis absurda (quale, verbi gratiâ, illud est quod habes art. 8. ubi statuis *Rationem inæqualitatis quantitatem esse, rationem verò æqualitatis non esse.*) cum tamen potius tuorum figmentorum quam rerum Mathematicarum definitiones contineat (quæ quantumlibet sint ineptæ meâ non multum refert) id intactum prætereo. Præsertim ne Rationum tractationem interrumpam ad quam redis cap. 13.

In CAP. 13.

CAp. 13. art. 1. Rationem quam cap. 11. definiveras, jam distribuis, in *Rationem Arithmetica, & Rationem Geometricam.* At, quæio, quænam est ea Ratio quam sic distribuis; num ea quam cap. 11. art. 3. an quam art. 5. definiveras? (utut enim eandem rationis notionem utrobique te explicare præ te feras, sunt tamen quæ istic habes sibi è diametro opposita.) Non priorem credo: nam ea sic distribui non potest, quippe quæ *Arithmetice Rationi* (si saltem hæc ratio dici debeat)

soli convenit, (utpote quæ aliud non est quam excessus vel defectus,) non omnino Geometricæ: neque posteriorem; nam nec ea sic distribui potest, cum illa, prout tu eam ibidem explicas, neutri convenit, & prout explicare velle videris, soli Geometricæ, non item Arithmeticæ, nam ibidem disertè affirmas eandem non esse rationem 2 ad 5, & 9 ad 12: cum tamen differentia, hoc est (uti tu jam loqueris) ratio arithmetica, sit utrobique eadem. Quin dic, quæso, quæ te quisquæ intelligat, aut quid vis, assequatur, dum adeo es versipellis & tergiversator ἀλλοπεγισμῶν? nempe per *Rationis* vocem intelligis, primò solam Arithmeticam, deinde solam Geometricam, tandem utramque.

Quo teneam vultus mutantem Protea nodo?

Dic, ô Empusa mea, quo pede mavis incedere (æneo an asinino?) licet enim utrūvis eligas, at utrūque subinde (& ne dato quidem indicio) ad libitum variare non licet: si enim vel pedem permutaveris, vel utroque simul incedas, (nosti Empusæ ludum) pueri te flagellabunt.

Ad art. 2. notare possem (nisi illud ubique potius notandum esset) rationis *Antecedentem* & *Consequentem* (postquam per aliquot capita præcedentia voces illas usurpaveris) te tandem definire. At verò solent Mathematici, non prius vocabulum artis usurpare quam illud definiverint, nisi forsan illud ita notum esse supponant ut definitione non sit opus. Tu verò neque suo loco has habes definitiones, quod oportuit, si velles omnino definire: neque tamen omnino omittis, quasi essent significationis jam notæ. Hæc autē quantillacunque videatur negligentia, & alibi satis frequens, mathesis tamen, mihi crede, non admittit. Verū hæc violatæ methodi, tam levis est, præ reliquis tuis criminibus, culpa, ut non notatu digna videatur, præsertim cum adeo apud te frequens occurrat, (nam centies eadem oberras chordâ,) ut jam in morem abiisse videatur, & consuetudinis jam sæpius iteratæ impunitatem meruisse.

Artic. 3. jam iterum absurdum illud tuum, ex præcedente capite, repetis, nempe *Rationem inæqualitatis, sive excessus sit sive defectus, quantitatem esse, rationem verò æqualitatis non esse.* Quasi quidem Æquale & Inæquale non ejusdem essent Prædicamenti. Sed videamus tandem (quoniam id tam importunè repetis) quidni tam hæc quam illa, vel sit vel non sit quantitas. Nempe quia non est una æqualitas major aut minor aliâ æqualitate: at duarum rationum inæqualitatis sive eæ rationes sint excessus sive defectus

una aliā potest esse vel major vel minor vel ambæ æquales. Esto, mi Hobbi, quod æqualia omnia sint æquæ æqualia, at inæqualia possint esse vel magis vel minus inæqualia, (nempe hoc dictum velis.) Sed quid tum? Ex quo, inquis, colligitur, (nempe Hobbius noster, pro eo quo est ingenio, hoc colligit,) *rationem tam excessus quam defectus esse quantitatem*, quippe quæ suscipit magis & minus; *rationem autem æqualitatis*, quia non suscipit magis nec minus, *quantitatem non esse*. Quin audi bone vir! suscipere magis & minus, est proprietas Qualitatis non Quantitatis, (quod, si nescias, docebunt te pueri) adeoque tu titubas in limine. Sed porro, ut videas quam bellè tu argumentaris, Quidni &, eodem argumento, dicamus *Angulum rectum quantitatem non esse*, quippe cum *recti omnes sint æquæ recti*, *angulus rectus non suscipiat magis & minus*; *angulum autem obliquum, sive is obtusus sit sive acutus, quantitatem, suscipit enim uterque magis & minus cum sint alii aliis magis aut minus obtusi vel acuti?* Putan' tu hanc legitimam esse argumentationem? ut nempe Angulum obtusum quantitatem esse, angulum autem rectum, qui ipsius pars est, non esse? item, Angulum rectum quantitatem non esse, at interim acutum (recti partem) quantitatem? Putan' tu totum aliquod quantitatem esse posse cuius pars non est; & vicissim partem aliquam esse quantitatem cuius totum non est? At hæc mi Hobbi, quantumcunque sit ridicula, est tua Logica.

Art. 5, 6. *Rationis identitatem* definitum is. At si superius satis explicuisses quid enet *ratio*; non multum opus esset ut iterum definias quid sit *eadem ratio*. Nempe si per quantitatum rationem intelligis differentiam, tum ubi eadem differentia ibi eadem ratio; si verò quotum intelligas, tum ubi idem quotus ibi & eadem ratio. Quis enim hoc neiciret? Num soles tu postquam definieris quid sit *Homo*, deinceps definire quid sit *idem homo*? vel postquam dixeris quid sit *animal*, novā definitione docere quid sit *idem animal*? Annon sufficit (præter *Hominis* & *Animalis* definitiones) *Identitatis* definitionem semel apposuisse, nisi & identitatem sigillatim definias in omnibus subjectis quæ sunt identitatis capacia? Sed videamus, modò ita velis, num quid sit *eadem ratio* melius ostendas quam docuisti supra quid sit *ratio*. Nempe *Ratio*, inquis, *arithmetica rationi arithmeticae eadem est, quando unum antecedens consequens suum tanto superat, vel ab eo superatur, quanto antecedens alterum superat vel superatur a consequente suo*. At cum proinde expectandum esset ut simili formâ de Geometricâ ratione diceres, *Ratio Geometrica rationi Geometricæ eadem est quando unum antecedens consequentis sui (totuplum vel) tantuplum est, (quotuplum vel) quantuplum est antecedens*

antecedens alterum consequentis sui: aut quod huic simile, (non enim metuendum esset voces *totuplum* & *quotuplum*, sive *tantuplum* & *quantuplum*, magis quam *tanto* & *quanto*, quasi notæ significationis, assumpsisses.) tu interim hæc habes *Ratio Geometrica rationi Geometricæ eadem est, quando causa aliqua æqualibus temporibus æqualia faciens, utramq; rationem determinans eadem assignari possit.* Quam definitionem (præterquam quod alteri sit difformis) Oedipo opus est ut quis intelligat. Et quidem si quando intelligatur, tantundem erit ac si *Metallum* definiveris, *tale quid quale est aurum:* nempe, loco definitionis, unam assignas instantiam. Quanquam enim causa aliqua æqualibus temporibus æqualia faciens, hoc est, uniformiter agens, effectus producat temporibus proportionales: quid tamen hoc omne est ad naturam proportionis Geometricæ? aut quorsum, quæso, ut illius notio intelligatur, magis *temporis* quam *ponderis* (aut etiam aliarum quarumlibet quantitatum) consideratio habeatur? Annon tu putas 2 ad 10 & 4 ad 20 eandem esse rationem Geometricam atq; eam etiam satis intelligi posse, nisi importuna temporis consideratio habeatur & causæ alicujus æqualibus temporibus æqualia facientis?

Quæ autem ad isthæc explicanda tu mox subjungis, de puncto, & motu, & lineis, & motuum uniformitate, atque velocitate, &c. (quasi horum omnium consideratio necessaria foret ad rationem Geometricam intelligendam,) nil aliud facis quam ut rem facilem, quæ à te jam facta erat nimis perplexa, etiam adhuc facias perplexiorem. Nam ubi rem simplicem explicaturus es, quo plures adferas aliunde notiones quæ ad ipsius naturam non spectant, eo magis componis & perplexam reddis; quasi quidem cum ostensurus sis eandem esse rationem 4 ad 2 quæ est 6 ad 3, tempus & lineas & motus & velocitates & uniformitates &c. in opem (quod tu facis) advocares: quum id simplicius ostenditur; quia tam quaternarius binarii quam senarius ternarii duplus sit, adeoque eadem utrobique ratio.

Corollaria quæ adjungis, aliosque deinceps consimiles articulos, cum nil novi doceant, (sunt enim vel propositiones ex libro V Euclidis desumptæ, vel saltem aliæ ejusmodi proportionum metamorphoses quales quis comminisci celerius potest quam describere vel etiam verbis efferre,) non opus est ut sigillatim retexam. Ut autem videas quam tu es in demonstrando non minus quam in definiendo & explicando perspicuus & subtilis, non gravabor unam aut alteram ex demonstrationibus tuis perpendere, ut videamus annon quæ tu magno apparatu aggredieris possit facilius & minori tumultu perfici. Verbi gratiâ.

Articulo 13. hanc habes propositionem *Si fuerint tres magnitudines, vel tria quaecunque habentia rationem aliquam; rationes primi ad secundum, & secundi ad tertium simul sumptæ, sunt æquales rationi primi ad tertium.* Quam com-
moda sit illa phrasis, rationes primi ad secundum, & secundi ad tertium simul sumptæ, &c. non libet contendere: dice-
rent alii, quæ ex rationibus primi ad secundum & secundi ad tertium componitur ratio, &c. Nempe: si sint tres illæ quantitates, verbi gratia, tot numeri 6, 3, 1. ratio primi ad secundum est dupla, secundi ad tertium est tripla, ratio primi ad tertium sextupla: non autem id vis, duplum & triplum simul sumpta æquari sextuplo, (quamquam ita videantur ex vocis intelligendæ, dum dicis rationes primam & secundam simul sumptas æquari tertiæ,) nam illud omnino falsum est, cum duplum & triplum simul sumpta æquantur (non sextuplo, sed) quintuplo, (quod an tu satis intellexeris necne, dubitari fortasse poterit:) sed per rationes primam & secundam simul sumptas, intelligis ratio-
nem, quæ ex prima & secunda componitur, quæ quidem com-
positio fit terminorum multiplicatione, (non additione,) ut notum est, & vocatur potius rationum continuatio quam ad-
ditio, (quamquam & hanc appellationem aliquando reperiri posse non negem,) adeoque ratio quæ componitur, verbi gra-
tia, ex dupla & tripla, non est *dupla & tripla simul sumpta* (hoc est quintupla, quia $2 + 3 = 5$) sed *dupla tripla*, hoc est sextupla, quia $2 \times 3 = 6$. quo sensu vera est tua propositio: atque eadem ferè cum 5. def. vi. Euclid. Atque hæc quidem dicenda erant, ut de sensu tuorum verborum (minùs commodè prolatorum) constet. Videamus jam demonstrationem.

Primò quidem, pro tribus expositis quantitatibus (puta b, c, d,) substituis tres lineas, in iisdem rationibus constituendas, puta AB, AC, AD, ab eo-
dem puncto A incipientes.

A ————— B C D

Deinde tres casus supponis. Quorum primus est, ut tam ratio primi ad secundum, quam secundi ad tertium, sit ratio defe-
ctus: & propterea, cum eadem sint rationes linearum, AB minor quam AC, atque hæc minor adhuc quam AD. At-
que, Dicis, in hoc casu rationes AB ad AC, & AC ad AD, simul sumptas, (rationem intelligis ex illis compositam,) æ-
quales esse rationi AB ad AD.

Hoc ut probes, *Supponitur*, inquis, *punctum A moveri per to-
tam AD uniformiter. Itaq; rationes tam AB ad AC, quam AC
ad AD, determinantur à differentia temporum quibus describuntur,*
id

id est, habet AB ad AC rationem illam, quam diversa descriptio-
nis tempora determinant, & AC ad AD rationem quam deter-
minant tempora sua: sed & ratio AB ad AD , illa est quam deter-
minat differentia temporum quibus ipsæ AB & AD describuntur.
(Nempe, hoc vis, tam AB, AC , & AC, AD , quam AB, AD ,
sunt temporibus quibus describuntur proportionales.) Differentia
autem temporum quibus describuntur AB, AC , una cum differen-
tia temporum quibus describuntur AC, AD , eadem est cum diffe-
rentia temporum quibus describuntur AB, AD , Eadem ergo, &c.
Quin cave quæ hîc incedas; lubricus enim locus est. Non e-
nim differentia simpliciter determinat rationem, nec æqualitas dif-
ferentiarum, infert æqualitatem rationum, sed æqualitas quo-
torum, (quippe de ratione Geometricâ, non Arithmeticâ,
jam agitur,) non enim si æquales sint differentiæ BC , & CD ,
igitur eadem erit ratio AB ad AC , & AC ad AD . Quam autem
absurda sit atque futilis hæc argumentatio tua, te iudicem faciâ:
dum eodem argumento & iisdem verbis tuis ego illud inferam,
quod vel tu fateberis absurdum esse. Nempe, manente tuâ con-
structione, assumatur etiam inter

A & B punctum quodvis a: $\begin{array}{ccccccc} & & & A & & B & C & D \\ & & & \hline & & & a & & & & \end{array}$

Unde tuis verbis sic arguo. Dif-
ferentia temporum quibus describuntur AB, AC , una cum differentia
temporum quibus describuntur AC, AD , eadem est cum differentia tem-
porum quibus describuntur aB, aD . (nempe $BD = BC + CD$)
Eadem ergo causa est quæ determinat ambas simul rationes, AB ad
 AC , & AC ad AD , & quæ determinat rationem, aB ad aD .
Quare (per Def. ejusdem rationis traditam, Artic. 6.) ratio
 AB ad AC una cum ratione AC ad AD eadem est cum ratio-
ne (non modò AB ad AD , sed &) aB ad aD . Quod
quam absurdum sit, tu, ni cæcus es, non potes non videre. Absur-
da igitur est isthæc argumentatio tua quæ nos huc perduxit.

Atque hæc est tua constructio & demonstratio casus primi;
ubi tam ratio expositorum primi ad secundum, quam secundi ad
tertium est ratio defectus. (casus secundus, ubi utraque est ra-
tio excessus; item tertius ubi altera est ratio excessus, altera defe-
ctus; ejusmodi etiam demonstrationibus confirmatum is, quæ
eodem pede claudicant; adeoque quæ de casu primo dicta sunt
vel dicenda, etiam eò referri possunt,)

Dico igitur Demonstrationem hanc tuam (seu potius Pseuda-
podixin) variis nominibus vitiosam esse. Nempe primo
quod sit planè parallogismus, sive petitio principii, nec omnino

probat, sed postulat, id quod probandum erat. 2. si vera esset consequentia, ideo tamen vitiosa esset demonstratio quod multa perperā assumat quæ ad demonstrationem neutiquam intervniunt. Vis enim demonstrationis, si qua sit, hæc est, quoniam per Constructionem expositæ quantitates b, c, d , sunt proportionales rectis AB, AC, AD , his autem proportionales motus quibus hæ rectæ describuntur, & denique motus hi (quia supponuntur uniformes) proportionales temporibus in quibus fiunt; ideoque (quod assumendū est, secus enim argumentatio non procedet: nisi enim per *differentiā* hic intelligas *quotū*, hoc est *rationē*, nihil concludis; cum rationes temporum AB ad AC & AC ad AD simul sumptæ (hoc est, ratio quæ ex his componitur,) æquales sint rationi temporis AB ad AD (quæ est petitio principii, hoc enim illud est quod erat probandum) erunt etiam rationes motuum AB ad AC & AC ad AD simul sumptæ æquales rationi motus AB ad AD , (quia nempe motus sunt temporibus proportionales, & consequenter (pari de causa) rationes linearum $AB, AC, & AC, AD$, simul æquales rationi linearum AB, AD , & denique rationes quantitatum expositarum b ad c & c ad d , simul æquales rationi b ad d , quod erat demonstrandum? At quorsum quæso tantus apparatus? quid motu & tempore & æquali velocitate opus est? Annon de ipsis statim lineis (sine omni motus aut temporis mentione) pariter assumi possit quod tu jam assumis de tempore; nempe differentiam rectarum $AB, AC, & AC, AD$, simul æquales esse differentia rectarum AB, AD ? (nempe $BC + CD = BD$, totum partibus simul sumptis?) adeoque & rationem rectarum (non minus quam temporum) AD componi ex rationibus AB ad AC & AC ad AD ? Et quidem si hoc in Temporibus valeat, annon & in Lineis pariter? Aut etiam si de Temporibus postulandum esset, annon pariter de lineis? Vel tandem si hoc in lineis postulare esset petitio principii, annon similiter erit in temporibus? Vel denique annon idipsum etiam in expositis quantitibus (sine vel linearum ope) dici posset, nempe

$$\left. \begin{array}{l} \text{diff. } c - b \\ \text{plus diff. } d - c \end{array} \right\} = d - b. \text{ ergo } \frac{b}{c} \propto \frac{c}{d} = \frac{b}{d} \text{ nam quo}$$

sensu hoc verum erit de temporibus, pariter etiam esset de quantitibus expositis. Frustra igitur & nulli bono est totus ille linearum, motuum, temporum, velocitatum, &c. mentio, cum ad demonstrationem nihilum faciant; nec alia de causa introducuntur quam quod placuerit summi acuminis viro rem in se facilem, atque omnibus notam, perplexam reddere, ut

vide.

videatur abstrusum aliquid exposuisse, vel saltem ut ipsius petitiō principii, post tot linearum, motuum, velocitatum, & temporum mentionem, minus esset lectoris observationi obvia, quam si statim admissus fuerit ille paralogismus.

Imò & tota illa casuum variatio (quorum ego non nisi unius demonstrationem exposui, supersunt autem & duo alii ejusdem farinae) est plane supervacua. Adeoque propositio sic breviter & dilucidè (sine hoc tanto apparatu) proponenda & demonstranda fuerat.

Expositis tribus quibuscunq; quantitibus homogeneis (puta b, c, d .) *ratio primæ ad tertiam* (b , ad d , seu $\frac{b}{d}$) *æquatur compositæ ex rationibus primæ ad secundam & secundæ ad tertiam,* (nempe b ad c & c ad d .) Quia nempe $\frac{b}{c} \times \frac{c}{d} = \frac{bc}{cd} = \frac{b}{d}$ quod erat demonstrandum.

Et pari facilitate demonstranda sunt quæ tu huic articulo adjungis corollaria. Nempe 1. $\frac{a}{b} \times \frac{b}{c} \times \frac{c}{d} \times \frac{d}{e} = \frac{a}{e}$.

2. $\frac{a}{b} \times \frac{c}{d} = \frac{ac}{bd}$. 3. Si $\frac{a}{b} \times \frac{b}{c} \times \frac{c}{d} = \frac{\alpha}{\epsilon} \times \frac{\beta}{\gamma} \times \frac{\gamma}{\delta}$;

erit $\frac{a}{d} \times \frac{\alpha}{\delta}$ quæ omnia solâ terminorum multiplicatione (quæ ipsa est rationum compositio sive continuatio) statim patefcunt.

Similiter artic. 14. ubi probandum est $\frac{ab}{cd} = \frac{a}{c} \times \frac{b}{d}$ vel $\frac{abf}{cdg} = \frac{a}{c} \times \frac{b}{d} \times \frac{f}{g}$ (quæ ex sola terminorum multiplicatione patefcunt) tu prolixis & perplexis constructionibus & demonstrationibus, ne dicam paralogismis, tenebras offundis, ut videaris aliquid obscuri tradidisse.

Sic artic. 15. $\frac{a}{b} \times \frac{b}{a} = \frac{ab}{ba} = 1$. Adeoque quod tu totis hisce tribus articulis 13, 14, 15, pag. 96, 97, 98, 99, magno conatu tradis, posset id omne totidem lineis feliciùs expediri. Et sic passim alibi. Adeo ut si demus te verè demonstrâsse (quod tamen dandum non est) acutum tamen te esse demonstratorem, neutiquam est concedendum: dum tu magno circuitu id quæris quod in proximo erat. Nolim expectes ut ego singulas ejusmodi nugas tuas (infinitum enim esset) seorsim, ubicunque occurrunt, exponam: non enim tantâ par est morâ lectorem detinere, quantâ opus esset ut te toties erudiam,

aut

aut singulas castigem ineptias. Satis est ut hinc discas quam tu acutus es atq; subtilis (demonstrator, dicam? an) nugator.

Articulo 16. miserè hallucinaris, & tam turpiter tuam prodis ignorantiam ut nullo vel prætextu vel tergiversatione te poteris excusare. Quippe qui nescis (quod nullo modo ferendum est) quid sit ratioduplicata, triplicata, &c. aut subduplicata, subtriplicata, &c. Nempe Euclides 10 & 11 dd 5. sic definit, si tres magnitudines sint proportionales, prima ad ultimam duplicatâ habere dicetur eam rationem, quam habet ad secundam; si quatuor, triplicatam, &c. putà, si sint continuè proportionales a, b, c, d, e, &c. erit

$$\frac{a}{c} = \frac{a}{b} \times \frac{b}{c} = \frac{a}{b} \times \frac{a}{b} \quad \& \quad \frac{a}{d} = \frac{a}{b} \times \frac{b}{c} \times \frac{c}{d} = \frac{a}{b} \times \frac{a}{b} \times \frac{a}{b} \quad \&c.$$

atque sic loquuntur Mathematici omnes. Quid vero tu? Nempe ratio majoris ad minus (cautè quidem) per numerum multiplicari dicitur, quando ipsi aliquot rationes æquales sive eadem sibi adduntur. Hoc est componuntur. Quin dic, obsecro, quorsum ealimitatio, Ratio majoris ad minus? annon de qualibet ratione pariter verum est? (nempe sic olim Euclidi visum est atque post illum hætenus omnibus: annon etiam & tibi?) nullo modo. Sed si datur ratio minoris ad majus, rationesq; aliquot addantur ipsi æquales, non multiplicari propriè, sed submultiplicari; dicitur. (hoc est, dividi, annon? quorsum igitur tu rationum divisionem aliam ab hac submultiplicatione statim subjungis? vel dic mihi, quomodo apud te differunt dividere & submultiplicare? annon idem est semissis & subduplum? idem bisecare & subduplare?) Imò verò, etiam ratio minoris ad majus multiplicari dicitur non minùs quam majoris ad minus, estque $\frac{1}{9} = \frac{1}{3} \times \frac{1}{3}$ ratio duplicata rationis $\frac{1}{3}$ & ratio $\frac{1}{27} = \frac{1}{3} \times \frac{1}{3} \times \frac{1}{3}$ ejusdem triplicata (non uti tu putas subduplicata, subtriplicata,) non minùs quàm est ratio $\frac{9}{1} = \frac{3}{1} \times \frac{3}{1}$ rationis $\frac{3}{1}$ duplicata, & $\frac{27}{1} = \frac{3}{1} \times \frac{3}{1} \times \frac{3}{1}$ ejusdem triplicata. Atque hoc quidem quis unquam crederet te, tantum virum, nescisse! quis unquam speraret ut tu, magnus & Philosophiæ & matheseos instaurator, tam possis turpiter impingere? teque tam crassæ, & non ferendæ quidem in ipsis elementis, ignorantia reum exhibeas? Crede mihi, vel hic unicus lapsus tuus, quantuluscunque tibi videatur, tantus est, ut mirū sit ni, ex hoc vulnere, insequentibus perpetuò claudus incedas.

Denique

Denique, (ut hoc caput tandem dimittam, ne nimius sim,) Corollarium illud, quod articulo 28 subjungis, (& cujus solius gratiâ videris totum illud articulorum 26, 27, 28, tædium suscipisse,) nempe *Si quantitas aliqua divisa supponatur in partes aliquot æquales numero infinitas, differentiam inter mediam Arithmeticam & Geometricam fore infinitè parvam*: hunc certè laborem non meruit. Nempe hoc est quod videris velle (utut id verba tua vix satis exprimant) si supponatur quantitatis AB , pars infinitè parva CB ; sitque inter totam & residuam AB , AC , media Geometrica AD , & Arithmetica AE ; erit duarum AD , AE , differentia infinitè parva. Quod quamvis verum sit, quid tanto tamen apparatus opus est ut probetur? Si enim duæ sumantur quantitates intermediae AD , AE , sive sint mediae Arithmeticae, sive Geometricae, sive aliae quævis utcunque assumptæ, dummodo utraque sit major quam AC & minor quam AB , quis dubitabit quin differentia mediarum minor sit quam extremarum? pars toto? Adeoque si supponatur tota CB infinitè parva, ipsius pars DE , supponenda est (si fieri potest) etiam adhuc minor quam infinitè parva. Adeoque illud nullo negotio ostensum est universaliter de intermediis quibuscunque quantitatibus, quod tu totis istis articulis 26, 27, 28, pag. 102, 103, 104, 105, de mediis Arithmetica & Geometrica assecutus es.

$A \quad CDEB$

In CAP. 14.

Libet etiam hujus capituli nonnulla quæ occurrunt Geometrica, seu potius *α' γεωμετρικα*, sparsim notare; sed & strictim, non vacat enim distinctè singula, ne multus sim.

Art. 2. Definis *Planum sive superficiem planam, eam esse quæ describitur* (non ut soles, quæ describi potest) *à lineâ rectâ ita motâ ut singula ejus puncta singulas describant lineas rectas*. Quin dic mihi; si radii, puncto uno manente, reliquum circumlatum describat circulum: Nam tu Circulum sic descriptum negabis esse *planum*? vel dices, singula sic circumducti radii puncta *describere lineas rectas*? Vel denique fateberis definitionem illam plani, esse planè nugatoriam? Horum enim aliquod necessario dicendum erit.

Mox illud subjungis Corollarium, *Duæ superficies planæ solidum non includunt*. Imò verò, sed neque etiam tres. Cur igitur duarum tantum meminit acutissimus vir, idemque *γεωμετρικὸς* &?

Art. 7. *Superficialium*, inquis, *angulorum* pro duobus modis quibus *divergentia* duarum *linearum* fieri potest (cujus *divergentiæ* quantitatem, *angulum* esse definiveras,) *duæ* sunt *species*. Nempe applicatis sibi mutuò duabus *rectis* ut per totam longitudinem *contiguæ* sint, potest una ab alia, manente concursu in uno puncto, *distrahi*, vel *motu circulari* &c. ita ut maneat earum *rectitudo*; & hujus *distractionis* sive *divergentiæ* quantitas, vocari solet simpliciter *Angulus*: (Esto. sit hæc una species, nempe *Angulus Rectilineus*; quænam altera) Vel, inquis, potest *distrahi* per continuam *flexionem* sive *curvaturam* in omni ejus puncto imaginabili; *distractionis* autem hujus quantitas vocatur *Angulus contingentia*. Benè habet. Non libet omnes hujus distributionis apices exagitare. At illud saltem rogem, si *recta* *curvam* secet, num *angulum* contineant necne? Cur vel *Angulum* esse neges, vel etiam *Superficialem*, non video. Si affirmes; quæro, ad utram harum *specierum* referas? Non ad priorem; non enim servatur *curvarum rectitudo*, cum alterum supponatur *curvum*; sed neque ad posteriorem; nam *Angulus contingentia* non est, supponimus enim se mutuò non contingere, sed secare duas hæc *lineas*: Ad neutram igitur. Ideoque peccat tua *distributio*.

Præterea, *Angulorum* (inquis) *Superficialium* simpliciter dictorum (ubi nempe *distractis* *lineis*, earum *rectitudo* manet, uti jam definiveras) qui in *plana superficie* sunt, *plani* sunt; qui in *aliâ superficie* sunt, ab illâ *denominantur*. Quin audi, quæso. Num dormis? an somnias vigilans? annon tu scis, *Angulos* omnes duabus *lineis* comprehensos quarum *rectitudo* manet, *rectilineos* esse? Et *rectilineos* item *planos* esse? Cur igitur *angulos* *rectilineos* (quorum omnes *plani* sunt) distribuisti in *planos*, & *alios*? Quinam, quæso, sunt illi *anguli* alii *rectis* comprehensi, qui non sunt *plani*?

Ne autem non planè insanires; eisdem *angulos* simpliciter dictos (hoc est, *rectilineos*, sive *rectis* comprehensos, ut dictum est) sic ulterius distribuisti; Postremò, inquis, qui *rectis* continentur *lineis*, *rectilinei*; qui *curvis*, *anguli curvilinei* sunt; qui *recta* & *curva* continentur, *mixti*. Nempe *Angulorum* *rectilineorum*, alii sunt *rectilinei*, alii *curvilinei*, alii *mixti*. Vel (ut tuis verbis pressius insistam) *duæ rectæ distractæ* quarum *rectitudo* manet, sunt vel utraque *recta*, vel utraque *curva*, vel altera *recta* altera *curva*. adeoque continent vel *angulum rectilineum*, vel *curvilineum*, vel *mixtum*. Næ, tu lepidus es *Geometra*, mi *Hobbi*, atque argutus admodum! Mirum est, unde tu nactus es

es hoc tantum acumen.

Art. 9. *Quantitatem anguli simpliciter dicti sic*, inquis, *definimus*. Nempe art. 7. *angulum* definis *quantitatem divergentiæ &c.* jam vero *anguli quantitatem* definis: hoc est, quantitatem quantitatis, &c. Sed audiamus definitionem. *Quantitas* (inquis) *anguli est arcus sive circumferentia circuli determinata per rationem ejus ad totum (lege totam) perimetrum*. Egregiè quidem, atq; ἀκριβῶς! *Quantitas divergentiæ est Angulus; quantitas anguli* (hoc est, quantitas quantitatis divergentiæ,) *est Arcus*. Anguli vel etiam divergentiæ quantitatem *arcu mensurari* sæpius audi-vi: at verò *arcum esse* nunc primum audio. 2 Deinde *quantitas anguli*, inquis, *est circumferentia circuli?* at, quæso, quæ circumferentia? &, cujus circuli? (nam horum ne γένος quidem in definitione.) Eam, credo, velles circumferentiam quæ anguli cruribus intercipitur, nonne? At verò cur illud subticuisti? Sed & cujus circuli? num cujusvis? quocunque centro ducti? (Sic videtur, nam tu neque circumferentiam, neque circulum, neque centrum determinas:) an illius tantum cujus centrum est ipsum angulare punctum? Si illud dicas; quomodo de anguli quantitate aliquid certi cognoscetur? nam prout aliud atque aliud centrum sumas, ita variabitur peripheriæ quantitas cruribus intercepta, tam in se, quam etiam in respectu ad totam perimetrum. Si hoc, cur non indicâsti? nam in definitione tuâ nil horum est. 3. Sunt hæc omnia prout tu velis intellecta. At quid interim sibi vult hæc definitio, *Anguli quantitas est circumferentia circuli determinata per rationem ejus ad totam perimetrum?* Illud, credo, vis (licet vix quisquam hoc tuis verbis indicatum crederet) *Angulum tantum esse, quanta est intercepta cruribus circumferentia circuli (puncto angulari ut centro descripti) respectu totius perimetri*: putà, quam habet rationem intercepta circumferentia ad totam perimetrum, eam habet mensuratus angulus ad — quid? verbi gratia, si arcus ille sit totius perimetri quadrans, triens &c. erit & angulus ille quadrans, triens &c. sed cujus? num quadrans anguli? quadrans circuli? quadrans perimetri? Nullo modo. Quid igitur? num quadrans, triens &c. quatuor rectorum? Hoc, credo, est quod velis, (quoniam hoc dicendum erat;) at verò, cum hoc non dixeris, quis quæso vel Sphinx vel Oedipus id tuis verbis conciperet? Quin apage hæc d. liria! & in posterum vel taceas, vel ita loquere ut quis intelligat. Nemo enim mortalium, qui aliunde non didicerit anguli quantitatem æstimare, poterit ex istâ definitione quicquam persentiscere. Non patitur mihi crede, (nec tu impunè feres,) in

in definitionibus suis Geometria, tam supinam oscitantiam, tam non ferendam negligentiam. Discas velim deinceps vel à definiendo abstinere, vel accuratiùs definire. Ecquis enim verbis tuis, *Quantitas anguli est circumferentia circuli determinata per rationem ejus ad totam perimetrum*, hoc satis significatum putet, *Anguli cujusvis (rectilinei) eam esse rationem, ad quatuor rectos*; quæ est circumferentiæ circuli (puncto angulari ut centro descripti) anguli cruribus interceptæ, ad totam perimetrum? Hoc autem dici oportuit, dum illud dictum est. Tu autem, dum anguli quantitatem circumferentiâ determinas; neque circuli ducendi centrum indicas, neque circumferentiæ terminos, neque etiam quid illud sit, ad quod angulus eam habiturus est rationem, quam habet illa circumferentia ad integram perimetrum. Hoc est, anguli quantitatem determinaturus, nihil determinas.

Similem habemus deinceps oscitantiam, Art. 18. de angulo solido. Quam hic innuisse sufficiet.

Possem etiam & hic notare, Angulos omnes & curvilineos & mistos, secundum te, esse invicem æquales. Nam & horum angulorum quantitatem etiam circumferentiâ æstimandam dicis, non in qualibet, sed in minima à centro seu concursu distantia: Cum autem distantia minima alia non sit quam ipsum concursus punctum, uti tu fateris, circumferentia illa anguli quantitatem determinatura (in quocunque angulo rectilineo vel curvilineo vel misto) erit unicum punctum: quod certè vel nullam, vel eandem omnibus determinabit magnitudinem.

Art. 12. Dum rejectâ Euclidis parallelarum definitione, ejus loco hanc tuam substituis, *Parallelae sunt in quas duæ lineæ rectæ ubicunque incidentes, facientesq; cum utraque ipsarum angulos æquales, sunt inter se æquales*: Si concedatur vera esse, tamen 1. est hoc criterion à natura parallelismi valde remotum, adeoq; ipsius naturæ explicandæ valde incommodum. 2. dum hoc criterio parallelismum definias, hanc duram in te suscipis provinciam ut ubicûq; probaturus sis duas lineas esse parallelas, oporteat te hoc medio id probare, nempe quod inter illas, non modò duæ aliquæ, sed duæ quælibet, sic ductæ, sint æquales; quod ipso parallelismo multò erit difficilius probatu, quodque tu nec facere soles nec aggredi: adeoque nusquam probas, etiam cum probare velles, duas aliquas lineas esse parallelas, nempe tales esse parallelas quales tu definis. Et quidè, ne longiùs eamus, vel in ipsa proxima, quâ in hoc ipso articulo aggredieris, demonstratione, dum per hanc defini-

definitionem probaturus es (in fig. 3.) rectas BA , CD , esse parallelas, id tantum assumis, quod duæ aliquæ (quod etiam non raro accidit ubi parallelismus non^{est}) sic positæ, nempe AC , BD , sint æquales; (quod cuilibet eam demonstrationem, satis putidam, examinare, deprehendet;) cum id oportuit de duabus quibuscvis (pariter inclinatis) non de duabus aliquibus, ostendisse. Adeoque illa demonstratio (neque tamen hoc solo vulnere, sed & aliis) claudicat.

Quod ex hac definitione statim infer: *Duas rectas, in duas alias rectas, sed parallelas, incidentes, intercipientesq; in utraque partes æquales, ipsas quoque esse æquales & parallelas*: Fallum est. Nam, verbi gratiâ, Rhomboidis cujuslibet duæ diagonales lineæ (puta in fig. 3. AD , CB .) intercipiunt in parallelis lateribus æquales rectas, neque tamen sunt ipsæ vel æquales invicem vel parallelæ, ut notum est.

Demonstratio tua tam putida est ut pigeat eam referre. Quoniam verò tu illud fortasse non credes, nisi ostendero: ego id laboris suscipiam, (tui gratia) modò ne id etiam in posterum toties quoties postulaveris (hoc enim infiniti esset laboris, cum tu toties pecces.) Si AB , CD , incident in parallelas AC , BD , sintq; AC , BD , æquales; erunt (inquis) AB , CD , æquales & parallelæ. Nempe sic affirmat hæc tua propositio; videamus quâ tu demonstras. Ductis enim perpendicularibus BE , DF , erunt anguli EBD , FDH , recti æquales; quare cum EF , BD , sint parallelæ, erunt BE , DF , æquales. (Atque hætenus rectè quidem: sed nihil ad rhombum; nam hæc æqualitas rectarum BE , DF , nullius est usus in tua demonstratione.) Iam si recta DC rectæ BA non sit æqualis; ducatur à puncto D (ad ipsum AC , nam hoc addendum erat,) quæcunque alia quæ ipsi BA æqualis sit, (quod fieri posse oportuit te ostendisse. Sed esto; fieri enim potest quamvis tu id non ostenderis;) ea verò non cadet in punctum C , cadat ergo in G , major ergo vel minor est AG quam ED . (esto utrumvis.) non ergo intercipiuntur parallelæ æquales, quod erat suppositum. (Imò verò, interceptæ AC , BD , (quod erat suppositum) æquales esse possunt; ut ut non interceptæ AG , BD , quod erat probandum. Adeoque demonstratio tua hoc pede claudicat; nempe dixti non est quod erat suppositum, cum dixisses, non est quod erat probandum.) Sunt ergo, inquis, AB , CD , æquales. quod est (*ἀντιθέσει*) primum. (Nempe, quia AB , GD , æquales esse non possunt, nonne? At, inquam, tu has æquales esse non posse nondum probasti: nam eò tua demonstratio non pertingit. Imò verò, mihi crede, non minus GD quam CD ipsi AB æqualis erit, non obstante ræ-

demonstratione, si sumatur angulus $F D G$ angulus $F D C$ æqualis, ut ut $A G, B D$, æquales non sint. Adeoque & hic iterum claudicat demonstratio. Sed esto. Sunt, licet tu hoc non probaveris, rectæ $A B, C D$, æquales. Quid postea? *Et faciunt per art. 11. angulos cum perpendicularibus $E B, D F$, æquales.* (Ego nil tale reperio in isto articulo. Sed esto tamen. Quid porro?) *quare angulus $C D H$ æqualis est angulo $A B D$.* (Non sequitur. Nam & angulus $G D F$, non minus quam $C D F$ æqualis sumi potest angulo $A B E$; non tamen inde sequitur angulum $G D H$ æqualem esse angulo $A B D$; aut $D G$ ipsi $A B$ parallelam: quod tamen non minus concluditur quam quod tu probatum is. Iam igitur tertio saltem claudicat demonstratio. Verum esto; concedamus tibi & hoc, ne simus difficiles, etiam angulos $A B D, C D H$, æquales esse; quod tamen tu non probasti: Quid porro?) *Et per aliam, inquis, parallelarum definitionem, $B A, C D$, parallela, quod est ($\alpha\lambda\lambda\alpha\omega\delta\epsilon\iota\kappa\tau\omicron\nu$) secundum.* Imò verò, mi Hobbi, (quod tuum est durum fatum ut & quarto pede claudices;) neque hoc sequitur. Et quamvis ea tibi demus omnia quæ tu te prius ostendisse putas, non tamen inde concluditur per tuam definitionem parallelismus rectarum $A B, C D$. Nam 1. perpende quæso, quid est quod tu hic quasi probatum sumis; nempe æqualitas angulorum $A B D, C D H$, interni & oppositi externi. At verò tu non parallelismum definis per æqualitatem anguli interni & oppositi externi; sed per aliud symptoma ab hoc satis diversum; nempe in quas duæ rectæ ubicunq; incidentes facientesq; cum utraque ipsarum angulos æquales, sunt inter se æquales. Non igitur per hanc definitionem sequitur ille parallelismus. 2. Si autem per illam definitionem probare velles parallelismum rectarum $A B, C D$, ostendisses potius rectas, $A C, B D$, & æquales esse (quod supponitur) & eisdem angulos ad $C D$ facere, vel saltem ad $A B$; (quod tu ne aggredieris quidem:) Si enim probasses angulos quos facit $A C$ ad $D C$ in puncto C , & quos ad eundem facit $B D$ in puncto D , invicem æquales esse; ostendisses saltem duas aliquas rectas $A C, B D$, in expositas $A B, C D$, incidentes, angulosque ad harum alteram puta $C D$ æquales facientes, esse & inter se æquales, (hoc enim supponitur.) 3. Sed & adhuc claudicaret demonstratio; non sufficit enim de duabus aliquibus, sed & de duabus quibuscunq; (sic incidentibus) id accidere; nam de duabus rectis ubicunq; incidentibus procedit definitio. Et ne putes hunc scrupulum nihili esse, ostendam tibi reliqua omnia incidere posse ubi parallelismus non est. Exempli gratia: Si à primo puncto Tauri in Zodiaco ad primum Arietis quod

est

est in *Æquinoctiali* ducatur recta; aliæque à primo puncto *Virginis*, ad primum *Libræ*; hæ duæ rectæ *Zodiaco* & *Æquinoctiali* terminatæ, facient ad *Æquinoctialem*, eosdem angulos, & sunt invicem æquales: itaque, si id sufficeret, *Æquinoctialis* & *Zodiacus* circuli essent paralleli. Atque eodem argumento probari posset circulos in sphaera quosvis parallelos esse. Adeoque hoc quarto etiam pede miserè claudicat nec unico vulnere demonstratio tua. Tu verò dic tandem, quod te putemus animal qui saltem quarto pede claudicas?

Revera, ut semel saltem cespites non mirum erat, sed expectandum planè, cum falsam propositionem (quæ tua tamen culpa est, quis enim iussit ut tu id faceres?) tu demonstrandam suscepisses: ut verò tu toties atque tam turpiter titubes, ferendum non est. Dicam tamen quod res est. Tu non semel, sed sæpius idem facis. At interim, quæso te, ne tu id oneris mihi suscipiendum imponas, ut ego te toties in singulis retexendis per lutum & vepreta sequar; sufficiat, obsecro, illud saltem aliquando facere, alibi autem digito monstrare, quo ab amicorum tuorum aliquo id petas auxilii, ut ubi erratum sit distinctè monstrent.

Articulo. 13. *Circulorum*, inquis, *perimetri*: sunt inter se ut eorundem *semidiametri*. Atque hoc rectè quidem. Est enim hæc vera propositio, atque omnibus nota. Verùm videamus quæ tu eam demonstres. Sint, inquis, (in fig. 1.) duo circuli quicunq; *BCD* major, *EFG* minor, habentes centrum commune *A*; (At verò circuli quicunq; non habebunt centrum commune, sed solum concentrici: tu autem non de his solum, sed & quibuscvis propositionem affirmas. Sed esto. Videamus quæ sequuntur.) eorum *semidiametri* sint *AC*, *AE*. Dico, quam rationem habet *perimeter BCD* ad *perimetrum EFG*, eandem habere *CA* ad *AE*. (Rectè quidem hoc dicis; videamus an & rectè demonstres.) Nam, inquis, *magnitudo semidiametrorum CA, AE*, determinatur à distantiiis punctorum *C* & *E* à centro *A*; (Esto.) quæ distantie acquiruntur motu uniformi puncti ab *A* ad *C*, ita ut æqualibus temporibus distantie acquisite sint æquales. (Fortasse sic, fortasse non. Potest enim eadem distantia etiam motu difformi acquiri, aut etiam motu ab alio quovis puncto non minus quam ab ipso *A*. Dic enim; undecunq; veniat punctum *C*, & quocunq; motu, annon dum hic est, tantūdem distabit ab *A*, ac si ab ipso *A* veniret, & quidem motu uniformi? quid igitur necesse erit ut hoc motu uniformi acquiratur? Sed esto. Fiat hoc motu uniformi. Quid interim hoc ad rhombum? Num ratio perimetri ad semidiametrum de-


pendet

pendet ab uniformi semidiametri generatione? Annon eadem erit perimetrorum & semidiametrorum analogia quocunque motu hæc acquirantur distantia? vel etiam si ne motu quidem *acquiri*, sed simpliciter *esse*, supponantur? Quorsum igitur hæc importuna interpellatio de motu, & tempore, & uniformi velocitate, & diametrorum generatione, quæ ad rem nihil faciunt? Nam hoc motu ne hilum promoves. Sed esto utcunque, videbitur fortasse deinceps quo hæc spectant: At quid interim?) Sed & perimetri BCD , EFG , determinantur ab iisdem distantis punctorum C & E ab eodem centro A . (Omnino. Nam in datâ à centro distantia non potest perimenter vel major esse vel minor, sed determinatæ erit magnitudinis. Sed quid tum?) Habent igitur, inquis, tam perimetri BCD , EFG , quam semidiametri CA , AE , eandem causam suas magnitudines determinantem; (nempe distantias perimetrorum à centro, vel si vis, motus uniformes quibus hæc distantia acquiruntur,) eamq; talem quæ temporibus æqualibus æqualia faciat spacia; (nempe propter motus quam supponis uniformitatem; quæ siue sit, siue non sit, nihil refert; nam diametri generatio supponenda est jam perfecta, quocunque modo fiat, priusquam incipiat circulatio: secus enim non circulus sed spiralis describeretur. Assignas igitur non causam pro causâ. Sed esto. Quid tum?) Sunt itaque per cap. 13. art. 6. *circulorum*, inquis, *perimetri & semidiametri proportionales*, quod erat probandum. Ego hanc consequentiam nego, ut quæ est falsissima. At inquis, vera est per cap. 13. art. 6. Verum ego de isthoc articulo nihil sum sollicitus: tuâ refert non meâ prospicere, num articulus ille falsus sit, an tu inde hoc falsò deducas. Consequentiam interim illam falsissimam esse, vel inde liquet, quòd eodem argumento sequeretur etiam circulos & sphaeras semidiametris suis proportionales esse. Nam eadem distantia perimetri à centro, eodem si placet uniformi motu acquisita, quæ magnitudinem semidiametri determinat, determinat etiam magnitudinem non modò perimetri, sed & circuli eadem semidiametro descripti, vel etiam sphaeræ; (ut quæ in datâ perimetri distantia determinatam habent magnitudinem;) & propterea, per tuum argumentum, non modo perimetri, sed & circuli, atque etiam sphaeræ, suis diametris erunt proportionales. Quod si tu absurdum esse non putes, consulas amicos qui te rectius instituant. Videmus igitur, non modo ubi tu falsa suscipis demonstranda, (ut in articulo præcedente,) sed etiam dum quæ vera sunt atque omnibus nota demonstrare conaris, pariter hallucinaris. Ut autem in plano cespiter caballus, minùs est ferendum.

Art. 14. Quamvis propositio vera sit, atque omnibus nota: tua tamen demonstratio est mera petitio principii. Quod qui volet illam retexere facile perspiciet. Nempe tu gratis assumis, vel rectas (in tua fig. 6.) FG , DE , BC , rectis AF , AD , AB , proportionales, in eadem recta AC terminari; vel rectas easdem FG , DE , BC , ad rectam AC terminatas, esse ipsis AF , AD , AB , proportionales; vel, si dicas te horum utrumque in constructione supponere, tum supponi s quod erat probandum. Hoc tibi amici tui, si consulas, exponent: mihi singula retexere non vacat. Tu interim dum motum (qui ad rem non facit) introducis, tuoque te motu confundis & perplexum reddis, movendo nihil promotes, ne hilum quidem.

Art. 15. Ut ipsam propositionem omittam, (quæ eò rectius procedit quo minus de motu habet) ipsius Corollarium tertium est planè falsum. Atque id ipsum alterius deinceps erroris fundamentum erat, quam habes *cap. 16. Art. 20.* ob quem, vel à te deprehensum vel ab amicis indicatum, totum illum articulum, ejusque capitis figuram 12, delere visum est. Causa lapsus (quam forte tu nondum animadvertis,) hæc est: Quod tu in propositione ostenderas (in tua fig. 7.) de angulo BDE vel ipsius residuo HDE , id statim in Corollario assumis de angulo CDE ; satis oscitanter. Quod qui demonstrationem tuam perpendit facile perspiciat. Nobis innuisse sufficiat: non vacat enim singulis immorari: adeo enim in singulis fere articulis falsus es, ut infiniti esset laboris omnia notare.

Artic. 16. Controversiam illam attingis de angulo contactus, inter Clavium & Peletarium olim agitatam (quam & ego ante aliquot annos peculiari tractatu discutiendam suscepi, & veritatem ex Peletarii partibus stare, luculentis demonstrationi-



bus in publicis nostris prælectionibus ostendi, quas & typis deinceps commisi: Verū tu eam ita determinas ut nec eorum alterutri, neq; tibi ipsi satis assentiaris. Nempe si duos circulos inæquales, puta DA , EA , eadem contingat re-

cta PA , in eodem puncto A ; Angulos contactus affirmas (cum Clavio contra Peletarium) inæquales esse; at angulos semicirculorum (cum Peletario contra Clavium) affirmas invicem æquales esse, & utrumque angulo recto rectilineo. Quam bellè autem hæc inter se conveniunt, qui non delirat prorsus, facile judicabit. Nempe si ab eodem PAC , auferantur inæquales PAD , PAE , restabunt (secundum te) DAC , EAC , tam inter se, quam toti PAC æquales.

De art. 18. Vide quæ dicta sunt ad art. 9. eorum enim pars magna & hic locum habet. Ad Euclidem autem quod attinet, si illum satis intellexisses hunc illi sensum non affixisses. Dum enim ille angulum solidum pluribus sive lineis rectis sive angulis planis contineri affirmat; non horum aggregatum intelligit, ut tu putas, sed id quod hiæce continetur: sicut cum angulū planum definit esse duarum linearum inclinationem; non intelligit illarum aggregatum, sed id quod inter illas interjacet.

Art. 19. Omnis inquis, duarum linearum respectus, sive positionis varietas contineri videtur (euge illud, Videtur!) quatuor generibus: nam duæ lineæ quælibet aut parallelæ sunt; aut angulum (si opus est, productæ) faciunt; aut contingunt se invicem (modo satis sint magnæ,) aut denique Asymptotæ sunt. Quid autem per lineam alteri Asymptotam intelligis, deinceps exponis; nempe (non quæcunque ipsi non concurrat; nam sic & Parallelæ essent Asymptotæ, & ex quatuor illis generibus alterum esset eliminandum: sed) quæ propius ad eam semper accedens nunquā tamen attinget, scilicet, quantumcunque utraque producat. (Vide autem annon hoc addendum sit, ita ut tandem earum distantia evadat omni assignandā minor, illud enim apud alios Asymptotæ vox innuit: an autem Asymptota tua limitationem illam ferat necne, penes te arbitrium esto.) At verò, mi Hobbi, tuum Videtur quod sic, solvitur per videtur quod non. Sunt enim altæ linearum positiones quæ ad nullum ex his quatuor generibus reduci possunt. Videtur ergo (imò certum est) non omnem duarum linearum positionis varietatem tuis quatuor generibus contineri. Nam 1. Quid tibi videtur de duabus rectis, quæ in diversis planis ita positæ sunt, ut nec sint parallelæ nec ad planorum illorum communem sectionem in eodem aliquo puncto pertingunt? (tales enim duci posse, credo, non negabis.) Parallelæ non sunt, ex hypothesi: nec in angulū coibunt, nec etiam se mutuò contingent, nam &, ex hypothesi, ad nullū utriq; plano commune punctū utraq; pertingit: sed neq; sunt Asymptotæ, quamvis enim certum sit nunquā coituras, non tamen (quod, etiam te definiente, ad Asymptotam requiritur

titur) perpetuò proprius accedunt; sed ubi ad maximam appropinquationem perveniatur, incipiunt protinus elongari. 2. Imo verò quid tibi videbitur de duobus circulis se mutuò secantibus, quorum tamen perimetri nec se mutuò secant nec quidem contingunt? Supponamus, verbi gratia, duos æquales circulos sibi invicem rectos quorum unius centrum sit in alterius peripheriâ; (hoc enim fieri posse ne dubites.) Num parallelæ erunt hæ perimetri? num se mutuò contingunt? num in angulum coibunt? nullo modo: imò nec erunt *Asymptotæ*; nam utur nunquam sint coituræ, ita nec invicem proprius accedunt, nam omnia utriusvis peripheriæ puncta æqualem habent distantiam à reliquæ puncto sibi proximo, quod nempe sui centrum est. 3. Etiam in eodem plano; quid tibi videbitur de duorum ejusdē plani peripheriis quæ nec cōcentricæ sunt, nec tamē uspiā se mutuo vel tangūt vel secant? 4. Quid item de peripheria circuli quantumvis magni & rectā infinitā extra illam positā? 5. Quid item de aliis rectis innumeris (præter duas illas, *Asymptotas* vulgò dictas,) quæ ad Hyperbolam quantumvis magnam in eodem plano positam nunquam pertingent? (tales enim sunt, mihi crede, non paucæ.) 6. Quid denique (ne nimius sim) de oppositis Hyperbolis quantumvis magnis, mi Hobbi, dicendum videbitur? Dic sodes, ad quodnam ex tuis illis quatuor generibus referendas putas has omnes (aliásque innumeras) linearum positiones. Non dices, credo, de lineis tantum in eodem plano intelligendum esse: nam neque tu ita limitas, neque, si limitāsses, hoc nodum solveras: neque de solis rectis te verba facere, tum enim quorsum ulla de *Contingentibus* & *Asymptotis* mentio? Neque dices, puto, *Asymptotian* tuam de omnibus intelligendam esse utcunque positis quæ non coeunt: nam (ut de parallelis nihil dicam, quæ hoc sensu erunt *Asymptotæ*: aut etiam teipsum *Asymptotas* aliter definire,) cur non, si illud velles, ad duo potius genera revocāsti. Sunt enim duæ quævis lineæ, hoc sensu, vel *συμπίπτουσι*, vel *ἀσύμπτωτοι*; *concurrentes* puta, vel *non concurrentes*, ut quatuor generibus non sit opus. Fatere igitur (quod res est) te in distributionibus tuis non minùs fuisse supinè negligentem quam supra in definitionibus & demonstrationibus te ostendimus, & deinceps sumus ostensuri.

Sunt autem & alia quamplurima etiam in hoc capite meritò castiganda, nisi ego iam ferè defessus ad sequentia festinem. Talia sunt quæ tu habes art. 21. *De punctis similiter positis*, quæ admodum inconcinnè & confusè tradita sunt. Item quæ de

Figura

Figura tradis art. 22. Nam (præterquam quòd hac voce jam multoties in præcedentibus usus es, priusquam illam jam tandem definias,) per eam quam tu hic habes figuræ definitionem ejusq; explicationem, dicendum erit *Sphæram* (integram intellige, à centro ad superficiem usque plenam) & *Orbem* (intellige sphæram introrsum excavatam) eandem omnino figuram esse, & de aliis similiter. Item dum & hîc, & supra cap. 9. art. 2. *Similia* definias *quæ solâ magnitudine differunt*: Cum tamen figuræ similes aliquando ne quidem magnitudine, aliquando etiam & situ, differant: ut notum est. Sed & dum *figuras similes similiter positas esse* definias, *cùm utriusq; rectæ homologæ sunt parallelae*: satis tu hoc ineptè facis, (sed tuo more,) sic enim figuræ similes, erecta & inversa, essent similiter positæ; quod, præter te, nemo diceret.

Sed ad eam festino partem quam tu *Geometriam* appellas, ad quam tamen & ex præcedentibus multa viam faciunt: quò igitur aliquoties erat respiciendum, partim quod eò me aliquoties remissum, partim etiam capitum titulis vocatum viderim. Unde tamen hinc inde aliqua tantum decerpsi, omissis iis quæ ad Physicam potius seu Metaphysicam speculationem quam ad Mathematicam spectarent. Cum enim Geometrica solum impræsentiarum examinanda susceperim, in reliquâ interim Philosophiâ impunè per me licebit (saltem impræsentiarum) quantum liber ineptire. Sed & in sequentibus item, non Physica tantum sed & Mathematica non pauca intacta sum præteriturus. Nempe nonnulla vera atque ab aliis recepta, (non enim quæ tu hîc habes sunt omnia nova magis quam omnia sana; quæ autem ab aliis accepisti sunt ut plurimum vera, nisi cum quæ ab aliis vera acceperas tu malè recitando depraves:) alia, utut perperam tradita, non tanti tamen videantur momenti ut illis immorandum censeam: alia denique sunt quæ *defendit numerus junctoq; umbone phalanges*: quæ nempe præ ipsa multitudine necesse habeo ut dimittam; (est enim ubi multitudo delinquentium vel tollit delictum vel saltem postulat impunitatem:) Nam & hic, ut apud Poetam,

Sunt bona quedam, sunt mediocria, sunt mala plura.

In CAP. 15.

Atque his quidem de causis, quod sequitur Caput 15, dimitendum censeo. Nam postquam *Leſiorem* (uti ais) *admonendum esse censeas* (quod & ego item monerem) ut *Euclidis*,

D 3

Archime-

Archimedis, Apollonii, aliorumque tum antiquorum tum recentiorum scripta rejectis tuis) in manus sumat: quæ sequuntur omnia sunt potius Physica quam Mathematica, adeoque non nostræ considerationis. Talia tamen sunt eorum non pauca quæ censuram mereantur.

Exempli gratia, cum Art. 1. num 6. *Motum* tu vis esse *mensuram temporis* (contra quam alii quibus *Tempus* est *mensura motus*.) At interim (contra quam tu hic tradis) & motum ipsum ejusque affectiones tempore mensurare soles: puta, Dum motum reputas vel tardiolem vel velociorem, prout ad datum spacium absolvendum plus minusve temporis absolvit; non autem tempus velocius aut tardius prout longiori aut breviori motui commensuratur; adeoque tempus ut stata aliqua & certa mensura spectatur, & velocitatis gradus respectu ad tempus habito æstimantur. Item dum motus eos æquabiles vel uniformes judicas quæ temporibus sunt proportionales, qui autem sunt in temporum ratione duplicata, triplicata, &c, eos acceleratos vocas; cum è contrà tempora potius retardata diceres, si motus mensura esset & tempus mensuratum.

Item Art. 2. ubi *Punctum* haberi vis non pro indivisibili, sed pro indiviso; Neq; nullam habere quantitatem. Sed eam quam habet non considerari. Quasi verò præter lineæ cujusvis duos semisses (quos alii putant toti æquales esse) punctum medium utrosque copulans suam habeat magnitudinem; adeoque tota duobus simul semissibus revera minor sit, (tanto quantum est punctum medium,) quamvis ea minoritas non consideretur: Siquis autem, id quod est, esse supponat; tum totum duobus semissibus æquale non erit. Cui consonum est quod mox sequitur, *Punctum puncto majus esse.* &c

Sic Art. 7. *Motum omnem vel conatum, siue fortis sit siue debilis, in infinitum propagari; neq; tantum ad distantiam quantumvis, sed etiam in tempore quantulocunque, id est, in instanti.* Quasi quidē ad quemlibet vel cicadæ vel pulicis saltum propagetur motus, eodem instanti, ad ultimos Indos, imò (siqua tibi adhibenda est fides) ad coelum ipsum stellatum atque ulterius in infinitum.

Et art. 8. *Quod (pari magnitudine) majore velocitate impingit in mobile, majorem ipsi imprimit motum; & quod (pari velocitate) majore mole &c.* Quasi verò in motu imprimendo major habenda esset ratio Molis, quam Ponderis; vel quidem istius solum, hujus non omnino.

Verum hæc aliaque his similia, cum Physica sint, adeoque ad præsentem disquisitionem non spectent, ego omittenda censui. At interim si tua quam statim admittendam velles

Physiologia

Physiologiae principia his nitantur fundamentis, meru-
ne Physiologia sit Mathesi tuâ non multò sanior.

In CAP. XVI.

CApit 16. totum versatur in re Geometricâ: sed & totum ferè
falsum est, nam (exceptis ad summum articulis tribus) ex
omnibus hisce 20 articulis ne unus quidem sanus est.

Art. 1. *Velocitas*, inquis, *cujuscunq; corporis per aliquod tempus
moti tanta est quantum est quod fit ex impetu (quem habet in puncto
temporis) ducto in tempus ipsius motûs.* At, quæso, in quo puncto
temporis? num in omnibus? Non omnino. (nam *impetus om-
nium est ipsa velocitas*, uti mox subjungis: non igitur impetus
omnium in tempus ductum; (Num igitur in uno aliquo? Omni-
no At verò in quonam? (nam in motu saltem inæquabili non
est in singulis temporis punctis idem impetus) num in quovis?
Non credo: nam sic nihil de velocitate certum statueretur,
cum impetus in motu inæquabili in singulis momentis varietur.
(Quod autem tu de motu inæquabili non minus quam æquabili
verba facias, certissimum est, per reliqua quæ in hoc eodem
articulo occurrunt.) Quem igitur vis impetum? (ut tandem
sciamus cujus momenti impetus sit qui in tempus ductus deter-
minet velocitatem,) num maximum? vel minimum? Neque
hunc neque illum: num, ergo intermedium aliquem impetum?
Ita quidem: sed quem horum? Tu verò dum nullum assignas,
neque velocitatem (quam determinatum ibas) omnino determi-
nas. Adeoq; tu, definiendo, nihil definis. Dixisses potius (nam
hoc, credo, est quod velis,) *quod fit ex tempore in impetum respecti-
vè ducto*; nempe (non quidem totum tempus in totum impetum
sed) quælibet temporis particula in suum respectivè impetum
ducenda supponitur. Et sic deinceps aliquoties.

In Corollario hæc habes; *Si impetus ubique idem sit, & suma-
tur recta quælibet (rectè quidem, potest enim quælibet assumi;
at hujus tu postea oblitus es,) pro mensura temporis, impetus ad
illam rectam ordinatim applicati* (at qui quæso potest impetus or-
dinatim applicari ad rectam? putâstem ego potius lineas ad li-
neam, non impetus ad lineam, esse ordinatim-appl.andas. Di-
xisses ergo; & *sumantur aliæ rectæ impetibus proportionales,
hæ rectæ ad illam ordinatim-applicatæ*) designabunt parallelo-
grammum, quod repræsentabit velocitatem totius motûs. Esto.
Sin impetus à quiete incipiens crescat uniformiter (non
ergo de solo æquabili motu agitur,) id est, in eadem

semper ratione cum temporibus consumptis; tota velocitas motus erit representata per triangulum cujus unum latus est totum tempus alterum Impetus maximus eo tempore acquisitus, tertium verò quodnam?) vel etiam per parallelogrammum cujus unum latus est totum tempus lationis, alterum verò impetus maximi dimidium; (lineas intelligis quæ tempus totum & quæ impetus maximi dimidium repræsentant:) vel deniq; per parallelogrammum cujus unum latus est medium proportionale inter impetum maximum & impetus maximi semissem, reliquum verò quodnam? (nullum enim assignas,) num tempus integrum? vel aliud quid? Si illud, falsum est; siquid aliud, cur non assignas? Putan' tu Parallelogrammum satis designatum esse cujus unicum latus assignatur, angulus autem ne unus? At quid porro? Nam, inquis, hæc duo parallelogramma & inter se, & triangulo sunt æqualia (nullâ interim angulorum ratione habita) ut in elementis Geometriæ est demonstratum. Quin dic obsecro, quænam sunt illa Geometriæ elementa, quæ Trianguli cujus duo tantum dantur latera, angulus nullus; & Parallelogrammum cujus vel unicum vel etiam duo dantur latera, angulus autem ne unus; vel æqualitatem vel etiam inæqualitatem demonstrabunt?

Art. 2. Fu omni, inquis, motu uniformi, (dic potius, in omnibus motibus uniformibus, non enim de singularibus sigillatim, sed de motibus simul pluribus invicem comparatis, agitur.) longitudines transcurse sunt inter se, ut factum ab impetu in tempus unius, ad factum ex impetu in tempus alterius. Imo, inquam, ut tempus unius ad tempus alterius, si vel de ejusdem motus uniformis partibus agatur, vel etiam de pluribus motibus eodem impetu; Quorsum igitur de ductu temporis unius in suum impetum, & alterius in suum, importuna mentio? Si autem de diversis motibus, impetu non eodem, agatur; vera quidem est propositio (quod tu fortasse nesciebas) sed non procedit tua demonstratio; nam tu statim jubes ut utriusque impetus lineis invicem æqualibus designetur, & tota deinceps demonstratio supponit eosdem utriusque motus impetus. Adeoque propositionem quæ & universaliter proposita erat, (& quidem universaliter vera, licet tu hoc fortasse ne cogitaveris quidem,) tu non nisi in uno casu demonstras, nempe ubi utriusque est idem impetus. Adeoque etiam cum tu in demonstratione assumis, quod impetus supponatur ubiq; idem, procedis ex falsis suppositis; utut enim demonstratio tua hoc supponat (adeoque mendosa sit,) propositio tamen non supponit.

*Verum ego tibi aperiam, mi Hobbi, magnum mysterium:
Nempe*

Nempe fieri potest ut duo motus sint in se singuli uniformes, (hoc est, absolvunt spacia temporibus proportionalia,) nec tamen invicem æque celeres. Exempli gratiâ, Fingamus Sphæram super polis Æquatoris quotidie circumvolvi æquabili motu; primum punctum Arietis in Æquatore, & primum punctum Cancris in Tropico, eodem tempore, motu utrumque uniformi, absolverent inæquales circulos, adeoque non eâdem celeritate, sive (ut tu loqueris) eodem impetu ferentur. At, inquires, quis hoc nescit? aut quis adeo insanus est, ut putet omnes motus in se uniformes, esse invicem æque celeres? Imò, inquam tu id nescis, aut saltem putandus esse nescire, (ita enim tu aliquando loqueris ac si nescias, licet alibi aliter;) eaque quanta quanta est insania tibi imputanda est. Nam non hic modo, sed & alibi passim per hoc caput, tu supponis, quod, Dato, quòd spacia motu aliquo transcurra sint in temporum ratione vel eâdem, vel duplicatâ, vel triplicatâ, &c, datur etiam celeritas sive impetus. Quod quidem eòsque verum est ut te tandem non pudeat problematicè proponere, (eò enim spectant art. 13. &c.) Dato, quod motus acceleretur in temporis ratione (verbi gratia) duplicatâ, triplicatâ, &c, quæritur quantum spacium in dato tempore absolvatur? quasi quidem datâ ratione accelerationis, daretur etiam celeritas; vel data duarum quantitatum ad invicem ratione, daretur earum magnitudo. Sed de his deinceps videbitur. Interim quid porro hic habetur?

Cor. *Quoniâ motu uniformi* (eodẽ intellige, vel saltem æquè celeri) *longitudines percurse sunt, propter æquales impetus, ut ipsa tempora; erit quoque permutando, ut Tempus ad Longitudinem, ita Tempus ad Longitudinem.* At vero, mi Hobbi, (quod tu miraberis,) ego hoc nego. Nõ enim, si sit, ut tẽpus ad tempus, sic lõginitudo ad longitudinem, erit propterea, ut tempus ad longitudinem sic tempus ad longitudinem. At, inquires, annon quæ sunt proportionalia eadem & permutando erunt proportionalia? Erunt, inquam, dummodo sint quantitates homogeneæ, non autem si heterogeneæ, Adeoque temporis ad tempus ratio esse potest, atque etiam longitudinis ad longitudinem, (quæ quidem rationes vel eadem esse possunt vel diversæ,) quippe tempora temporibus, ut & longitudines longitudinibus, sunt Homogeneæ; Sed temporis ad longitudinem nulla potest esse ratio, quippe quæ sunt Heterogeneæ. (Qua de re vide, si liber, Clavium ad 16 e 15 Euclidis.) Vel dic tandem, si possis quam habeat rationem una hora temporis, ad duas ulnas longitudinis? est quidem numerorum adjunctorum, puta 1 ad 2, aliqua ratio; at temporis ad longitudinem

tudinem, nempe horæ ad ulnam, nulla est. Et quamvis tam ratio temporis ad tempus lineis designari possit, quam etiam longitudinis ad longitudinem lineis aliis ab illis non dependentibus, (nam & hæ & illæ ad libitum assumuntur) quia nempe ratio rationi sive in lineis sive in temporibus est quid homogeneum; non tamen, quia bis binæ lineæ proportionales, sunt & permutando proportionales, ideo & in binis longitudinibus binisque temporibus id obtinebit, quoniam illæ quatuor quantitates sunt homogeneæ, hæ autem non item. Dixisse quidem posses, *Ut recta arbitraria qua designatur tempus unius ad rectam arbitrariam qua designatur longitudo ejus, sic recta qua designatur tempus alterius ad rectam qua ipsius longitudo designatur.* Atque hoc sensu verum est. Sed neque de rebus tantum, sed etiam de numeris, aut aliis quibusvis quantitatibus homogeneis quibus duæ istæ rationes designantur. Verum hunc tandem articulum dimittamus; est enim (ut non admodum sanus, tamen) è sanioribus unus. Qui sequuntur enim, de motu accelerato, sunt multo magis vitiosi. Et quamvis articuli 3, 4, 5. nihil determinatiùs proponant, quam quod *longitudines percursæ sint factis ex impetu in tempus* (intellige, respectivè) *duo proportionales*; si ve longitudines determinandas esse ex tempore simul cum impetute comparatis, (quod quidem verum esse nemo nescit,) tamen ubi computando aliquid determinatum tandem statuis miserè vacillant tam propositiones ipsæ quam demonstrationes.

Art. 3. Agis de motu uniformiter à quiete accelerato, hoc est, ubi impetus continuo crescunt in ratione temporum. Hunc motum tu repræsentatum vis per triangulum (quod vis,) cujus nempe latitudo à puncto verticis continuè crescit in ratione altitudinis, ut nempe illa impetum hæc tempus exhibeat, area vero id quod ex utroque fit, quam tu appellas velocitatem, eique proportionalem esse vis longitudinem percursam. Atque hætenus quidem non malè. Putà, sit tempus aliquod designatum recta arbitraria (licet enim quam velis assignes) AB, impetus autem continuè crescentes designentur totidem rectis parallelis triangulum complentes quarum maxima (item arbitraria) putà BI maximum impetum eo tempore acquisitum designans sit trianguli basis, angulum ABI (item arbitrarium) faciens. Ut igitur singula puncta rectæ AB singula puncta temporis designant quorum primum A, ita & singulæ parallelæ rectæ iis adjacentes (latitudinem trianguli eo loci metientes rationibus suis ad invicem ostendent rationem quam ad invicem habent impetus in designatis temporis momentis. Dico, *quam habent impetus ad invicem*, sed non item quam habent impetus ad tempora, (uti tu somnias,) quippe ad tempora rationem nullam habent,

cum sint quantitates heterogeneæ; & quamvis verbi gratia recta AB quâ tempus designatur rationem habeat ad rectam BI quâ designatur longitudo, tamen cum tam hæc quam illa sumatur arbitraria, nulla inde ratio determinatur. Et sicut, verbi gratia, in rectis AF, AB, earum longitudinis nulla habetur consideratio (quæ ad libitum assignari poterit major vel minor) sed tantum rationis ad invicem; ita nec rectarum BI, FK; & quanquam harum ratio ex earum ratione determinetur, non tamen harum longitudo à longitudine illarum: Sed & triangulorum AFK, ABI, ratio ad invicem determinatur, vel ab ipsis AF, AB, vel ab ipsis FK, BI; eorū tamen positiva magnitudo neq; ab his, neque ab illis, neque ab utroque simul determinatur, quoniam & angulus ABI ponitur arbitrarius. Hæc autē fusiùs explicanda erant, ut constet quid determinatum sit, quid non sit; quoniam tu passim horum ignorance in turpissimos errores laberis.

Iam verò, quod tu contendis, longitudinē huiusmodi accelerato motu percursum tempore AF, ad percursum tempore AB, esse ut triangulum AFK ad triangulum ABI, adeoque (propter similia triangula) in duplicata ratione temporū AF, AB: verū quidē est dūmodo de uno eodēque motu agatur plus minùsve continuato uti tu jam loqui videris (ais enim, *in motu*, non *in motibus*) & utroque à puncto quietis inchoato. At de duobus duorum mobilium motibus (quò tu hoc deinceps pertrahis, adeoque & hic universaliter de *motibus*, non tantum de *motu*, intelligendus es) non semper verum erit; neque etiam de eodem motu, nisi utrobique tempus inchoetur à puncto quietis.) Nam 1. Fieri potest (licet tu de hoc ne quidem cogitasse videaris) ut quem impetum acquirit unum mobile, uniformiter acceleratum, in toto tempore AB, eundem acquirat aliud mobile, uniformiter item acceleratum, in temporis istius parte AF; adeoque si prioris (uti tu loqueris) velocitas (ex ratione temporis & ratione impetūs composita) repræsentetur triangulo ABI posterioris velocitas repræsentanda erit (non triangulo simili AFK, sed) triangulo dissimili AFH. Quo casu, triangulorum ABI, AFH, ratio ad invicem, non erit duplicata rationis temporū AI, AF; sed quæ componitur ex ratione temporum AI, AF, & impetuum BI, FH. 2. In uno eodēque motu; si motus uniformiter acceleratus à puncto quietis A per temporis spatium AF, continuetur ulterius per spatium FB: neq; spacia percursum tempore AF, FB, neq; etiā triangulū AFK & trapeziū FKIB, erūt in duplicata ratione temporū, ut patet.

Id igitur, *In motu uniformiter accelerato longitudines percursum esse in ratione temporū duplicatā*, admitti non poterit, nisi cum his limitationibus. 1. ut de uno eodemque motu intelligatur

plus minusve continuato; vel saltem si de pluribus, oportet ut sint non modo singuli uniformiter accelerati, sed & æque celeres, hoc est, quæ in æqualibus à principio motûs temporibus æquales acquirunt impetus;) nisi etiam velis ut omnia omnino triangula (sive similia sive dissimilia) sint in suarum altitudinum ratione duplicata. 2. Ut utraque tempora initium sumant ab eodem quietis momento. Tu verò dum has omittis limitationes, & contra, supponere videris, Motûs accelerationem uniformem, certam aliquam celeritatem determinare; & similiter longitudinem percursorum incrementum juxta temporum rationem duplicatam, certam aliquam determinare longitudinem; in turpissimos te errores præcipitas, uti ex sequentibus posthac videbitur.

In art. 4. ubi agitur de motu ita accelerato ut impetus continuò crescant in ratione temporum consumptorum duplicatâ; turpius adhuc lapsus es. Nam præterquam quod duas illas limitationes omiseras (quibus hic non minus quam in art. præced. opus est:) Mirum est quâ tu cæcutias. Nempe sic procedis. Sit (in fig. 2.) tempus AB , in cujus initio A , impetus sit ut ipsum punctum A , sed continuò crescat in ratione temporum duplicatâ donec in temporis puncto B , acquisitus sit impetus BI : ordinatim applicetur impetus eo tempore acquisitus FK nempe in temporum, hoc est, diametrorum ratione duplicata. Quid inde? Quoniam ergo FK ad BI supponitur habere rationem duplicatam ejus quam habet AF ad AB , habebit AF ad AB rationem subduplicatam ejus quam habet FK ad BI . Rectè, nempe si ordinatim applicatæ sint in duplicata ratione diametrorum, erunt diametri in subduplicata ratione ordinatim applicatarum. Quid porro? & AB ad AF duplicatam ejus quam habet BI ad FK (nullo modo non enim si ratio rationis subduplicata sit, conversa conversæ duplicata erit, sed item subduplicata;) Et proinde, inquis, erit punctum K in linea Parabolica cujus diameter est AB & Basis BI . Et proinde, inquam ego, tu falleris. Non enim erit punctum K in ea linea parabolica quam tu describis. In qua vero futura sit linea discas, si placet, ex nostra *Arithmetica Infinitorum* prop. 23. nempe pro tua semiparabola, construenda erat semiparabolæ complementum: adeoque punctum K esset quidem in parabolicâ, sed eâ cujus diameter sit AC & basis IC , quam igitur tangat in vertice recta AB .

Ut autem tu statim videas quam bellè demonstraveris; supponamus diametrum AB in puncto F bisectam; sintque ordinatim applicatæ FK , BI , (in diametrorum ratione duplicatâ) 1 & 4, (nempe ut quadrata numerorum 1, 2.) supponamus
item

item eidem AB ordinatim-applicari FN, BI, in eadem cum diametris ratione, quæ propterea sunt 2 & 4 (cum sit AF, semissis AB;) adeoque puncta ANI in eadem erunt recta triangulum ABI complente. Manifestum est item rectam FK = 1, minorem esse, quam est recta FN = 2. Adeoque punctum K est intra triangulum ABI; non extra, uti tu affirmas.

Absurda igitur est tua demonstratio, quæ huc perducit; & quidem (si penitiùs inspicias) planè ridicula. Nam, 1, supponis Parabolæ ordinatim applicatas FK, BI, esse in duplicatâ ratione diametrorum AF, AB, (satis absurde) atque has in illarum ratione subduplicatas; (cujus contrarium verum est.) 2. quasi nondum videaris satis insanus; mox etiam (virtute Hoci Poci) easdem diametros statuis (non amplius in subduplicata, sed jam) in duplicatâ ratione earundem ordinatim-applicatarum. Nempe eadem ad easdem sunt in ratione tam duplicatâ quam subduplicatâ. Annon hæc, mi Hobbi, bellè conveniunt? Quin, 3, non contentus es, hæc contradictoria simul affirmare, nisi & alterum ex altero inferas; nempe quoniam supponuntur ordinatim-applicatæ FK, BI, esse in duplicatâ ratione diametrorum AF, AB, hinc inferas easdem diametros esse in duplicata ratione ordinatim-applicatarum. (Quam bellè!) nempe eadem consequentiâ ac si concluderes, quoniam duo sunt, ex hypothesi, plura quam tria, hinc sequitur tria esse plura quam duo: vel etiam, quoniam ex hypothesi Henricus octavus posterior est Henrico septimo, hinc sequitur Henricum septimum posteriorem esse Henrico octavo. nempe per logicam Hobbianam. 4. Item, per Hobbianam Geometriam, Si ratio rationis sit duplicata, conversa conversæ erit subduplicata. Sic enim arguis, Quoniâ ratio AF ad AB est subduplicata rationis FK ad BI, erit AB ad AF duplicata rationis BI ad FK. 5. denique (quod omnium est absurdissimum) Hobbius hic noster, qui intra quatuor linearum spacium hæc omnia habet deliramenta, egregium se reputat Geometram.

Sed & simul ruunt ea omnia quæ hinc dependent. Fallum est quod tu statim inferas, nempe quod Impetus (continuo crescens in duplicatâ ratione temporum) ductus in totum tempus, erit parabola, (quia scilicet, in Hobbianâ Geometriâ, ordinatim-applicatæ in Parabolâ, sunt in duplicatâ ratione diametrorum; quod probaturus es ad Græcas calendas.) Falsum item est. Eidem aquari parallelogrammum quod contineat duas tertias parallelogrammi BC, Falsum item est Velocitatem temporis AF æquari duabus tertiis parallelogrammi FL. Falsum est denique (quippe eodem principio nixum) longitudinem percursum tempore AF, ad longitudi-

nem

nem percursum tempore AB , esse ut parabolam AKF ad parabolam $AKIB$. Adeoque & tota hujus articuli materia, falsa est. Quid autem horum loco substituendum sit colligere possis ex prop. 23. nostræ *Arithmetice infinitorum*. Ea nempe illic universaliter traduntur quæ huic negotio facile poterunt accommodari.

Sed & idem error perrepat omnia Corollaria. Nempe

In Corollario primo, Falsum est Parabolam ABI ad Parabolam AFK esse in triplicata ratione diametrorum AB ad AF .

Corollarium secundum, si de Parabola intelligatur, falsum est; Non enim abscissæ parabolæ portiones æque-altæ deinceps ab initio sumptæ eas habent rationes ad invicem quas tu assignas nempe ut 1, 7, 19, 36, (lege 37) &c.

Corollarium item tertium planè falsum est, sive de motu uniformiter accelerato intelligatur, prout se verba habent, (& quidem plane contrarium Corol. 3. art. præced.) Sive etiam de motu bis accelerato, vel in duplicata ratione temporis, quod fortasse ad tuam mentem dicendum esset.

Quid autem horum omnium loco reponendum sit, discas licet ex prop. 23, 69, 71, nostræ *Arithmet. Infinitorum*. Ea enim illic universaliter traduntur quæ huic negotio facile accommodari possunt.

Artic. 5. est ejusdem planè farraginis cum præcedente 4. ubi eandem tradis methodum computandi velocitates, & longitudes percurfas, ubi impetus crescunt in ratione temporum triplicatâ, quadruplicatâ, &c.

Nempe, Falsum est ubi impetus crescunt in ratione temporum triplicatâ, totam velocitatem designari per parabolastrum primum; Et quidem si hoc verum esset, falsum esset longitudes percurfas esse in ratione temporum quadruplicatâ. Item falsum est, ubi impetus crescunt in ratione temporum quadruplicatâ, velocitatem designari per parabolastrum secundum: Et quidem si verum esset hoc, falsum esset illud, longitudes percurfas esse in ratione temporum quintuplicatâ. Et sic in cæteris. Nam parabolastrorum eorum longe alia est ratio, quam tu hic assignas. Nempe si parabolastri tui eadem sunt atque paraboloides nostræ, ordinatim-applicatas habebunt in ratione, non triplicata, quadruplicata &c, sed subtriplicatâ, subquadruplicatâ, &c. Diametrorum. Neque habebunt eorum portiones eas ad invicem rationes quas tu hic assignas.

Quid autem horum loco reponendum sit, facile depromi poterit ex nostræ *Arithmet. Infinitorum*. prop. 44, 54, 64, & alibi.

Adeoque tota hæc doctrina de velocitate motuum quorum impetus

petus continuè crescunt in ratione temporum duplicatâ, triplicatâ, quadruplicatâ, &c. est planè putida & nihil habet sani, nisi cū fortuitò contingat (quod, fateor, aliquando fit) geminatos errores se mutuò perimere, ut veritas quasi ex postliminio restituatur.

Quin, mi Hobbi, quid tu tandem ad hæc? Annon hæc tua est pulchra Geometria? atque admodum bella? Num erubescis? an irasceris? an eousque impatiens veri ut ne hæc quidem legere sustineas? Mirabere forsan ipse quomodo huc dementiæ perveneris, & tam fædè lapsus sis. Vin' igitur dicam? (fortasse se enim ipse nondum animadvertis.) Dicam igitur, (modo ne nimium irascare.) Nempe *nesciebas, quid erat ratio subduplicata, subtriplicata, &c.* (quod & prius monuimus ad cap. 13. art. 16.) Atque hoc est illud *ὑπερβαίνειν* unde hæc *ὑπερβαίνειν* ortum habent. Putabas fortasse (pro acumine tuo) quòd, sicut conversa rationis duplæ est ratio subdupla, ita & conversa rationis duplicatæ esset ratio subduplicata. Verùm (si non pigeat tandem discere, quod fortasse melius est quam adhuc ignorare) ego id tibi paucis exponam. Ratio rationis duplicata ea est quæ componitur ex eadem ratione bis positâ, (triplicata ter, quadruplicata quater, &c.) puta duplum dupli, triplum tripli, quadruplum quadrupli, &c, item subduplum subdupli, seu semissis dimidium, & subtriplum subtripli, seu trientis triens, &c; sunt dupli, tripli, quadrupli, subdupli, subtripli, &c, rationes duplicatæ; hæc autem illarum subduplicatæ.) & universim $\frac{a}{b} \times \frac{a}{b} = \frac{aa}{bb}$ est rationis $\frac{a}{b}$ duplicata, & hæc illius subduplicata: rationis autem $\frac{a}{b}$ ratio subduplicata est $\sqrt{\frac{a}{b}}$ vel $\sqrt[2]{\frac{a}{b}}$ quæ et rationis $\frac{aa}{bb}$ est subquadruplicata. Cum autem tu sic ar-

guis; quia ratio *AF* ad *AB* est subduplicata rationis *FK* ad *BI* (quæ propterea eadem est atque *AFq* ad *ABq*) ergo *AB* ad *AF* (prioris conversa) est duplicata rationis *BI* ad *FK* (hoc est rationis *ABq* ad *AFq*,) nempe conversæ posterioris: omnino hallucinaris. Absurdius enim est quam quod à viro Mathematico prodire debeat.

Articuli 6 & 7 sani sunt (ut & pars aliqua art. 1 & 2. unde hi dependent,) at earum demonstrationem majore longè quam opus erat apparatu aggredieris. Quod autem & hic & illic traditur, paucis accipe (non enim profundæ admodum sunt hæc speculationes, sed satis notæ,) ut videas quantò te simul & lectorem tuum onere levâsses si accuratius rem tradidisses. Si (verbi gratia) Equus unus æquabili impetu a in

in tempore t , percurrat longitudinem l ; atque equus alius æquabiliter impetu a , tempore τ , percurrat longitudinem λ : Erit, per Auream Regulam (quam vocant) Compositam;

$a \propto t$. $l \propto a \propto \tau$. $\lambda = \frac{a\tau}{a}$ Quod tu tradis art. 1 & 2.

Ideoq. 1. $\lambda \propto at$. hoc est $\frac{l}{\lambda} = \frac{a\tau}{a} = \frac{a}{a} \propto \frac{t}{\tau}$ Quod tu tradis artic. 6.

Itaque & $\frac{a}{a} \propto \frac{l}{\lambda} \left(\frac{t}{\tau} \right)$ vel $\frac{l}{\lambda} \propto \frac{a}{a} = \frac{t}{\tau}$ et $\frac{l}{\lambda} \propto \frac{\tau}{t} = \frac{a}{a}$ quæ tu tradis art. 7.

(Si quando verò contigerit vel t , τ , vel a , a , vel l , λ , esse æqualia; quid hoc casu fiet in singulis analogiis, nemo est qui nescit; nempe ratio æqualitatis in rationum compositione nihil mutat, magis quam unitas in multiplicatione ordinariâ.) Adeoque totum illud quod tu magno articulorum, corollariorum, figurarum, demonstrationum, &c, apparatu contendis, in articulis 1, 2, 6, 7, pag. 127, 128, 132, 133, 134, paucioribus lineis absolvi potuisset quam tu impendis paginas.

Articulus item octavus sanus est, (ut & aliqua pars art. 3. unde dependet?) Reliqui autem qui sequuntur sunt vitiosi omnes & putidi admodum. Et si quando aliquid subest veri, id tamen omne ita falsis immiscetur, ut ægre quis agnoscat; & non nisi duorum pluriumve errorum collisionibus, casu emicat planè fortuito, & ex aliis planè dependet principiis quam unde tu collectum is.

Art. 9. Si mobile feratur à duobus simul moventibus in dato quolibet angulo concurrentibus, quorum alterum movetur uniformiter, alterum motu à quiete uniformiter accelerato, donec impetum acquisiverit acceleratione impetui motus uniformis æqualem; linea in qua feretur mobile erit, inquis, linea curva semiparabolæ, cujus basis est impetus ultimò acquisitus: altitudo verè quanta? quæ diameter? quæ diametri ad ordinatim-applicatas inclinatio? Næ, tu lepidus es Geometra, mi Hobbi, qui censes parabolam satis determinatam esse ex datâ solâ basi. Sed porro, quid sibi hoc vult, cujus basis est impetus ultimò acquisitus? putan' tu impetum esse posse basin semiparabolæ? Semiparabolæ basis est recta linea, non impetus. At, inquires, potest impetus lineâ rectâ representari. Potest quidem: nempe ratio impetus ad impetum designari potest per rationem rectæ ad rectam; sed & potest item representari

sentari non minus per rationem ponderis ad pondus, aut etiam quarumlibet quantitatuum invicem homogenearum; an igitur tu dictu commodum putes, parabolæ alicujus basin esse *centipondium*? Deinde, potest, inquis, impetus quilibet designari lineâ rectâ. Potest quidem: sed rectâ quâlibet. (nam te penes erit, quâ tu voles rectâ quemlibet impetum designare, cum rei natura non hanc magis poscat quam aliam.) Annon tu tandem vides Semiparabolæ tuæ ne quidem basin determinari? Vel etiam num tu putas, lapidem cadentem, duobus his tuis motibus latum, descripturum semiparabolam illam, quæ basin habeat eam rectam quâ quisque velit ipsius impetum designare? Apage has quisquilias! Dic potius rotundè, (nihil enim determinatius habent tua verba) *eam describet parabolam quam quisque volet.* Quod credat interim quicumque vult.

Fortasse autem tu putabas (quod tamen nemo sanus putaverit) te aliquod determinatum assignavisse, dum & *terminum celeritatis* assignaveris (eum nempe impetum quo reliquum movens fertur toto lationis tempore) & *modum accelerationis* (ut nempe sit in ratione temporum) quasi inde de totâ *celeritate* constare possit; (nempe tale quid te somniâsse monuimus ad art. 2. quod & hic & deinceps sæpenumerò confirmatum videtur.) Sed omnino frustra es. Tantundem enim est, ac si putes, datâ trianguli basi, & dato quòd parallelæ crescant uniformiter, putâ in ratione distantiarum à vertice; de toto triangulo constaret, ipsumque satis determinatum esset.

Cum autem in propositione nihil determinatum sit, videamus nunquid ex schemate colligere liceat. *Supponis* (in fig. 5.) *rectam AB moveri* (sinistrorsum) *ad CD motu uniformi*; & *rectam AC eodem tempore* (deorsum) *ad BD motu uniformiter accelerato, donec impetum* (sive celeritatem) *acquirit ipsius AB*; (adeoque in singulis temporis momentis, excepto ultimo, tardius moveatur necesse est AC quam AB, cum ad ipsius AB celeritatem, ante ultimum temporis momentum, AC non attigerit.) At interim AC (tardius movens) ferè duplum itineris deorsum absolvit, istius quod AB (movens celerius) absolvit eodem tempore sinistrorsum; (Nempe Semiparabolæ tuæ altitudo est latitudinis ferè dupla:) quasi vero summa numerorum 1, 4, 9, 16, &c, fere duplo major esset quam summa totidem maximorum æqualium. Dic autem, mi Hobbi, si illud non sit *ψευδολογία*, ecquod est? Multò quidem fecisses consultius si Parabolæ altitudinem tantam fecisses quanta est AC, & latitudinem quanta est CD, (quidlibet enim fecisse posses, cum nihil habeas determinatum,

determinatum, uti jam ostendimus,) ut non primus saltem schematis intuitus te erroris argueret.

Quod autem ad demonstrationem attinet: tu statim erras in limine. Vis rectam BD esse impetum ex crescentibus maximum, eademq; basin Parabolæ. At verò si velis BD esse impetum illum maximum, ordinatim-applicanda erat non ad rectam AB, sed ad rectam AC. Cum enim facias rectam AC, tam viam motus uniformis, quam mensuram temporis; ad illam essent ordinatim-ponendæ rectæ quæ crescentes impetus exhiberent, qui propterea non in triangulo ADB, sed ADC, exhibendi erant. Eundem igitur errorem tu hic committis, atque prius in art. 4. & 5. Nempe rectas crescentis impetus designatrices tu ad parabolæ diametrum ordinatim-applicas, quæ ad ipsius tangentem ordinatim-applicandæ fuerant. Deinde, patet quidem rectam BD esse semiparabolæ basin, (jubes enim ut ea basi fiat semiparabola) sed qui patet illam esse vel impetum maximum motus crescentis, vel, si fit, æqualem hunc esse impetui motus æquabilis. Tandem, si demus motu uniformi sinistrorsum & accelerato deorsum describi parabolam AGD. (quod quidē verū ~~est~~ est.) Non tamen erit BD, sed DC, crescentium impetus maximus qui etiam non æqualis erit impetui motus uniformis, sed ipso multò major.

Possem etiam & illud notare: propositionem indefinite procedere, de duobus moventibus quibulvis; At tu statim in exordio duas exhibes lineas rectas AB, AC. At verò quid si illa duo moventia non sint vel lineæ rectæ vel etiam rectis terminata? quid, inquam, fiet de mobili tuo in hoc casu? (nam & alia certè possunt & movere & moveri, tuaq; propositio de hoc nihil determinat.) Dic mihi, annon de toto tuo processu actum erit? Sed hunc articulum jam satis vexavimus; videamus sequentem.

Artic. 10. Si mobile feratur à duobus simul moventibus, in dato quolibet angulo concurrentibus, quorum alterum movetur uniformiter, alterum à quiete, donec impetum acqviserit impetui motus uniformis æqualem, ita acceleratur, ut ratio longitudinum percursorum sit rationis temporum triplicata; linea qua fertur mobile erit curva semiparabolaster ex mediis duabus primi, cujus basis est impetus ultimò acqvisitus, altitudo verò quanta? quæ diameter? quanta inclinatio? (Non quæro, quid sit tuus ille Semiparabolaster, quem tamen nondum definisti, utut deinceps fortasse aliquando sis definiturus.) Repete tantum & hic ea omnia quæ de præcedenti articulo dicta sunt; atque hunc item articulum satis habebimus vexatum.

Art. 11. Eadem, inquis, methodo ostendi potest, (repete igitur & idem responsum. Sed quid ostendi potest?) quæ linea sit quam percurrat

percurrat mobile actum à duobus moventibus per concursum quibuscunque, (an &, quâcunque figurâ?) quorum quidem unum moveatur uniformiter, alterum acceleratè, sed secundum rationes spatio- rum & temporum numeris explicabiles, (verùm, si tu hoc magnum esse putes, ego tibi tantundem ostendam etiam ubi rationes spatio- rum & temporum non sunt numeris explicabiles; nempe id ex prop. 64. nostræ Arithmeticæ Infinitorum deduci poterit:) quales sunt rationes duplicata, triplicata, & sic deinceps, vel quales sunt quæ quocunque numero fracto designari possunt. Videamus igitur. Regula, inquis, est hujusmodi. Numeri duo longitudinis & temporis simul addantur. horum summa sit fractionis denominator, cujus numerator sit numerus longitudinis. Fractionem hanc quare in tabella &c.

Quam accuratè hæc dicta sunt, ego impræsentiarum non perpendam. Proponam tantum exemplum; Moventium alterum sit uniforme, alterum spacia absolvat in subduplicatâ ratione temporum: Dic ergo, si poteris, ex tabella tua, quæ linea describetur. Nempe sunt spatia ad tempora (ut tu loqueris) in ratione $\frac{1}{2}$ ad 1, si- ve 1 ad 2. Jubes igitur ut fiat fractio cujus denominator est summa ex 1 & 2, numerator 1. Est igitur fractio illa $\frac{1}{3}$. Benè est.

Quid porro? Adi, inquis, tabellam & invenies — Quid inveniam? non fractionem illam $\frac{1}{3}$ uspiam in tabellâ, nec aliam illi similem. Non ergo dicet vel isthæc Tabella tua, vel hæc tua Regula, quæ linea motu proposito describetur. Verum si tu illud aveas cognoscere, discas licet & hæc & his majora ex prop. 23, & 64. nostræ Arithmet. Infin. Saltem si tu id valeas inde colligere: non enim totidem verbis illic habetur.

Art. 12. miserè falsus est. Si motus, inquis, fiat per concursum moventis uniformiter, & moventis motu utcunque accelerato, movens uniformiter minùs promovebit mobile in singulis spatijs parallelis, quam si uterque motus esset uniformis: & eo minùs quo motus magis est acceleratus. Quod quam falsum sit, tu iudex esto. Nam (in fig. 5.) recta AND describetur motu composito ex duobus uniformiter moventibus, & parabolica AGD describetur motu composito ex duobus moventibus, altero uniformiter moto, altero accelerato; (quorum tu neutrum negabis, nam & vera sunt, & tu item affirmas art. 8, 9. licèt id haud satis intellexeris, aut etiam rectè tradideris:) At intra easdem parallelas AC, EF, magis promovetur mobile motu hoc quam illo, (contra quam tu affirmas:) major enim est recta EG, quàm EN. Falsum igitur est quod tu asseris.

Si tamen non tam recta AN , quam recta AF , intelligatur mobile illud priori motu latum, (utrâvis enim ferri poterit motu ex duobus uniformibus composito,) tum quidem fuisset EF major quam EG , (uti vult tua propositio,) sed neque semper, neque necessario hoc continget, nam secus contingere posse jam ostendimus. Jam vero hujusmodi duobus motibus compositis si satis continuentur, nempe donec se intersecuerint, (puta, ultra punctum D , ubi AGD & AND se mutuò secant;) à principio ad punctum illud intersectionis minus promovetur mobile motu ab uniformibus composito, at post illud punctum magis promovebitur. Contrarium vero accideret, si pro figura ADB convexâ, descriptam putamus concavam (puncto G existente inter E & N ,) nam & ejusmodi curva poterit describi motu aliquo composito ex uniformi & accelerato, (quod demonstratu facile esset, si quis dubitaverit.) Vides igitur quam nihil possit universaliter determinari ubi tu tam audacter pronunciaveris. Demonstrationis tuæ errorem, ex jam dictis quilibet animadvertat. Vide tu interim annon & hic id tibi fraudi fuerit quod putaveris ex dato accelerationis modo dari etiam celeritatem. Nam nisi tu putaveris (verbi gratia) omnes motus uniformes, esse & æque celeres, (uti supra monuimus ad art. 2.) quæ quæso, fieri possit, te adeo cæcum esse ut non videas, ubicunque curvæ AG punctum G inciderit, duci posse rectam ab A quæ vel ad N vel ad F pertingat, vel aliud quodvis punctum ultra vel citra punctum G ; quæ tamen recta motu ex duobus uniformibus (eorum ad invicem celeritate ritè temperatâ) describi poterit? Sed & idem error in articulis sequentibus te magis adhuc exponet ludibrio.

Articulus 13. problema continet planè ridiculum. *Data, inquis, longitudine percursâ, dato tempore motu uniformi, longitudinem invenire quæ percurreretur eodem tempore motu uniformiter accelerato, id est, ita ut longitudines percursæ sint ubique in ratione temporum duplicata, & impetus ultimo acquisitus sit æqualis tempori.*

Est, inquam, hoc problema miserè ridiculum; idque non uno nomine. Nam

1. Quæ, quæso, fieri potest ut *impetus acquisitus tempori sit æqualis*? Potest quidem ratio impetûs ad impetum, & temporis ad tempus, tam inter se, quam rationi lineæ ad lineam æquales esse; (est enim ratio rationi, in quocunque tandem subjecto, quid homogeneum;) at quis unquam mortalium (ante te) vel impetû tempori, vel hoc illi, vel utrumvis lineæ, dixerit aut æqualem esse

esse aut inæqualem? Sunt enim hæc omnia planè heterogenea, adeoque nec ullius rationis, siue æqualitatis siue inæqualitatis, capacia: (quod, si advertisses, didicisse potuisses ex 3 d 5.) Quindic sodes, mi Hobbi, vidistin' tu unquam sonum qui fuit odoratior quam circulus? vel numerum binarium qui habeat plures angulos quam cogitatio? vel Ens-rationis cujus realis existentia sit plurium modiorum capax quam sonus crepitaculi? Vel deniq; annon vides heterogenea non sine summa absurditate posse invicem comparari, ut hoc illi vel æquale dicatur vel inæquale? Quorsû igitur tu impetû temporis æqualem somnias? aut quid sibi hæc volunt? Apage, quæso, has ineptias, & noli nimis esse ridiculus.

2. Sed & perpende, quæso, quale tu nobis exponis problema; *Datâ longitudine in dato tempore motu uniformi percursâ longitudinẽ invenire quæ percurreretur eodẽ tempore motu uniformiter accelerato.* Cur non & simul proponis, datâ quantitate quæ totis sui quatuor quadrantibus æquatur, aliam invenire quæ duobus sui æquetur semissibus? Annon enim vides hoc tuum problema plane nugatorium esse? & de qualibet longitudine responderi posse? Tanta, inquam, percurreretur longitudo quantam quisque volet. Potest enim, mihi crede, motu uniformiter accelerato (prout ejus major minorve fuerit celeritas) in quolibet tempore quælibet percurri longitudo. Nam, quicquid tu in contrarium somnias, (de quo sæpius monuimus,) motus uniformiter acceleratus, non magis determinatam celeritatem indicat, quam motus uniformis; potest nempe vel tardior esse vel celerior in quacunque ratione, & propterea in dato tempore quamcumque etiam percurrere longitudinem.

3. Si autem & illam adhuc clausulam adjunctam velis, *ita ut impetus acquisitus æqualis sit tempori,* (ut videre tandem aliquid determinatum quærere;) Annon vides hæc verba nullum habere sensum? cûm tempus & impetus (ut quæ heterogenea sunt) nullû habeât aut habere possint (uti jam dictû est) ad invicẽ rationem?

4. Sed esto. Supponantur hæc verba saltem aliquem habere sensum; & quidem quam proximè eum quem tu velles. Vileo enim quò tendis. Parabolam nempe vel Semiparabolam descriptam vis quæ datam habeat basin, ex dato impetu (uti tu supponis) determinandam, & quæris, quanta futura est ejus diameter, vel altitudo. (Hoc enim illud est quo tendit problema tuum.) At, inquam, tu hac limitatione ne hilum proficis. Licet enim parabolam in datâ basi construere cujuslibet altitudinis, quæque diametrum habeat quamlibet. Respondendum igitur & adhuc erit, tantam fore siue diametrum siue longitudinem quæsitam

quantam quisque volet: Adeoque problema tuum planè nugatorium esse, atque te dignum.

15. Sed & quod tu hic supponis est etiam falsum; nempe, ex dato impetu maximo determinari semiparabolæ basin. At verò si quid inde determinâsse velles, diametrum potius quam basin inde determinatam diceres; Non enim ad parabolæ diametrum sed ad contingentem erant ordinatim applicandæ quæ impetus crescentes designent; uti monuimus ad art. 9. qui huic affinis est. Cujus erroris originem eò retulimus (ad art. 4.) quòd nesciveris quid sit ratio subduplicata; adeoque Semi-parabolam substituísti, ubi ponendum erat ejusdem complementum.

Sed videamus tandem hujus belli problematis constructionem. Sit, inquis, (in fig. 8) *longitudo AB percursa motu uniformi, tempore AC, oportet longitudinem aliam invenire quæ percurratur motu uniformiter accelerato, eodem tempore, ita ut imperius ultimò acquisitus aequalis sit rectæ AC.* Bene est (ne iterum hæc verba vexemus.) Videamus ergo quí hoc fiat. Compleatur, inquis, parallelogrammum *ABDC*, (fiat,) & dividatur *BD* bifariam in *E*, (imò, inquam, dividatur utcumque, quorsum igitur bisectionem imperas? vel etiam ne dividatur omnino, nam cui bono?) & inter *BE*, *BD*, sumatur media proportionalis *BF*, (vel potius, sumatur ubicunque punctum *F*,) ductæque *EF* producatæ ad occursum *CD* productæ (vel etiam non productæ) in *G*. (vel potius, sumatur ubivis vel in rectâ *CD*, vel ejusdem continuatione, punctum *G*;) compleaturque parallelogrammum *ACGH* (vel potius sumatur utcumque *GH=AC*) Dico *AH* (addo vel quamvis aliam,) esse longitudinem quæsitam. Hactenus constructio problematis. Videamus jam (nisi hæc stomachum moveant) illius etiam demonstrationem. Fiat enim, inquis, ut ratio duplicata ad rationem simplicem, ita *AH* ad aliam *AI*, (quin siste paulum; quomodo, quæso, se habet ratio duplicata ad suam simplicem? num omnes eodem modo? videtur nobis quod non. Verbi gratia, ratio duplicata $\frac{4}{1} = \frac{2}{1} \times \frac{2}{1}$ est suæ simplicis $\frac{2}{1}$ dupla; ratio duplicata $\frac{9}{1} = \frac{3}{1}$ est suæ simplicis $\frac{3}{1}$ tripla; & similiter in aliis. Quid igitur sibi vult hoc, ut ratio duplicata ad rationem simplicem? non enim videtur quarumlibet duplicatarum ad suas simplices eandem esse rationem. Fortasse hoc vis, ut 2 ad 1, nonne? Benè est. Esto igitur ut 2 ad 1, ita *AH* ad *AI*. Seu potius, sumatur ubivis, sive in *AH* sive ejusdem continuatione punctum *I*.) eritque *AI*, semissis *AH*: ducaturque *IK* parallela rectæ *AC*, secans diagonalem *AD* in *K*, & rectam *AG* in *L*. Quoniam ergo *AI* est semissis *AH*, erit quoque

quoque IL semissis BD , id est æqualis BE , & IK æqualis BF . Cum enim BD (id est GH) BF , BE (id est IL) sint continue proportionales, erunt quoque AH , AB , AI , continue proportionales; sed ut AB ad AI , hoc est ut AH ad AB , ita BD ad IK , & ita etiam GH (id est BD) ad BF , sunt ergo BF , IK æquales. Jam ratio AH ad AI duplicata est rationis AB ad AI , hoc est rationis BD ad IK siue GH ad IK . (vel potius omittâ hâc longâ constructione, quæ nihil ad rhombum, dic breviter, Diametro AH quacunque & ordinatim applicatâ HG quæ æqualis sit ipsi AC , & inclinatione quâcunque, construatur Parabola AG , cujus punctum quodvis dicatur K .) erit ergo punctum K in Parabola cujus diameter est AH , basis autem GH æqualis AC . (omnino.) Quare mobile procedens à quiete in A , motu uniformiter accelerato tempore AC longitudine percursâ AH acquireret impetum GH æquale tempori AC &c. (nempe per art. 9. cujus anatomē supra vidimus, nec opus est ut hic repetamus.) Data ergo longitudine &c. quod erat propositum. Egregiam verò laudem! Qui aver ineptire strenuè, à te discat γεωμετρεῖν.

Art. 14. Datâ longitudine dato tempore motu uniformi percursâ, longitudinem invenire quæ percurreretur eodem tempore, motu ita accelerato, ut longitudines percursæ ubique sint in ratione temporum triplicatâ, utque impetus acquisitus æqualis sit dato tempori. Longitudo, inquam, quæ sita, tanta erit quantâ quisque volet. Repete igitur ea omnia quæ ad præcedentem articulum dicta sunt; & non opus erit ut his ulterius immoremur. Sed & constructio & demonstratio ejusdē farraginis atque in præcedente articulo. Dimittantur ergo.

Art. 15. Eâdē methode (eadē igitur & esto responsio,) si detur longitudo quælibet dato tempore uniformiter percursâ, inveniri potest longitudo eodem tempore percursâ motu accelerato secundum rationē longitudinum rationis temporum quadruplicatam, quintuplicatam, & sic deinceps in infinitum. Nempe tanta erit, quantam quisque volet.

Art. 16. Etiam si ratio longitudinū percursarū ad rationem temporū sit ut numerus quilibet ad numerum quēlibet, (quan ūlibet multiplicata, hoc enim vis, saltem juxta denominationem rationalem,) longitudo eo motu & tempore percursâ eâdē methode invenitur. Idem igitur reponatur responsum. Nempe, tanta erit quantâ quisque volet. Et tu interim Geometra, quam quisque volet ridiculus.

Quod si, inquis, ratio longitudinum rationis temporū fuisset ut 4 ad 3 (dic potius quadruplicatâ subtriplicatâ, nam hoc est quod vis.) sumendæ esset inter AH & AB duæ mediæ proportionales &c. (nempe ne tu secus non satis nugeris.) Modus autem medias quaslibet inter datas lineas interponendi nondum traditus est. (nec, credo opus erit ad hoc ut quantitas arbitrariè sumenda designetur.) Hoc tamen in universum pronunciari potest

potest &c. nempe, te magno conatu magnas nugas agere.

Priusquam autem hos articulos dimittam, jam tandem percipio quid illud est *ut impetus motu accelerato acquisitus æqualis sit dato tempori*; nempe ita te exponis in fine articuli 13. *impetum GH æqualem tempori AC, id est, impetum quo mobile percurreret tempore AC ipsam longitudinem AC.* Adeoque dum in omnibus his articulis 13, 14, 15, 16, 17, facis AH rectam percursum motu accelerato longiorem quam rectam AB eodem tempore percursum motu uniformi (cujus impetus sive celeritas tanta est per totum temporis decursum quantam motu accelerato non acquiritur ante ultimum temporis punctum!) quod suscipis probandum hoc est, motum acceleratum (qui tardior est,) plus spæcii eodem tempore absolvere, quam absolvit motus uniformis qui est celerior. Quod etiam prius notavimus ad art. 9, 10, 11. Et insequentibus item articulis 17, 18, 19. notandum erit. Ut autem rectius percipias quid velim, hoc accipe exemplum. Sit (in fig. 1.) movens aliquod uniformiter in tempore AB, impetu continuo AC vel BI, cujus igitur tota velocitas (ut tu loqueris) erit parallelogrammum ACIB, per art. 1. Aliud autem movens uniformiter acceleratum, eodem tempore AB acquirens eundem impetum BI, cujus igitur tota velocitas erit triangulum AIB, per eundem art. 1. Ut autem tota velocitas ad totam velocitatem, sic longitudo percursum ad longitudinem percursum; hoc est ut parallelogrammum ACIB ad triangulum AIB, sic longitudo percursum motu isto uniformi ad longitudinem percursum motu isto accelerato, per eund. art. 1. Sed longitudo percursum motu isto accelerato est major quam longitudo percursum motu isto uniformi, per art. 9 & 13, (nempe in fig. 5. AB major quam AC, & in fig. 8. AH major quam AB.) ergo triangulum AIB majus est quam parallelogrammum ACIB, pars toto; quod erat demonstrandum. (Et similiter concludi poterit ex prop. 10, 11, 14, 15, 16.) Adeoque dedocendus est Euclides, qui putaverit totum esse majus sui parte: Et tu solus audiendus qui contrarium toties demonstraveris & quidem primus.

Art. 17. *Si tempore dato mobile percurrat duas longitudes, alteram motu uniformi, alteram motu accelerato in quacunque ratione longitudinum ad tempora, & rursus in parte illius temporis iisdem motibus percurrat partes earundem longitudinum, erit (inquis) excessus longitudinis totius supra totam, in eadem ratione cum excessu partis supra partem.* Videamus autem quam verè hoc affirmaveris. Esto igitur, exempli gratia, (in fig. 1.) movens aliquod uniforme, tempore AB, impetu continuo AC

AC vel BI, ut tota velocitas sit ACIB; tempore autem eodem, motu uniformiter accelerato acquirat tandem impetum eundem BI, ut sit tota velocitas triangulum AIB; per *Art. 1.* Cum igitur longitudines percurſæ ſint velocitatibus illis proportionales, erit longitudo prima ad ſecundam ut parallelogrammum illud ad triangulum, hoc eſt ut 2 ad 1 adeoque ſi motu illo abſolvantur ulnæ 16, abſolventur hoc ulnæ 8: & differentia longitudinum $16 - 8 = 8$. Sumatur jam iſtius temporis ſemiſſis AF, quo partem iſtarum longitudinem abſolvat. Nempe motûs uniformis tota velocitas erit parallelogrammum AH, totius CB ſemiſſis, (cum enim baſes FH, BI, æquales ſint, erunt parallelogramma AH, CB, altitudinibus AF, AB, proportionalia:) Motûs verò accelerati tota velocitas erit triangulum AFK, totius ABI quadrans, (cum enim trianguſa AFK, ABI, ſint ſimilia, erunt in duplicatâ ratione homologorum laterum AF, AB, hoc eſt in duplicatâ ratione 1 ad 2, adeoque ut 1 ad 4:) Cum itaque longitudines percurſæ ſint velocitatibus proportionales, abſolvat motus uniformis in temporis dimidio ſemiſſem totius 16; & motus acceleratuſ quadrantem totius 8: hoc eſt abſolvat ille ulnas 8, hic ulnas 2: differentia igitur longitudinum $8 - 2 = 6$. Eſt autem, inquis, *exceſſus totius longitudinis ſupra totam*, (ad quid? ad ipſam totam, nonne? cur non igitur ſic dixti?) *in eadem ratione cum exceſſu partis ſupra partem* (ad partes illas reſpectivè ſumptas: hoc enim, ni fallor, ſupplendum eſt) Hoc eſt, ut $16 - 8$, ad 16; ſic $8 - 2$, ad 8; & ut $16 - 8$, ad 8; ſic $8 - 2$ ad 2: ſive ut 8 ad 16, ſic 6 ad 8; & ut 8 ad 8, ſic 6 ad 2: nam $16 - 8 = 8$ & $8 - 2 = 6$:) An non verò pulcherrimas tu has eſſe putas analogias? 8. 16:: 6. 8? & 8. 8:: 6. 2? At tuæ ſunt, quantumcunque pulchræ.

Fortaſſe autem hoc vis, (id enim *ἐνδεσις* tua videtur indicare, licet propoſitionis verba longe aliter ſonant;) *ut tota ad totam, ſic pars ad partem*; hoc eſt 16. 8:: 8. 2. quæ tamen analogia eſt reliquis nihilo melior. Vel denique (quod innuere videtur *συμπιπνομένη*) *ut tota, prima ad eius exceſſum ſupra ſuam partem, ſic tota ſecunda ad exceſſum huius ſupra ſuam partem*. adeoque 16. $16 - 8$:: 8. $8 - 2$. Hoc eſt 16. 8:: 8. 2. quæ cæteris ſimilis eſt analogia. Cui verò hæc ſtomachum non moveant, perpendat ſi lubet eam quam adjungis demonſtrationem; quæ tamen ita in ſingulis ſui membris putida eſt & ulceroſa, ut menda ipſius omnia ſigillatim perſequi, perinde eſt atque vomicam aperire, & ſat firmo opus eſt ut ſit ventriculo qui hæc tua carcinomata ſit ferendo.

Sit, inquis, exempli gratiâ, (in fig. 8.) longitudo AB percurſa tempore AC motu uniformi, & eodem tempore, AH (longitudo maior) percurſa motu (tardiori, nempe) ita uniformiter accelerato, ut ultimò acquiſitus impetus GH (quem igitur ordinatim applicâſſes ad rectam AC , non ad AH) æqualis AC , (iſti nempe quo movens uniformiter toto ſationis tempore ferri ſupponitur.) Sumatur autem in AH pars qualibet AI , quæ percurratur in parte temporis AC motu uniformi, (Eſto.) ſumatur & alia pars AB , quæ percurratur in eâdem temporis AC parte ſupple, motu uniformiter accelerato, (at hoc probandum potius erat quam ſumendum, nempe quo tempore motus uniformis abſolveret ſpacium AI , eodem motum hunc acceleratum abſolvere AB , non enim abſolveret quantumlibet.) Dico, eſſe ut AH ad AB (tota maior ad totam minorem longitudinem) ut AB (majoris partem) ad (minoris partem) AI . (nempe ſi tu aſſumpſeris, quod aſſumendum non erat, AB , partem majoris, eandemque minorem totam, eſſe mediam proportionalem inter totam majorem AH , & minoris partem AI . Sed videamus utcunque quomodo tu hoc demonſtres.) Ducatur, inquis, IK parallela AC ſecans AD in K . (At quænam illa AD ? nam de illius conſtructione nihil adhuc dictum. Dixiſſes igitur, compleatur parallelogrammum $ABDC$, cujus diagonalis ſit AD ; & tum tandem ducatur IK & compleaturque parallelogrammum $AIKM$: Diviſa autem IK biſariam in N , inter IN , IK , ſumatur media proportionalis IL : (eſto.) eritque ducta AL , in ipſâ rectâ AG . (At de puncto G , nihil haſtenus dictum, nedum de rectâ AG . Dixiſſes igitur prius, compleatur parallelogrammum $CAHG$, cujus diagonalis, ſit AG , & tum tandem, erit AL in ipſa AG . Sed quare?) Dividuntur enim IK , BF , (lege BD) in punctis E , F , & N , L , in eadem rationes (At verò de diviſione ipſius BD nihil dictum eſt, nedum de diviſione in eisdem rationes. Sed ſic, ſilibet, dividantur: quo facto, AL producta, pertinet ad punctum F . At hoc non probat eandem ad punctum G pertinere, vel ipſam AL in ipſa AG jacere. Dices fortasſe, ſupponitur punctum F eſſe in AG . Fortasſe quidem, ſed probandum erat hoc, non ſupponendum. Sed quid porro?) Quare producta AL ad occurſum MK producta, incidet in eam al punctum F . (At quomodo hoc conſtat? continget, fateor, ſi BF ſit ipſi IK vel AM æqualis, an autem ita ſit necne ex dictis neque conſtat neque conſtare poteſt: nihil enim adhuc dictum eſt quod eò ſpectat.) Et diviſâ AB biſariam in O , erit ut IK ad IN , ita AB ad AO . (Rectè, quia tam AB in O , quam IK in N biſecatur.) Quoniam ergo IL media eſt inter IK , IN , erit quoque AI media

media inter AB & AO ejus semissem; (nempe si IK , BF , sint æquales; quod tu quidem supra supponis, non autem probas.) Est autem AB media inter AH & ipsius semissem AI . (Quin siste, quæso; hoc illud ipsum est quod erat probandum; annon meministi *διόριστον* tuum hunc esse, Dico esse ut AH ad AB ita AB ad AI ? num igitur tu soles assumere id quod demonstrandum est, ut medium demonstrationis? Soles quidem, fateor; at non ita solent Geometræ. Si autem hoc gratis assumendum esset, cur non statim ab initio hoc fecisti? quid opus erat ea omnia interponere quæ post *διόριστον* hucusque habuimus? Deinde, quid hoc est, quod ais, inter AH & ipsius semissem AI ? Annon I est punctum in AH utcunque sumptum? dixti enim in *ἐκθέσει*, sumatur in AH pars quælibet AI ? quæ factum est ut quæ ab initio assumpta est pars quælibet, jam statim evadat determinate semissis? poteris quidem hoc pacto quidlibet probare.) Quare ut AH ad AB mediam inter AH & AI , ita est AB ad AI (omnino. Nempe si licet gratis assumere AH , AB , AI esse continuè proportionales, non dubium erit quin sit ut AH ad AB sic AB ad AI ; sed quid sequitur?) mediam inter AB , AO . (Siste, quæso, dixeras quidem, sed nondum probatum est, quod AI sit media proportionalis inter AB , & AO ; quia nec probatum est rectas IK , BF , æquales esse, unde hoc dependet; ut supra monui.) Et proinde ita excessus AH supra AB , (qui est BH .) ad BI excessum AB supra A , quod erat probandum. Imo, inquam. neque hoc sequitur: quamvis enim sequi videatur per divisionem rationis, si sit $AH, AB :: AB, AI$. tum $AH - AB, AB :: AB - AI, AI$, & permutando $AH - AB, AB - AI :: AB, AI :: AH, AB :: BH, BI$. Non tamen ullâ legitimâ consequentiâ hoc inferitur, sed propter meram amphiboliam termini AB quo aliquando innuitur tota longitudo minor, aliquando pars longitudinis majoris, quæ si quando forte fortuna æquales sint, non tamen id necessariò accidit, adeoque nec semper supponendum est. Adeoque cum id tibi demonstrandum susceperis, de majoris parte quælibet, & statim substituis eam tantum majoris partem quæ minori toti æqualis est, manifestè *παραλογίζεις*: nisi etiam simul supponas, quælibet majoris partem esse toti minori æqualem. Verum & aliud adhuc subest *σφαλματίσθον*. Nempe quam tu supponis esse longitudinem majorem, est quidem longitudo minor

minor; & nihil est quod suadeat, longitudinem AH tardiori motu percursam, majorem esse quam AB eodem tempore percursam motu celeriori, nisi quod tu *ψευδογραφίαν* commiseris, assignando punctum H inferius, quod supra punctum B assignandum erat. quam *ψευδογραφίαν* tuam si quis forte aliquando animadvertat, cogita tu tecum quid tandem de tuâ demonstratione factum erit.) Atque jam tandem per tesqua & salebras ad finem hujus demonstrationis pervenimus. In qua (si ego rectè numero) saltem quatuordecies, si non & pluries, *παρὰλογίζεις*, idque vel manifestâ petitione principii, vel saltem supponendo quod supponendum non erat. Quod quidem viro, qui sani sit cerebri, nisi id datâ operâ faciat, mirum est quâ illo modo possit contingere. Et nihil est quod hac me sublevet admiratione, nisi quod illud apud te videam toties obtingere: quod enim sæpe accidit, id pro miraculo habendum non est. Crede mihi si *D. Henricus Savilius* tua Geometrica legisset, nunquam illud de *Josepho Scaligero Elogium* (in suis ad Euclidem prælectionibus) pronunciasset, quod sit omnium mortalium, ne *Orontio* quidem excepto, ἀγεωμετρητότατος. Nempe, te laus illa maneret.

Art. 18. In quolibet parallelogrammo si duo latera angulum continentia eodem tempore moveantur ad latera sibi opposita; alterum quidem motu uniformi alterum motu uniformiter accelerato; latus quod movetur motu uniformi (vel etiam alterum) concursu suo per totam longitudinem, tantundem efficit, quantum efficeret si alter esset motus uniformis (vel etiam ne esset quidem.) Nempe utrumlibet latus dum ad latus sibi oppositum movetur, mobile secum eò transferre supponitur, sive alio motu aliquo transverso feratur, (in illa rectâ motâ,) sive non.

Atque hætenus quidem quæ hic habes eousque vera sunt, ut nemo unquam de iis dubitaret; nisi forte in tuam demonstratio. nem incideret. At quid porro? Longitudo verò eodem tempore percursa media proportionalis est inter totam & dimidiam. (Quem autem sensum hæc habent verba, ego me fateor assequi nondum posse: quippe, ni fallor, nullum habent. Quid autem tu dixisse voluisses, ex sequentibus fortasse melius videbimus.) Hæc tua propositio. Videmus quâ illius probationem aggrediaris.

Sit, inquis, (in fig. 11.) *Parallelogrammum ABDC*. Intelligatur autem latus AB moveri motu uniformi donec jaceat in CD : sitque tempus illius motus AC sive BD . Eodem etiam tempore intelligatur moveri AC motu uniformiter accelerato (sed qui impetum acceleratione acquisiverit majorem longè quam quo movetur AB uniformiter; secus enim eodem tem-

pore

pore neutiquam eo perveniet, quo tu velis,) donec jaceat in *BD*; deinde divisâ *AB* bifariam in *E*, (cui bono hoc sit, ego non video; sed utcunque, procedas,) sumatur inter *AB* & *AE* media proportionalis *AF*, (nempe ut habeatur media proportionalis inter totam & dimidiam; adeoque jam liquet quænam erant illa tota & dimidia de quibus in propositione sit mentio, quod prius ne hariolari quisquam potuerit; sed interim nihil minus rectè dictum fuisset, si dixisses sumatur *F* utcunque: neque reliqua minus procederent:) & ducta *FG* parallelâ ipsi *AC*, intelligatur idem latus *AC*, & eodem tempore moveri motu uniformi donec jaceat in *FG*. (Id enim fieri posse ne dubites; cum quocunque tempore potest quoviscunque ferri & quidem motu uniformi, prout ille celerior sit aut tardior, nec opus est ut tam curiosè situm rectæ *FG* designes. At interim, si tu supponas situm illum non fuisse arbitrarium, sed unum aliquem determinatum; oportuit demonstrâsse, non supposuisse, huc perventum fore & non ulterius.) Dico *AB* totam tantum conferre ad velocitatem mobilis positi in *A* quando motus *AC* est uniformiter acceleratus usque ad *BD*, quantum confert pars *AF* quando motus lateris *AC* est uniformis eodem tempore usque ad *FG*. Nempe, dum *AB* ad *CD* transit, secum eò mobile illud sinistrorsum ferre supponitur, nempe per totam latitudinem parallelogrammi, sive interim supponatur etiam descendere vel quantum est *AF* vel quantum *AB*, vel plus, vel minus, vel ne omnino quidem. Et quis quæso hoc non statim intelligit sine his tantis ambagibus? (Si verò altius quid hic sapias, metuo ne illud potius sit desipere.) Sed videamus tandem demonstrationem.

Quoniam enim *AF* est media proportionalis inter totam *AB*, & semissem *AE*, erit impetus ^{ab} *AC* ad *BD* acceleratione uniformi ultimò acquisitus (per *Art. 13.*) ipsa *BD*, (nempe, si tibi placuerit, sic erit; poteris enim quemlibet impetum recta qualibet designare: At interim illud per *art. 13.* Ego ne flocci facio, est enim articulus ille planè putidus, nec quicquam habet sani, uti ad illum jam ostendimus.) Et proinde recta *FB*, est excessus quo longitudo ab *AC* percursum motu uniformiter accelerato superat longitudinem percursum ab eodem *AC* eodem ^{tempore} motu uniformi, cum impetu (dele illud cum, nisi velis impetum illum itineris socium esse, non causam) ubiq; ipsi *BD* æquali, (Ideoque tu ubique vis motum tardiores plus spaciū percurrere, quam eodem tempore percurrit motus celerior. Non enim dubitas, credo, quin motus ille, qui non ante ultimum sui momentum eam nactus est celeritatem qua per totum decursum suum reliquus

quus fertur, tardior fuerit.) Quare si tota AB moveatur uniformiter ad CD eodem tempore quo AC movetur uniformiter ad FG , (eodem item impetu, nonne? ut cur igitur longiorem fecisti AF quam AC , si eodem tempore & eodem impetu utraque absolvatur: si autem non eodem impetu, dic, quo? nondum enim dixisti,) pars FB , cum non concurrat cum motu lateris AC quod supponitur consistere in FG , motui ejus nihil confert. (Esto.) Rursus supposito quod latus AC moveatur ad BD motu uniformiter accelerato, latus AB motu suo uniformi ad CD , minus promoveat mobile in singulis parallelis acceleratum, quam non acceleratum, & tanto minus quanto major est acceleratio, ut ostensum est ad art. 12. (Quod quam falsum sit, ostendimus suprâ, ad illum articulum.) Itaque quando AC est in FG per motum acceleratum, mobile non erit in latere CD ad punctum G , sed ad punctum D .) Mirum est cur tu te tantum divexes, ut probes rectam AC punctum in se mobile secum transferre ad latus CD cum eò peruenerit, in quacunque sui parte punctum illud tunc esse contigerit, nempe sive sit in F , sive in B , sive etiam in A , dum tota AB transferatur ad CD erit punctum illud alicubi in recta CD . Quod nemo negaret; vel, si probandum esset, potest sine tot paralogismis facile probari: nempe si descenderit quantum est AF reperietur in G ; si quantum est AB reperietur in D , quocunque tandem motu sive uniformi sive quocunque modo accelerato; vel si non descenderet omnino, reperietur in ipso C . quia nempe puncta A , F , B , punctis C , G , D , congruent.) Ita ut GD sit excessus quo longitudo facta motu accelerato ad BD , superat longitudinem factam motu uniformi ad FG . (nempe, quo longitudo percursa motu tardiori superat longitudinem eodem tempore percursam motu celeriori.) Effugit ergo mobile acceleratione suâ actionem partis AF , (num igitur in jus vocandum erat?) ita ut perveniat ad latus CD tempore quidem AC , sed in longitudine CD quæ est longitudini AB æqualis. (Esto.) Quare tempore AC motus uniformis ab AB ad CD , in longitudine tota AB , non plus agit, (nempe quoad ejus lationem versus latus CD) in mobile uniformiter acceleratum ab AB , ad CD , quam si esset AC mota eodem tempore motu uniformi ad FG , (nempe nihil omnino utrovis casu.) differentia in eo solo consistit, quod cum AB agit in mobile uniformiter motum ab AC ad FG , id quo motus acceleratus superat uniformem (quantum ad descensum, intelligis;

intelligis;) totum simul est in FB vel GD , sed quando eadem AB agitur in mobile acceleratum, id quo motus acceleratus superat uniformem, dispergitur per totam longitudinem AB sive CD , sed tamen ut totum collectum æquale sit eidem FB vel GD . (Profecto crederet quis psittacum loqui, dum hæc audit, adeo nihil habent sensus, saltem nihil ad rhombum. Ego certè tibi author essem ut hæc omnia deleres, & horum loco hoc tantum substituas: Sive punctum mobile A in ipsâ AB , eo tempore quo hæc tota ad situm CD transfertur, celerius moveatur, puta quantum est AB , sive tardiùs, quantum est AF , sive denique non omnino sed maneat in ipsius puncto A , transferetur utcunque ad latus ipsum CD , quippe neque ultra neque citra, cum omnia rectæ AB puncta in ipsa CD reperiantur: tota differentia hæc est quod vel remotius vel propius erit à puncto C , prout plus minusve supponitur descendisse in rectâ motâ AB , nempe si ad B , reperietur in D , si ad F , reperietur in G , si non omnino descenderit, reperietur in C , quia puncta A, F, B , latione factâ, ipsis C, G, D , congruent. Quid enim tanto apparatu opus est, quantum tu habes, totque introductis paralogismis, aliisque suppositis quæ nihil sani habent, ad rem adeo facilem probandum? & de quâ nemo dubitaret; nisi forte cum inciderit in demonstrationem tuam, tot falsa & putida inibi repertiens, suspicetur aliquid subesse mali quod his probationibus indigeat.) Itaque quolibet parallelogrammo, &c, quod erat demonstrandum. Imò verò, non id quod demonstrandum erat, sed ipsius tantum partem priorem, adhuc absolvisti, de quâ nihil erat dubii: ad partem autem posteriorem confirmandam, nempe, quod sit longitudo eodem tempore percursa, mediâ proportionalis inter totam & dimidiam, nihil dictum est; nec quidem quid sibi hæc volunt explicuisti. Sumpsisti, fateor, in constructione rectam AE , tantam quanta est media proportionalis inter totam AB ejusque dimidiam AE ; sed hoc arbitrariè sumptum est, adeoque nihil inde inferri poterit; nam si ubivis aliàs possuisses punctum F , puta in E , in B , vel etiam in A , omnia eodem modo succederent; nempe punctum A mobile alicubi in recta CD reperendum esset. Quodcunque igitur sit quod illâ clausula indicatum velles, probatum non est, nec quidem ipsius probationem (quod tamen unicè probandum erat) aggressus es.

Art. 19. Eadem methodo (eadem igitur iufficiat responsio) si longitudo percursæ habeant aliam quamcunque ad tempora suam rationem, numeris explicabilem, (vel ne quidem explicabilem) & latus AB divisum sit in E , ita ut AB sit ad AE , ut ratio longitudinis ubiq.

ubique percursorum ad rationem temporum quibus percurruntur, (aut etiam aliàs utcumque diuisum, vel ne diuisum quidem,) sumaturq; inter AB & AE mediaproportionalis AF , (vel potius sumpto ubiuis, in AB , puncto F ,) ostendi potest, latus quod movetur motu uniformi (imò quocunq; motu moveatur) concursu suo per totam longitudinem AB (puta si eousque interim descendisse supponatur punctum A mobile) tantundem efficere (quantum ad lationem transversam) quantum efficeret si alter etiam motus uniformis esset (quippe utrobique nihil;) longitudo verò eodem tempore AC (quoad descensum) percurfa, esset media illi AF ; (si nempe descensus ejus supponatur tantus esse quanta est AF .) Egregiam verò laudem! At interim quamvis hæc (sic explicata) ita vera sint ut nemo de illis dubitet; tua tamen demonstratio ad hæc probanda nihil facit, ut jam abundè ostensum est.

Articulum 20, an omnino attingerem necne, aliquantò dubius eram; quippe quod tu in chartis reimpressis eum omiseris, ejusque loco hoc tantum reliqueris, [*Atque hactenus de motu per concursum.*] atque insuper paginam albam, (quales quidem si fuissent reliquæ omnes, consultius fecisses.) Quoniam tamen integer (utut delendus) ad nos pervenit, neque is sit cujus te magis pudeat quam præcedentium: non gravabor etiam illum attingere, & præcipuè quidem propter raram illam quam nobis exhibet speculationem arithmeticam. Sic igitur se habet.

Atque hactenus de concursu motûs recti cum motu recto: considerabimus jam concursum motûs tam recti, quam circularis cum circulari. De concursu motûs recti cum circulari habemus theorema unum. (De concursu motus circularis cum circulari, quantum ego video, ne unum quidem.)

Si à puncto circumferentiæ ducatur chorda qualibet, & tangens chordæ æqualis, angulus quem efficiunt inter se duplus erit aggregati angulorum quos faciunt inter se omnes chordæ simul sumptæ omnium arcuum æqualium in quos arcus æquales datus arcus dividi potest. Hæc est propositio, videamus demonstrationem. Sit enim inquis arcus quilibet cujus chorda sive subtensa (in fig. 12.) est AB , faciens cum tangente AC , ipsi subtensæ AB æquali, angulum BAC . Arcus autem BC (lege BA) diuisus sit in partes æquales, AD , DE , EF , FB , unde etiam chordæ AD , DE , EF , FB , æquales erunt. (Rectè.) Centris autem A , D , E , F , ducantur arcus DG , EH , FI , BK . (si in schemate delineando à mente tua aberraverim cum puncta I , K , in rectis AE , AF ,

AF, productis posuerim; quæ, an tu ponenda velis in produ-
ctis rectis DE, EF, nempe ubi sunt puncta i, k, non constat;
ignoscas, quæso, cum in hoc invitus peccaverim, non enim id,
cum desit schema tuum, ex verbis satis constat; quamvis enim
propositionis verba hoc potius suadeant, demonstratio tamen
tua, qualis qualis est, illud potius postulat, quippe quæ an-
gulos supponit arithmetice proportionales, essent autem EDH,
FEi, BFK, invicem æquales. Sin tu secus velles, intelligan-
tur I, K, illic esse ubi jam sunt i, k). *Dico angulum BAC*
duplum esse aggregati angulorum DAG, EDH, FEI, BFK.
(videamus quæ hoc probes.) *Ostensum enim est*, inquis, *cap. 14.*
art. 15. angulos æqualium chordarum (intelligis credo, angulos
DAG, EDH, FEI, BFK, nam de his illic agitur; non de
FEi, BEk; multo minus de ADE, DEF, &c.) Nota tamen il-
lorum maximum non esse ipsum BAC, uti tu videris suppose-
re, sed BEK; nisi potius velis, propter numerum quem sup-
ponis arcuum infinitum, eum, qui contineatur inter rectam
AB productam, & rectam in puncto B contingentem.) *pro-*
cedere in ratione numerorum 1, 2, 3, 4, &c. (Rectè.)
Siquidem ergo chordarum numerus statuatur esse tantus quantus esse
potest, ut nunc supponitur, erit numerus infinitus, (Rectè.) & *prima*
chorda non potest considerari ut habens quantitatem, (quippe quæ in-
finite parva erit) *sed ut punctum* (seu potius rectam infinite par-
vam) *quæ inter quantitates nihil est, ut inter numeros cyphra;* (at
quorsum tu igitur alibi definis punctum, esse corpus motum cujus
quantitas cû aliqua semper sit, non consideratur? Quod autem tu
hic habes ego quidem de puncto concedo, quippe nullam habet
quantitatem, sed est ut in numeris cyphra; at de lineâ infinite par-
vâ ego non plane idem concedo, ut quæ saltem infinities multi-
plicata certam aliquam acquireret magnitudinem, nempe eam cu-
jus supponitur esse aliquota pars infinite parva, vel si ita loqui li-
ceat, pars infinitesima, vel subinfinitupla.) *Progressio ergo angulo-*
rum habebit pro primo numero cyphram (saltem quamproximè.) &
stabit hoc modo, 0, 1, 2, 3, 4, &c. (Esto, nisi quod vox illa stabit
non placeat. At quid porro? præsentio enim, ni fallor, novam
aliquam speculationem Arithmeticam.) Sed in bujusmodi progres-
sione summa numerorum omnium simul sumptorum, æqualis est semissi
ejus numeri qui fit à maximo termino ducto in minimum, (Non ve-
ro. Sed semissi ejus numeri qui fit ab aggregato maximi & mini-
mi ducto in numerorum terminorum; nempe ita ego, dum puer e-
ram, edocebar summam progressionis arithmeticæ colligere; Sin
tu aliquid vides cur illud dedocendus sim, effare tandem. At quid
interim?)

interim?) id est, hoc loco in cyphram (esto, modò ita velis; quid porro?) summa ergo omnium angulorum qui fieri possunt inter subtensam AB , & tangentem AC , (quos, quæso, intelligis? num CAD , CAE , CAF , &c? sunt quidem illi omnes arithmetice proportionales, propter æquales angulos CAD , DAE , EAF , &c, eorumque omnium maximus CAB : non autem de his hætenus actum fuit, nec quidem eorum ulla mentio facta est; sed de ipsis DAG , EDH , FEI , BFK , vel forte DAG , EDH , FEi , BFk , vel denique (quod propositionis verba videantur potius innuere, utut demonstratio aliò spectet,) de ipsis ADE , DEF , EFB : ex quibus omnibus ipse BAC nullus est.) ad arcum AEC , lege AEB . (vis igitur angulos mistos GAD , HDE , IEF , rectis GA , HD , &c. & peripheria convexa comprehensos; aliosque ejusmodi numero infinitos ipsis interjectos ad punctum usque B . quos quidem arithmetice proportionales esse, ego non negavero: sed, inquam, nec BAC eorum ullus est, nec etiam ipsi illi sunt quos propositio indicat, quippe non æqualium arcuum chordis comprehensi: quamvis enim peripheria haberi possit pro æqualium arcuum infinite exiguorum chordis, at ipsæ DH , EI , FK , nec ejusmodi chordæ sunt, nec ejusmodi chordarum continuationes, sed continuationes chordarum arcuum arithmetice proportionalium. Si autem non illos, FEI , BFK , velis, sed FEi , BFk , erunt quidem Ei , Fk , &c. æqualium chordarum continuationes, sed anguli sic facti non erunt arithmetice proportionales, sed invicem æquales; & quidem, si supponantur numero infiniti, erunt anguli illi omnes anguli contactus, ipsæque Ei , Fk , circulum contingant: Ut quoquo versum te convertas nil sani poteris elicere. Sed esto. Quanta interim vis ut sit eorum omnium summa? nempe) æqualis, inquis, est semissi ejus qui fit à maximo angulo in nihil, (nempe sic tu supra docueras summam progressionis arithmeticæ colligere; quam semissem esse vis termini maximi in minimum ducti. quam rectè tu videris. Sed, utcunque, quantum erit illud Factum?) hoc est, inquis semissis ipsius anguli maximi, (itane verò? Noveram quidem antehac quantitatem in 1 multiplicatam, manere invariata, quia $a \times 1 = a$; at de quantitate in 0 ductâ id non prius intellexi. Num igitur erit $a \times 0 = a$, $1 \times 0 = 1$, $2 \times 0 = 2$? annon potius $1 \times 0 = 0$? &c. hoc est, inquis, anguli BAC (imò, inquam, neque hoc est. Nim angulorum DAG , EDH , &c. arithmetice proportionalium, ipse BAC neque maximus est neque omnino ullus.) Quod, inquis, erat demonstrandum. (Imo verò

verò, neque hoc id est quod erat demonstrandum; sed demonstrandum aliquid erat de angulis qui æqualium arcuum chordis contineantur, quales hi non sunt.) Atque hæc quidem est tua demonstratio.

Et jam tandem hoc totum caput absolvimus, viginti articulis comprehensum; ex quibus omnibus non nisi tres sanos deprehendimus, nempe, sextum, septimum, & octavum, reliquos septemdecem vitiosos omnes (quod à principio demonstrandum suscepimus,) & quidem (exceptis tribus primoribus quibus subest aliquid sani) miserè putidos.

Verùm ego jam libri mei molem crescentem video; adeoque si tu in sequentibus tam sis erratorum & paralogismorum plenus quam huc usque fueris (metuo autem ne ita sit) jam satis fore præsentio quod ea figillatim omnia prosequi plus operis postularet quam ego illis refutandis lubens impenderem. Adeoque monendus es ut vel in sequentibus horum parcior fueris, vel ne exspectes (quod tibi fortasse non multum dolebit) ut iis ego singulis insistam. Nec quidem opus erit, cum jam abunde constet qualis tu fueris Geometra, neque à te magnum aliquid expectandum fore. Non igitur est cur ego vel mihi vel lectori nimias creem molestias, quippe neutri (credo) vertendis stercoreariis admodum delectabimur, cum neque spes sit illic vel unam reperturos gemmam.

In CAP. 17.

AD artic. 1. (qui definitionibus constat) hoc saltem notandum erit, quod ubi *Rationes proportionales* definitur esse *quatuor rationes quarum prima est ad secundam, ut tertia ad quartam*; tu hanc proportionalitatem intelligas non de ipsis rationum quantitativibus, (quo sensu dupla ad triplam ita esset ut quadrupla ad sextuplam, quia nempe

$\frac{2}{1} : \frac{3}{1} :: \frac{4}{1} : \frac{6}{1}$) quod aliquis fortasse expectasset; Sed de nomi-

nibus multiplicativitatis rationum ad invicem; puta quando prima secundæ, & tertia quartæ (non æquè multiplæ, sed) æquè multiplicatæ; puta duplicatæ, triplicatæ, subduplicatæ, &c. (nempe aliud est, in rationibus, duplum, & duplicatum; neque ratio dupla & duplicata tantundem valent, uti notum est.) Et similiter ubi *Rationes commensurabiles*, definitur, *quæ eam habent inter se rationem, quam habet numerus ad numerum*, hoc est, quando unius ad alterum multiplicitas

numero exprimi potest. Adeoque, secundum te ratio 2 ad $\sqrt{q^2}$ & 2 ad $\sqrt{c^2}$ sunt cōmensurabiles; non quia est ut $\frac{2}{\sqrt{q^2}}$ ad $\frac{2}{\sqrt{c^2}}$

sic numerus ad numerum, (nam hoc falsum esset,) sed quia prior sit ratio duplicata posteriori triplicata, quarum multiplicata nomina sunt ut numerus ad numerum, nempe 2 ad 3. Quod monendum duxi ne dubia phrasiologia fraudi sit.

Art. 2. *Figura deficiens facta à quantitate decrescente donec evanescat, secundum rationes ubique proportionales & commensurabiles, est ad complementum suum, ut ratio totius altitudinis ad altitudinem quolibet tempore diminutam, ad rationem quantitatis integræ quæ figuram describit ad eandem tempore eodem diminutam.* Hæc tua propositio.

Sequitur ἐκ δευτέρου. Sit, inquis, quantitas AB (in fig. 1.) quæ mota per altitudinem AC describat figuram AD completam; eadem decrescens, donec in puncto C tota evanescat, describat figuram deficientem ABEC, cujus complementum erit figura BDCFE; intelligaturq; motam esse AB donec jaceat in GK, ut altitudo diminuta sit GC, atque AB diminuta sit GE, sitque ratio AC totius altitudinis ad GC altitudinem diminutam, rationis AB sive GK quantitatis integræ ad GE quantitatem diminutam, verbi gratia, triplicata. Similiter sumatur HI æqualis GE quæ diminuta fiat HF, sitque ratio GC ad HC rationis HI ad HF triplicata, & sic perpetuò fiat & in omni parte rectæ AC possibili: ducaturq; linea per B, E, F, C. &c. Dico figuram, deficientem ABEC esse complementi sui BDCFE triplam, sive ut ratio quæ est inter AC, GC, ad rationem quæ est inter AB sive GK & GE.

At quid, quæso, in causa est cur tu tam in propositione quam ἐκ δευτέρου &c. figuram tuam ACFB invertas, ut basis AB superne ponatur, & vertex C inferne; adeoque motum inchoari velis à basi ad verticem, decrescendo, potius quam à vertice ad basin, crescendo? cum illud & brevius multò & clariùs exposuisses motu contrario? Dic serio. annon erat quia tu putaveris, quod si à vertice sumatur, dicendæ essent diametrorum rationes ad rationes ordinatim applicatarum, non multiplicatæ, quod tu velles, sed submultiplicatæ? verbi gratia, ratio CH ad CG, rationis HF ad GE, non dicenda esset triplicata (quippe hæc denominatio, si tibi credendum est cap. 13. art. 16, soli rationi majoris ad minus, non item minoris ad majus, æqualibus additæ cōpetere possit) sed subtriplicata, quia nempe ratio CH ad CG est ratio minoris ad majus, adeoque cum tu rationem velles triplicatam,

tam necesse putaveris ut à majoribus exorsus AB, GE, tandem ad minores provenias HF &c, ipsumque punctum C. Dic, inquam, serio: annon hæc est vera causa cur tu prolixam & intricatam hypothesin elegeris, à basi inchoando, potius quam brevem, facilem, & dilucidam, inchoando à vertice? (quid enim aliud in causa esse possit, ego ne haxiolari possum.) Sin id sit, ego te illo metu liberabo, ut tandem dejectam tuam figuram possis erigere, & commodiori formâ, tam figuram ipsam, quam propositionem ejusque expositionem & demonstrationem constituere, ut rectius intelligat lector quid tu velis. (nisi forsan malis ut non intelligat, quod quidem ut plurimum tibi optandum esset.) Nempe, non modò ratio majoris ad minus, (quod tu, supponis,) sed & ratio minoris ad majus, vel simpliciter ratio quælibet, æqualibus addita seu potius continuata, rationem efficiet (non submultiplicatam, sed) multiplicatam. (Cujus rei ignoratio te non raro in errorem præcipitat satis fœdum.) Tu autem si de hoc dubites, adi quæso amicos tuos, quos soles in re difficili consulere, atque illi, mihi crede, rem ita esse audacter pronuntiabunt. Audacter igitur & tu figuram tuam restitue, poterit enim jam tutò resuscitari, basi suæ insistere, & dejectam cristam erigere: nempe si sit ratio CG ad CH triplicata rationis GE ad HF, erit etiam non minus ratio CH ad CG triplicata rationis HF ad GE, adeoque & omnia ad erectum situm restituenda.

Esto igitur hæc tua propositio, *Si figurae deficientis diametri (vertice & puncto applicationis interceptæ) sint in ordinatim applicatarum ratione duplicatâ, triplicatâ, aut alias multiplicatâ, (modò illius multiplicatis denominatio vero numero vel integro vel saltem fracto non autem surdo, exprimi possit,) erit illa figura deficiens ad suum complementum, ut numerus à quo ista multiplicitas denominatur ad unitatem.* Adeoque sensu commodo & satis intelligibili efferetur tua propositio, ut possit lector, id quod tu velis statim assequi. cū ad illam, prout à te efferetur intelligendam Oedipo opus esset.

Ex deorsum autem sit isthæc brevis & perspicua. Sit, ubi gratiâ, figura deficiens ACFB, cujus diametri CH, CG, CA, sint in ratione triplicatâ ordinatim applicatarum HF, GE, AB. Dico ipsam ACFB figuram deficientem, esse complementi sui BDCF triplam. Quæ quidem expositio, & brevis est & perspicua, tuâque illâ prolixâ, & intricatâ multò potior. An autem vera sit tua propositio, sive hoc, sive illo modo

modo prolata, ex demonstratione jam examinandâ sciscitandum est: quam, ni fallor, ineptam plane & putidam reperiemus.

Ducatur enim inquis, CB secans GK in L , & per L ducatur MN parallela rectæ AC ; (Esto.) erunt ergo parallelogramma GM , LD , æqualia, (nempe per 14 & 6, cum sint ejusdem reſtanguli duo complementa.) Dividatur jam LK in tres partes æquales nimirum ut totupla sit partis unius quotupla est ratio inter AC , GC , five inter GK , GL , rationis quæ est inter GK , GE . (Esto.) Erit itaque LK ad unam ex illis tribus partibus (nempe sui trientem,) ut ratio Arithmetica (hoc est, differentia,) quæ est inter GK , GL , (nempe, ipsa LK ,) ad rationem Arithmeticam (five differentiam) quæ est inter GK , & GE , five GK multatam EK tertiâ parte rectæ LK . Supponis igitur ipsam EK , (curvâ CEB & rectâ BKD interceptam,) esse trientem ipsius LK . At hoc, inquam, falsum est; (adeoque & falsa quæ sequitur demonstratio quæ ab hoc falso supposito dependet.) Quod autem non sit rectâ EK , pars tertia rectæ LK , ego sic in numeris statim ostendam. Esto igitur AC ad GC , five GK ad GL , ut 8 ad 1, (cum enim punctum G sit arbitrium, possumus illud ubivis in AC collocare;) adeoque GK ad GE , ut 2 ad 1, (quippe in ratione subtriplicata rationis 8 ad 1, ut figuræ constructio postulat.) Adeoque si ponatur $GK=8$, erit $GL=1$, $LK=7$, $GE=4$, & $EK=4$. Non est ergo rectâ EK rectæ LK (quod tu affirmas) pars tertia. quod erat ostendendum. Ruit igitur tua demonstratio, quæ hoc tibi sine erat fulcienda.

Et quidem in animo erat in hac demonstratione confutanda non ulterius progredi: quorsum enim, cum hoc sufficiat? Quoniam tamen hæc est ad sequentium plerasque fundamentalis propositio; & tu fortasse nondum satis perspicis erroris fundamentum, non gravabor & hoc tibi etiam ostendere, ne forsitan & posthæc eadem oberres chordâ. Examinemus igitur & quæ sequuntur. Quoniam autem, inquis, altitudo AG , vel ML , supponenda est ob decreſcentiam continuam minor omni quantitate datâ, etiam LK , intercepta inter CB diagonalem & latus BD , erit omni datâ quantitate minor. (Omnino.) Et proinde differentia inter AB , GL , omni etiam data quantitate minor. (Quidni? Si enim supponatur GK in ipsâ AB jacere vel ab ea saltem intervallo nonnisi infinite parvo distare, certum est puncta illa L , E , K , eadem

dem puncto B, vel congruere, vel saltem ab illo distare intervallo non nisi infinite parvo; adeoque evanescent etiam tam LE & EK quam ipsa LK, quantacunque interim aliàs sit ratio istius LE ad EK. At quid porro?) *Quare per Coroll. art. 27. (lege 28. (cap. 13. mediæ inter AB five GK & GL arithmetica, à mediis inter eadem GK, GL Geometricis, non different, (vel saltem non nisi intervallo infinite parvo. Nam, propter coincidentiam punctorum L, K, coincident etiam omnia intermedia sectionum puncta, five in ratione Arithmetica, five Geometrica five utcunque secta supponatur LK, si enim totum sit nihil, ipsius etiam triens, quadrans, aut alia quantacunque pars, nihil erit, earumque item ab invicem differentia nihil erit.) Est ergo ratio inter AC GC, (identitatis nempe,) rationis inter GK GE, (identitatis item) triplicata (vel si libet quadruplicata, quintuplicata &c. perinde enim est quam dicas.) in ratione Arithmetica. (vel Geometrica, vel Harmonica, vel qualibet; nam o ad o non minus unam quam aliam quamlibet rationem subibit:) quare ipsa EK est tertia pars ipsius LK, (vel quarta, vel quinta, vel quælibet,) & proinde si ducatur EO rectæ BD parallela, (quæ propterea, ob distantiam vel infinite parvam vel nul'am, coincident) erit spacium ED tertia pars spacii LD, (vel quarta, quinta, vel quælibet, propter oppositorum laterum utrobique coincidentium, latitudinem nullam,) hoc est tertia pars spacii AL, (vel quarta, quinta, &c. nam hic etiam coincidunt latera & spacium evanescit, five nullum est.) est ergo spacium AL triplum (vel quadruplum, vel quintuplum, vel quotuplum quis velit,) spacii ED. (Nempe quamdiu puncta B, L, E, K, coincidunt. Quotuplum autem sit alterum alterius alibi, demonstratio tua neutiquam ostendit; nec attingit quidem.) Et quoniam, ut diximus, latitudo utriusq; spacii, est indivisibilis, (vel potius nulla, nam nisi & hoc dicas nihil agis,) spacium LB (intelligis, LEB,) per cap. 13. Coroll. art. 28, erit punctum, (hoc est, nihil, sicut spacium BEK, ut & AL, ED; nam propter nullitatem latitudinis evanescit spacium, & nihil est; five enim in punctum five lineam degeneret spacium, perinde est nam utrobique area æquabitur nihilo.) Itaq; quod in primâ parte motûs fit, nempe AL, triplum est ED, nempe ejus quod eo tempore infectum relinquitur, (vel etiam quadruplum, quintuplum, aut quantuplum quisque volet; non enim de unâ magis quam aliâ qualibet ratione procedit demonstratio.) Rursus intelligatur*

motam esse GE donec jaceat in HI, &c. eadem quā antè methodo demonstrari potest spaciū GP triplum esse spaciū FO (vel etiam quadruplum, quintuplum, vel quantuplumcunque;) & sic decæteris spaciis ad eundem modum generatis. (Omnino eadem enim est siue consequentia siue non-consequentia in omnibus.) Itaque lineaque fit ex spaciis (lege itaq; spacia) LB, PE, &c. quæ intotidem abeunt puncta (nempe tu ita vis) ex quorū sunt indivisibilia spacia ex quibus figura, tota componitur, adde, & eadem, vel potius meliori de causa, spacia item BEK, EFI, &c. abibunt in totidem puncta, &c.) constituent lineam quandam qualis est BEFC, quæ dividet figuram completam AD in duas partes, quarum altera ABEFC, quam appellavimus figuram deficientem, tripla est (vel quadrupla vel quintupla vel quantupla cunque) alterius, nempe BDCFE. Erat autem ratio inter Altitudines rationis inter quantitates decrescētes ubique triplicata. (quanquam id ipsum provenisset si sumpsisses rationes quadruplicatas, aut quasvis alias: nam, utcunque, fuisset ratio figuræ deficientis ad complementum suum, quantupla cunque quis voluerit: nihil enim determinatum producet hic tuus processus.) Eodem, inquis, modo si esset ratio altitudinum ubique rationis quantitatū decrescētiū quadruplicata, ostenderetur quoque figuram deficientem esse complementi sui quadruplam, (adde, vel etiam quintuplam, sextuplam, aut quantupla cunque;) & sic secundum quaslibet alias rationum comparationes. (Nempe quæcunque sumatur rationis diametrorum ad rationem ordinatim applicatarum multiplicitas, erit figura deficiens complementi sui quantuplum quisque volet.) Quare figura deficiens &c. erit ad complementum suum, ut ratio altitudinum ad rationes quantitatū decrescētiū, quod erat demonstrandū. Sed & simul in alia ratione qualibet, quod non minus est demonstratum. Et tu interim nugatorum omnium nugacissimus: Quod demonstratur ubique. Vide autem, annon hic tuus Paralogismus (ut & alii passim) sit magis adhuc elaboratus, quā ille, quo elaboratiorem esse nullum posse putaveris. p. 55.

Priusquam autem hunc articulum dimittam; monendus es in posterum, (si hujusce propositionis demonstrationem iterum aliquando sis aggressurus,) ut non tam omnia parallelogramma AL, GP, quam AE, GE probes omnium parallelogrammorum ED, FO, sigillatim tripla esse; & quidem ubi hoc probaveris, ego non difficulter concedam, & omnia illa simul, horum simul omnium, triplam esse; hoc est figuram deficientem, sui complementi triplam; propter infinita parallelogramma BE, EF, &c. evanescētia in totidem puncta. (Nempe ad hujusmodi demonstrationem

strationem te collimâsse video, quamvis à scopo miserè aberraveris.) Sed & prædicendum est te illud præstiturum ad Græcas Calendas.

Articulus 3. cum ipsius Tabellâ, eâdem ruinâ labitur. Cùm enim à præcedentis articuli veritate totus dependeat, illo ruente necesse est ut hic simul ruat. Adeoque cum ipsius demonstrationem putidissimam esse deprehendimus, & nihil sani habentem, erit utriusque articuli propositio vel planè falsa, vel saltem gratis dicta. Nihil tale siquidem illic ostenditur, aut istis principiis ostendi potest. Quod etiam de art. 6, 7, 8, 9, eorumque tabellis intelligendum erit. Qui omnes cum ex veritate art. 2. dependant, (quem verum esse nihil est ex hæcenus adductis quod suadeat,) non opus est ut sigillatim retexentur. Si quæ autem insuper habeant sphalmata, non tamen lectorem ubique detinendum esse duxi, ut qui huiusmodi fortasse cominus intuendis, non adeo multum delectabitur.

Art. 4. curvilinearum illorum descriptionem per puncta aggrederis. Quæ quidem res est non ita magnæ difficultatis, ut tanto apparatu tantisque ambagibus opus sit. Exempli gratia. Si describenda sit curva cujus ordinatim-applicatæ sint in subtriplicata ratione diametrorum, ut in Fig. 1. Ducatur utcumque CD recta, in qua sumantur utcumque puncta quotlibet Q, O, D, &c. quibus applicentur (in quocunque angulo) totidem rectæ invicem parallelæ QF, OE, DB, &c, in rectarum CQ, CO, CD, &c, ratione triplicata, (ope prop. 11 & 12 c 6.) Illarum autem unâ qualibet ad arbitrium sumptâ reliquarum magnitudo inde determinatur. Erit inquam CFE B curva quæsitâ, cujus diameter CA (rectis QF &c parallela) & tangens CD. Erunt enim per constructionem HF, GE, AB, &c. (ordinatim-applicatæ) sive CQ, CO, CD, &c. in rectarum QF, OE, DB, &c. hoc est CH, CG, CA, &c, diametrorum, ratione subtriplicatâ. Quod erat faciendum. Et similiter si ordinatim-applicatæ constituendæ essent in ratione subquadruplicata, subquintuplicata, &c. Nempe quærendæ essent, rectæ QF, OE, &c, in rectarum CQ, CO, &c, ratione quadruplicata, &c.

Si autem constituendæ essent ordinatim-applicatæ in diametrorum ratione, non tam subtriplicata, subquadruplicata &c, sed verbi gratia, subtriplicatæ duplicata; (sive ut tu loqueris, in ratione 2 ad 3,) descriptâ ut prius curvâ CFE B, sumendæ essent in ipsis rectis HF, GE, AB, &c, aliæ in earum ratione duplicatâ, (nempe unâ ad placitum sumptâ, reliquarum quantitates inde determinandæ erunt,) ab iisdem H, G, A, punctis incho-

atæ;

atæ: (quæ quidem terminari possunt vel ultra, vel citra, vel partim ultra, partim citra curvam jam ductam CFEB, prout quisque voluerit:) & per earum terminos ducenda erit curva quæsitæ. Cum enim ipsæ HF, GE, &c. sint in diametrorum ratione subtriplicatâ; rectæ quæ sunt in illarum ratione duplicata, erunt in diametrorum ratione subtriplicatæ duplicata. Et similiter faciendum esset de alia quavis ratione; puta quærendæ sunt aliæ in rectarum HF, GE, &c. (quæcumque habeant hæ ad suas diametros rationem, puta subduplicatam, subtriplicatam, subquadruplicatam &c, (ratione duplicatâ, triplicatâ, quadruplicatâ, quintuplicatâ, &c. prout ducendæ curvæ natura postulaverit.

Et eadem methodo, curva ducta continuari poterit quousque libet. Nihil enim aliud opus est sive in ducendis sive continuandis hujusmodi curvis, quam ut operationes prop. 11 & 12 e 6 quoties opus est repetantur. Nec quicquam inest difficultatis, si semel attendatur tantundem esse in describendâ curvâ, sive ad rectam CA ordinatim-applicentur quotlibet in ratione subduplicata, subtriplicata, &c sive ad rectam, CD in ratione duplicata, triplicata, &c. quod nos ostendimus ad prop. 23. *Arithmet. Infini.* & alibi. Eadem enim utrovis modo curvæ puncta designabuntur.

Quod quidem cum tu nesciveris, gravissimè lapsus es multoties, puta art. 4, 5, 9, 10, 11, 13, 14, 15, 16, 17, 18, 19, Cap. 16. & deinceps in hoc capite art. 10. &c. (& in sequentibus fortasse tantundem reperietur;) in quibus omnibus articulis, præter alios turpissimos lapsus, tu perpetuò rectas ordinatim-applicas ad curvæ diametrum, quæ ordinatim-applicandæ erant ad rectam in vertice contingentem.

Tu verò, in presenti articulo, quasi per planorum Geometriam id fieri non possit, statim imperas mediarum quotlibet Geometricarum inter duas datas inventionem, (Quod ipsum antea magis adhuc absurdè feceras art. 16. cap. 16. dum mediarum quotlibet inventionem imperas, ut quantitas arbitrariè sumenda designetur.) Adeoque problema quod in se *Planum* est, tu in *Solidum* convertis & *Lineare*; quod quam Geometram dedecet, ex teipso discas, dum tu, cum Pappo fatearis, pag. 181. *Non parvum peccatum esse apud Geometras, cum problema Planum per Conica vel Linearia ab aliquo invenitur.* Hoc autem quæcumque magnum sit apud Geometras peccatum, apud

apud te levissimum est, qui tot graviora admiseris. Et quidem, si ad reliqua respiciatur, vix pro peccato habendum erit.

Articulo 5. rectarum, quæ hujusmodi curvas in dato puncto contingant, inventionem, tu ex Coroll. art. 28. cap. 13. deducis. Cum tamen ejusmodi nihil ex eo Corollario deduci possit. quod vel primo intuitu satis patet, vel etiam ex iis quæ à nobis dicta sunt ad art. 2. ubi id ipsum Corollarium te satis deludit. Modum verò generalem hujusmodi contingentes inveniendi, tradidimus in tractatu nostro *de Conicis sectionibus*, sub finem.

De art. 6. 7. 8. 9. eorumque tabellis, dictum est ad art. 3. Cum enim hi omnes ex art. 2. dependeant, non opus est ut de his admodum simus solliciti priusquam de illius veritate constet. Quem verum esse, nihil est ex hæcenus adductis quod suadeat; cum ipsius demonstratio (uti supra vidimus) nihil habeat sani.

Artic. 16. est miserè falsus. Eodem siquidem luto tu hæres, quo supra cap. 16. art. 4, 5. Hoc enim fundamento nititur, *Quoniam BC est ad BF in ratione CD ad FE triplicata, erit invertendo FE ad CD in ratione BF ad EC triplicata.* Hoc est, quoniam Diametri sunt in ordinatim applicatarum ratione triplicata, ergo invertendo ordinatim-applicatæ sunt in triplicata ratione diametrorum. Quod cum tu ex professio probandum suscipias, non mirum est si quod hinc dependet sit satis absurdum. Quæ autem eò absurditatis perveneris, jam dictum est ad cap. 16. art. 4. Quippe nesciebas quid est ratio subtriplicata &c. Sed videamus, si libet, quid tu hic habes.

Ex iis, inquis, quæ de figuris deficientibus in parallelogrammo descriptis dicta sunt, inveniri possunt spatiorum, quæ determinatis temporibus motu accelerato percurruntur, ad ipsa tempora rationes, prout uno vel pluribus gradibus velocitas mobilis singulis augetur temporibus. Nempe idem tu hic suscipis quod prius cap. 16. & pari successu. Videamus autem quæ hoc fiat.

Sit enim, inquis, in fig. 6. parallelogrammum ABCD, in qua descriptum sit trilineum DEBC. ductaque basi parallela ubicunque FG secet BD diagonalem in H, curvam BED in E. sitque ratio BC ad BF rationis FG ad FE, exempli causa, triplicata. (Esto.) Erit ergo figura DEBC complementi sui BEDA tripla, (Nempe si verus sit tuus art. 2. qui nondum demonstratus est. Sed utcunque, pro vero habeatur, modò ita velis. Quid porro?) Similiter ducta

IE parallela ipsi *BC*, figura trilinea *EKBF* erit tripla complementi sui *BKEI*. (Esto. Nam, si illud, etiam & hoc verum erit.) Erant igitur inter se figurae deficientis partes à vertice abscissæ à rectis basi parallelis, nempe *DEBC*, *EKBF*, ut parallelogramma *AC*, *IF*, (Esto.) id est, in ratione composita altitudinum & basium. (Omnino.) Quoniam ergo altitudo *BC* ad altitudinem *BF* ponitur esse in ratione basium *DC*, *FE*, triplicatâ, erit figura *DEBC* ad figuram *EKBF* in ratione *DC* ad *FE* quadruplicata. (Neque hoc malè. Si enim articulus ille secundus, de quo suprâ dictum est, legitimè demonstratus esset, uti non est, etiam hæc inde rite deducta esse non negandum est. Quæ autem sequuntur, sunt & aliis nominibus plane ridicula. Sic enim, intermissis paucis quæ ad demonstrationem non faciunt, tu mox progredieris.) Intelligatur igitur à puncto *B* crescente in magnitudinem *CD*, descripta *BEDC*. (Esto. quid tum?) Quoniam ergo *BC* est ad *BF* in ratione *CD* ad *FE* triplicata, erit invertendo, ut mox ostendemus, (nempe ad Græcas Calendas,) *FE* ad *CD* in ratione *BF* ad *BC* triplicata. (At quis unquam mortalium te docuit hanc inversionem? Nempe quoniam Diametri sunt in triplicata ratione ordinatim-applicatarum, erunt invertendo & Ordinatim-applicatæ in triplicata ratione Diametrorum. Cur non etiam dixti, Quoniam numerus senarius est triplus binarii, ergo binarius est triplus ternarii? nempe tam hoc quam illud verum est. Verùm de huiusmodi inversione prius dictum est ad cap. 16. art. 4. nec opus erit quæ ibidem dicta sunt hic repetere. Probationem huius consequentiæ, quam mox promittis exhibendam, mox etiam examinabimus. Interim videamus quæ hic sequuntur.) Si quidem ergo recta *BC* sumatur pro mensura temporis in quo movetur punctum *B*, repræsentabit figura *EKBF* summam omnium velocitatum crescentium tempore *BF*, & figura *DEBC* repræsentabit summam omnium velocitatum crescentium tempore *BC*. (Esto, si libet, & hoc. Vide autem annon, iuxta tuas definitiones, sive loquendi leges cap. 15 & 16. expositas, dicendum esset *velocitatem*, vel si libet, *totam velocitatem*, vel etiam *summam omnium impetuum*, non autem *summam omnium velocitatum*? nisi jam tu velis *velocitatem* hic loci idem significare quod *impetus* eò loci. Quod si velles, monuisses. Non enim Geometræ licet, post expositas vocum definitiones, de unâ significatione in aliam transire, sine vel levissimo mutatæ significationis indicio. Verùm hoc apud te levius erratum est quam ut censuram mereatur. Videamus igitur quid porro?) Quoniam igitur figura *EKBF* est ad figuram *DEBC* in ratione altitudinum & basium compositâ; (esto,) estque ratio

FE ad CD triplicata rationis BF ad BC, (cujus contrarium verum est; est enim subtriplicata:) erit figura EKBF ad figuram DEBC in ratione BF ad BC quadruplicata, (Haud e quidem credo. Dixi enim modo easdem ipsas figuras esse in ordinatim-applicatarum ratione quadruplicatâ; quâ autem jam factum est, ut simul sint in quadruplicata ratione diametrorum? Num eadem est in exposita figura diametrorum ratio atque ordinatim-applicatarum? Sed quid porro?) hoc est, inquis, summa velocitatum, quâ itur tempore BF, est ad summam velocitatum quâ itur tempore BC, in ratione BF ad BC quadruplicata. (Nempe juxta computum tuum. Ego dixissem potius, in ratione triplicatâ subduplicatâ: nam hoc dicendum erat. Verum obiter à te sciscitari liceat, qui tu possis rationem velocitatis tempore BF ad velocitatem tempore BC quadruplicatam appellare, vel rationis temporum vel etiam aliâs cujuscvis? cum per definitionem tuam cap. 13. art. 16. sola ratio majoris ad minus, non autem minoris ad majus, dici possit quadruplicata, aut etiam aliâs multiplicata; rationes autem minoris ad majus, non multiplicatas sed submultiplicatas dici velis. Cujus ne te oblitum esse putemus, tu mox, ut videbimus, illi ipsi definitioni, eique speciatim notioni, pressius insistis. Dic, inquam, quâ fieri possit ut ratio minoris velocitatis ad majorem, uti tu iam affirmas, possit ullâ rationis esse quadruplicata: cum interim omnis ratio rationis quadruplicata, te definiente, sit ratio majoris ad minus? Quam bellè, inquam, hæc cohærent? Scilicet, ut tua solent. Sed perge.) Itaque si mobile in B (vel potius, ipsum B mobile: nam sic tu & supra & infra loqui soles,) moveatur velocitate ita crescente ut velocitas tempore BF acquisita, sit ad velocitatem tempore BC acquisitam, (nempe velocitas hic loci, idem est atque impetus cap. 16. quod autem illic velocitas dicitur vel impetuum summa iam dicitur summa velocitatum: sic enim tibi placet, ne dato quidem indicio, vocum prius definitarum significatus mutare:) in ratione ipsorum temporum BF, BC, triplicata, (nempe si ita sit; at, inquam, ita non est, sed in subtriplicatâ: nam ea est ratio ordinatim-applicatarum ad rationem diametrorum, ex constructione; non triplicata, uti tu jam supponis!) atq; ipsum tempus quo mobile B fertur ad F, sit BF, feretur idem mobile tempore BC per lineam quæ erit in ratione continuâ BF ad BC quinta. (nempe, si sint velocitates, seu, ut jam loqueris, velocitatum summæ in ratione temporum quadruplicatâ. At, inquam, ita non sunt; sed in ratione subduplicata triplicatæ; five, ut tu loqui soles, ut 3 ad 2. Non igitur eo tempore percurratur

percurratur linea quæ ad BF, BC, in continuâ ratione quinta erit, sed quæ erit inter primam & quartam, vel etiam inter secundam & tertiam, media proportionalis. Hoc enim juxta meam computationem dicendum est. Quod tu, si poteris, refelle.)

Restat, inquis, ut ostendamus rationem FE ad CD, esse rationis BF ad BC triplicatam. (Rectè quidem, hoc restat probandum: id nempe est quod, tu modò pollicitus es, & ego etiam ad Græcas calendas factum iri sponendi. Quod si præstiteris, eris mihi magnus Apollo.) Quia ratio, inquis, CD hoc est FG ad FE subtriplicata est rationis BC ad BF, (saltem si, per tuas definitiones, ulla ratio majoris ad minus possit ullius esse subtriplicata,) erit quoque ratio FG ad FE subtriplicata rationis FG ad FH. (Rectè.) quare ratio FG ad FH est triplicata rationis FG, id est CD ad FE. (Esto. quid porro?) Sed in quatuor continuè proportionalibus quarum prima est minima, ratio primæ ad quartam, per cap. 13. art. 16. subtriplicata est rationis tertiæ ad ultimam: (at, inquam, ille articulus & nunc & passim alias tibi fraudi fuit; quod ego ad istum tuum articulum prædixi. Non enim subtriplicata erit, sed triplicata. Per 11 d 5, vel, juxta Clavium 10 d 5. Et quidem tu ipse, non modò alibi passim, sed & in hac ipsa demonstratione aliquoties saltem decies, tantundem asseris, dum rationem minoris ad majus alterius alicujus vocas triplicatam, quadruplicatam, &c, non subtriplicatam &c. nempe pag. 153. lin. 17. FE ad CD in ratione BF ad BC triplicata. Sic lin. 24. ratio FE ad CD triplicata rationis BF ad BC. Ibid. lin. 25, 26. Figura EKBF ad figuram DEBC in ratione BF ad BC quadruplicata. Item lin. 27. 28. Summa velocitatum tempore BF ad summam velocitatum tempore BC in ratione BF ad BC quadruplicata. Et lin. 29, 30, 31. velocitas tempore BF acquisita ad velocitatem tempore BC acquisitam, in ratione ipsorum temporum BF, BC, triplicata. Et lin. 33, 34. ratio quadruplicata designatur per eam quam habet BF ad lineam quæ erit in ratione continua BF ad BC quintam. Lin. 36, 37. ostendendam suscipis rationem FE ad CD esse rationis BF ad BC triplicatam. Et pag. 154. lin. 2, 3. ratio FE ad CD triplicata est rationis FH ad FG. Atque etiam è contra rationem majoris ad minus tu vocas aliquoties subtriplicatam; nempe pag. 153. lin. 37, 28. ratio CD, hoc est, FG ad FE subtriplicata est rationis BC ad BF,

& lin. 39. ratio FG ad FE subtriplicata est rationis FG ad FH. & propterea tu ipse, in eadem hac demonstratione eidem ipsi, cui ipsa innititur, definitionis saltem decies contradicis.) Quare ratio FH ad FG subtriplicata est rationis FE ad CD; (non quidem; sed triplicata.) itaque ratio FE ad CD triplicata est rationis FH ad FG, hoc est BF ad BC; quod erat probandum. (non. inquam, sed subtriplicata. Laudes igitur quas eram pollicitus si illud probaveris, nondum meruisti: manet autem nostra sponsio adhuc inviolata, nempe factum iri ad Græcas calendas.)

Colligi potest, inquis, ex iis quæ jam ostensa sunt, (te esse Geometram quam maximè absurdum, ut qui nescis quid sit ratio triplicata & subtriplicata. Quid autem aliud putas tu hinc colligi posse?) quod ubi velocitas alicujus mobilis crescit in eadem ratione cum temporibus, gradus velocitatis augeri ut numeri deinceps ab unitate, 1, 2, 3, 4, &c. (An inde colligi possit, non disputo; at verum esse concedo; nempe sumptis temporibus ut 1, 2, 3, 4, &c, gradus velocitatis ipsis proportionales erunt etiam ut 1, 2, 3, 4, &c. & quis hoc nescivit?) ubi verò augetur velocitas in ratione temporum duplicatâ, ibi augeri; ut numeri ab unitate omissis alternis. ut 1, 3, 5, 7, &c (non quidem; sed ut numeri quadrati 1, 4, 9, 16, &c; sumptis enim temporibus, ut prius, 1, 2, 3, 4, &c, gradus velocitatis in eorum ratione duplicata, erunt ut eorum numeri quadrati 1, 4, 9, 16, &c.) Denique ubi rationes velocitatum sunt in ratione temporum triplicatâ, ibi graduum progressionem esse, ut numeri ab unitate omissis duobus intermediis, ut 1, 4, 7, 10, &c, Et sic deinceps. (Nullo modo; sed ut numeri cubici 1, 8, 27, 64, &c. qui sunt in triplicata ratione numerorum deinceps ab unitate 1, 2, 3, 4, &c. Et similiter de rationibus aliis judicandum erit. At interim, quæ factum est ut tu iterum tam citò oblitus es definitionis tuæ rationis subtriplicatæ, &c. Annon tu iterum vides rationes quas tu jam vocas duplicatam, triplicatam, &c, (quam rectè, tu videris,) esse rationes crescentes? adeoque minoris ad majus? Monendus es ut in posterum sis magis memor; ut enim sis magis verax, non est sperandum.) Quod tu mox subjungis ut horum omnium confirmationem, Nam ubi proportionales Geometricè in omni puncto sumptæ sunt, eadem sunt cum proportionalibus Arithmeticè: sunt nugæ nugacissimæ. Et mirum est quæ tu possis eouique delirare.

Art. 11. *Spacium à semidiametro & Helice Archimedea circumscriptum* est, inquis, *tertia pars totius circuli.* Quod cum ab Archimede demonstratum sit, à quo tu id habes, an sit etiam tuis principiis congruum, parum refert, donec hæc tua principia, art. 2. exhibita, demonstrata sint quod nondum factum est. Quam autem absurde tu illud colligis, dicetur deinceps ad cap. 20. art. 5.

Art. 12. *Propositionis*, inquis, *jam artic. 2. demonstratae veritas* (*quæq; est eorum quæ diximus de figuris deficientibus fundamentum*) *originem habere videtur in Philosophiâ primâ.* Quam bellè tu eam propositionem art. 2. demonstraveris, nos ad illum articulum ostendimus. Quod autem ex ipsius veritate quæ deinceps dicta sunt de figuris deficientibus dependeant; verum est: adeoque pro demonstratis habenda non erunt priusquam illa propositio sit demonstrata: quod hætenus factum non est. Eorum verò pars magna, non modo demonstrata non est, sed & planè falsa; ut jam ostensum est. Cum autem tu subsidium aliquod illi ex Philosophiâ primâ afferri posse putes: Si tu vel inde vel aliunde aliquid proferas, unde demonstrationem Geometricam formare poteris, nos illud lubentes audiemus. Interim cum tu nil tale proferas non est cur hic diutiùs immoremur. Metuo autem ne tua isthæc opinio de probandis propositionibus geometricis ex Philosophiæ primæ (uti tu loqueris) principiis, tibi sæpius fraudi fuerit: dum illæ pressiores postulent demonstrationes quam tu inde soles proferre. Cujus quidem, ne longe abeamus, exemplum præsto est in articulo proximè insequenti.

Art. 13. *Sunt etiam*, inquis, *aliæ quantitates ex cognitione causarum suarum, nimirum ex comparatione motuum à quibus fiunt, determinabiles, faciliùs etiam quam ex communibus Geometriæ elementis.* (Benè est. Ego, si tu id possis ostendere, faciliorem demonstrandi methodum, si & æquè certa sit, lubentissimè amplexabor. Atque eadem ipsâ de causâ tuarum plerasque, etiam si veræ essent, non tanti facerem quanti fortasse tu facis, quoniam videntur operosè perplexæ etiam ubi faciliores sunt ad manum. Videamus faciliorem tuam methodum, sive ex Philosophiâ primâ, sive motu tuo quem tu tam importune soles inducere ut ut nihil inde soleas promovere) *Exempli gratia, in fig. 7. Quod superficies cujusbet portionis sphaeræ, æqualis sit circulo, cujus radius est ducta à polo portionis ad basis circumferentiam linea recta.* (Nempe est hæc vera propositio; & quidem juxta principia Geometriæ jam recepta, ab Archimede demonstrata, prop.

prop. 40. lib. 1. de Sphæra & Cylindro, unde tu eam, credo, desumis. Videamus autem quàm tu possis illam ex tuâ motuum comparatione faciliùs demonstratam exhibere.) Probabimus, inquis, hoc modo. Sit portio Sphære BAC &c. Hæc, inquam, tua demonstratio, utut facilior fortasse videatur: dubium tamen erit, an ita vera sit, atque Archimedea illa ex principiis Geometricis antehæc receptis ducta. Veram autem non esse hanc tuam demonstrationem ego audacter pronuncio, utut illud quod tu demonstrandum suscipis verum sit atque ab Archimede antehac (ne alios nominem) demonstratum. Quod autem vera non sit, (ne longiùs abeamus,) hinc liquet, quod eadem demonstratio iisdem verbis portioni Conoideos cujuscvis, sive Parabolici, sive Hyperbolici, sive Elliptici, sive aliùs cujuscunque non minus accommodari possit, quam portioni Sphære; quarum tamen omnium portionum superficies, aut inter se aut superficiei portionis sphære, æquales & bases & altitudines habentium, æquales esse, ne tu quidem ipse (nisi admodum insaniveris) affirmabis. Demonstrationem igitur tuam, ejusmodi portionibus quibuscunque verbatim accommodatam, sic accipe.

Sit portio Sphære (vel Conoideos cujuscunque, Parabolici, Hyperbolici, Elliptici, &c.) BAC , cujus axis AE , basis BC , demissa à polo (sive vertice) A , ad basem in B , sit AB , cui æqualis ponatur AD tangens circulum maximum (vel curvam sectione plano per axem factâ emergentem) BAC in polo (sive vertice) A ; probandum est circulum à radio AD , æqualem esse superficiei portionis BAC . Super axem AE revolvi intelligatur planum $AEBD$: describet recta AD circulum; sed AB arcus (seu curva exposita) superficiem portionis sphære (sive Conoideos expositi); denique subtensa, superficiem Coni recti. Quoniam jam eadem est conversio AB rectæ & AB arcus (sive curvæ,) habeantque ambæ eosdem terminos A & B , causa quare superficies sphærica (sive Conoidica) quam facit arcus (vel curva exposita,) major est quàm superficies conica quam facit subtensa, est quòd AB arcus (sive curva) maior est quàm AB recta; causa autem quare major est, in eo consistit, quod, etsi ducantur ambæ ab A ad B , recta tamen rectè ducitur, arcus verò (sive curva) secundum angulum quem facit ipse arcus cum subtensa, qui angulus angulo DAB est æqualis; nam angulus contactus angulo segmenti nihil addit, ut ostensum est (non minùs de contactu parabolæ, hyperbolæ, Ellipsis, aut cujuscvis curvæ, quam de contactu circuli aut peripheriæ) cap. 14. art. 16. quare anguli DAB magnitudo causa

causa est quare superficies portionis quam describit AB arcus (sive curva) maior est quàm superficies conii recti quam describit AB subtensa.

Rursus causa quare circulus quem describit tangens AD maior est quam superficies Conii recti quam describit chorda AB (cum ipsa tamen tangens ipsi subtensæ sit æqualis, & tempus latiorum idem,) est, quod AD ad axem recta est, sed AB est obliqua; obliquitas autem illa consistit in eodem angulo DAB . Cum ergo quantitas anguli DAB faciat excessum tum superficiei portionis, tum etiam circuli à radio AD , super superficiem Conii recti quam describit subtensa AB : tantum superabit circulus à radio AD superficiem conicam, quantum eandem superabit superficies spherica (vel conoidica) ab arcu (vel curvâ) AB . Sunt igitur circulus ab AD sive AB , & superficies spherica (vel conoidica) ab arcu (vel curvâ) AB , inter se æquales. Quod erat probandum.

Vides igitur quâ tua demonstratio facilior, & te iudice, Archimedeâ potior, vel nihil probat, vel probat Conoidum omnium portiones, eandem & basem & altitudinem habentes, superficies etiam habituras invicem æquales. Adeoque, exempli gratiâ, si figura tua huius capitis tertia (quam, si libet, consule) circa axem BC volvatur, tres Conoidum portiones tribus istius figure curvis descriptæ, superficies habebunt, & inter se & circulo à radio BD descripto æquales. Quod quam absurdum sit, tu iudex esto.

Art. 14. Si figuræ deficientes quas descripsimus, in parallelogrammo exquisitè describi possent, possent, inquis, inde inter duas rectas datas, ut interponi mediæ proportionales quot quis voluerit. Rectè quidem. Ecquis enim hoc nescit? At interim annon tu circulum committis satis notabilem: qui art. 4. ad has figuras describendas postulabas mediarum quotlibet inventionem, ad quas inveniendas figuris illis iam descriptis opus esse velis.

Dico insuper, ad id quod tu vis inveniendum, non opus esse tanto, quantum tu adhibes apparatu, sed operatione multò simpliciori perfici poterit. Verbi gratiâ, si duas medias inter duas datas invenire velles, sumptâ ejusmodi aliquâ curvâ quæ ordinatim-applicatas habeat in subtriplicata ratione diametrorum, ut, in fig. 1. CFE , & sumptis in diametro, à vertice, duabus datis vel saltem quæ ipsis sunt proportionales, putâ CH , CG , ordinatim-applicatæ HF , GE , (quæ ex constructione sunt in ratione subtriplicata diametrorum) ostendunt rationem quam habet quatuor illarum proportion-
narium

nalium prima ad secundam, secunda ad tertiam &c. puta ut HF ad GE, sic prima puta CH ad secundam, & secunda ad tertiam, & tertia denique ad quartam CG: vel ut GE ad HF, sic prima, puta CG, ad secundam, & secunda ad tertiam, & tertia denique ad quartam CH. Quorsum igitur tu, præter has, alias etiam nescio quot lineas citra necessitatem condendas velis?

Jam autem, absoluto hoc capite, dicam tibi liberè quod res es. In aliquibus hujusce capituli articulis, videtur sparsim aliquid subesse veri, quod tu tamen tam miserè depravâsti & falsis immiscuisti ut nemo illud, nisi aliunde id sciverit, internoscere possit, aut quidem id ipsum quod verum est agnoscere. Nec quidem ex iis quæ tu hic habes ullo modo poterit dignosci; quippe quod tu neque id demonstras, neque ea profers principia unde demonstrari possit. Et quidem certum est iis quæ tu hic obtendis mediis neque tu neque alius quispiam vel eo pervenit, vel pervenire potuit; cum ne huc spectent quidem: sed te potius tanquam tot ignes fatui aliò deducunt, quorum dum tu ductum sequeris non mirum est te in lacus & paludes incidisse. Memini te alicubi conquestum esse, *Academiarum Vindicem*, quem vocas, te plagii inculpasse. An illud ille totidem verbis fecerit, nescio; (credo autem id eum non fecisse;) quàm autem, si fecerit, non sine causâ fecerit, tu aliquando fortasse ab illo audies, & quidem citiùs quam tibi gratum erit. At interim, eorum aliqua quæ tu hic habes, qui vera esse sciverit, (quod ex tuâ traditione ne suspicaretur quidem,) quamvis fortasse unde tu habueris non noverit, tua tamen non esse certissimum esse pronuntiabit (nisi quo sensu loquitur Poeta, *Tu malè dum recitas efficis esse tua,*) quippe manifestum est, te isthæc non intelligere; sed, undecunque habueris, tam miserè depravas ut ne ipsi quidem authores agnoscerent. Ego quidem eorum aliqua (neque tamen adeo multa) pro veris statim agnoscebam, non quia quæ tu habes illud suaderent, sed quod ipse ante aliquot annos eadem (inter alia multa majoris momenti) invenerim; dum autem avidus quærebam quid tu huc perveneris, id ex demonstrationibus tuis repertum iri ratus, mea me planè spes fefellit, nihil istuc repertiendum est unde quis huc deduci possit. Adeoque mirari planè cæpi vel fortunas tuas, si nempe per tot errores in veritates hæc forte fortuna incideris; vel infortunium, si (quod dicendum videtur) propositiones tu veras alicubi nactus, demonstrationes falsissimas tam infeliciter adjunxeris, ut necesse sit qui has legerit, statim concludat, nec tuas

illas esse nec quidem à te satis intellectas. At, inquires, quorsum ego te tam inhumaniter plagii incusem, nisi & possim dicere unde habueris? Nolo ego illas à me surreptas insinuare, quamvis enim ego quicquid subest veri, jam ante aliquot annos inveneram, & amicis aliquot meis communicaveram, tamen horum aliquid ab iis tibi innotuisse neque certus scio, nec quidem firmiter credo: At interim te illas alicunde habuisse, nec à te primitus inventas, ego saltem suspicor, & suspicantur mecum alii, quippe tu nec eas demonstrare vales, nec quidem ostendis quibus tu huc mediis perveneris. Liceat igitur historiam tibi narrare, quæ non ita pridem accidit ruri nostro. (neque enim est ficta fabula.) Deprehensus est quidam, suspectæ fidei, equo insidens generoso; dubitatum est, an suus sit: trahitur ille ad magistratum: de equo interrogatus, nil certi respondet; suspecta res est; carceri mandatur: hinc statò tempore eductus, sistitur ad tribunal: postulatur furti, quòd equum ab ignotâ personâ sit furatus: Equum habuit, hoc certum est; cujus fuerit, incertum: quæritur, unde, à quo, & quibus ille mediis legitimis acquisiverit? ille interim cunctatur, hæsitat, tergiversatur, causatur fortè se proximis illum nundinis emisse: quod, re perpensâ, repertum est secus esse: quid plura? reus tenetur, atque ad patibulum damnatus est. Tu pariter (absit autem omen) propositiones aliquot habere veras deprehenderis; unde habueris, incertum: suspectum est, tuas non esse, quippe veræ sunt (cum soleant tuæ esse falsæ,) sed & altioris fortasse speculationis, quam cujus qui reliqua legerint te unquam reum esse suspicentur: quæritur unde habueris, aut quibus tu mediis legitimis eò perveneris: tu demonstrationes tuas obtendis, quas ubi examinavimus, falsas esse deprehendimus, & quidem iis quæ tu obtendis mediis eò te pervenire non posse certum est. Quidni igitur plagii vel doli mali reus habear? (utut non magis constet unde habueris, quam à quo equum ille sit furatus;) nisi tu tandem ostendas, te, non inconsulto authore, sed bonâ cum ipsius veniâ hoc fecisse?

Quænam autem ea vera sunt de quibus jam agitur: ex iis quæ tu profers, neutiquam constat: tu enim quæ vera sunt, non melius demonstras, quam quæ falsa. Eorū igitur veritas aliunde quam ex tuis dictis erit ostendenda. Verum illud hujus loci non est.

In CAP. 18.

CApite 18. rem fateor, arduam suscipis; nempe curvis rectas æquales invenire. Atque hoc te satis feliciter assecutum esse

esse confidis. Sic enim sub finem gloriaris. Exhibere itaque possumus curvis Parabolæ & Parabolastrorum omnium, quæ sunt in Tab. ar. 3. cap. 17. rectas æquales. Hoc autem, nequis parum esse judicet, & debitis tibi laudibus tribuendis desit; tu opportunè & hoc statim mones? Quamquam antehac nemo ullam curvam cum ulla recta comparare potuit, & plurimi omnis seculi Geometra summo conatu id tentârunt.

Videamus igitur quam strenuè hæc parta est victoria de qua triumphus agitur. Vereor autem (imò certus sum) quod de Phaetonte olim, de te pariter dici posse, — magnis tamen excidit ausis; Nempe tu ante victoriam triumphum canis.

Art. 1. Sit, inquis, linea Parabolica data ABC , in fig. 1. Inveniat^r Diameter AD , ducaturque basis DC , & compleatur Parallelogrammum $ADCE$, jungaturque AC , & divisa AD bifariam in F ; sumatur inter AD , AF , media proportionalis AG , ducaturque GH æqualis & parallela basi CD ; postremò jungatur AH . Dico duas rectas AH , HC , in directum positas, constituere totam æqualem lineæ curvæ Parabolicae $A B C$. Hæc tua propositio.

Quindicam tibi: Propositio illa tua, unde hæc tibi petendæ sint laudes, est prorsus nihili: eamque adjunctam habet demonstrationem quam ego vitiosâ nuce non emerem? Quippe tota dependet, uti tu citas, ex cap. præced. Art. 8. (lege potius cap. 16. art. 9.) & cap. 16. art. 13. Quàm autem tu miserè nugeris in duobus illis articulis (putà cap. 16. art. 9, & 13, ut & art. 18. qui etiam huc spectat,) jam suprà ad illos articulos dictum est: nec opus ut quæ illic dicta sunt hic repetam, cum tu illa ibidem videre poteris. Et revera, ut dicam quod res est, tam puerilia sunt & planè nugatoria quæ tu illic habes, ut pigeat ea sæpiùs proferre, & multò quidem satius esset tibi que consultius ut unâ liturâ deleantur. Nolo igitur prolixam quam tu hic habes demonstrationem, iis principiis nixam, repetere, eique *κατὰ πρόσω* respondere, ne nauseam crearem: præsertim cum ne tu quidem ipse negabis, sublatis iis quos diximus articulis, hanc totam etiam demonstrationem corruturam.

Non mirum autem est, demonstrationem vitiosam esse: nam & ipsa propositio falsa est, adeoque non demonstrabilis. Quod quidem si dubites, ego hæc demonstratione evincam.

Manente figurâ tuâ; Semiparabolam ABC tangat recta CO , quæ tangenti in vertice, occurrat in O , diametro productæ in P ; adeoque (propter Parabolam) $AD = AP$ (ut notum est,) & propterea $AO = OE = \frac{1}{2} CD$. His ita constructis, ponatur

AD vel EC=1, DC vel AE $\sqrt{10}$, ergo EO= $\sqrt{2,5}$. & COq
 = CEq + EOq = $1 + 2,5 = 3,5$. ejusq; radix CO = $\sqrt{3,5} =$
 1,87083 ferè; cui si addatur OA = $\frac{1}{2}$ CD = $\frac{1}{2} \sqrt{10} = 1,58114$
 ferè; fiet tota CO + OA = 3,45197 ferè. At verò secundum
 te, cum sit AD=1, AF= $\frac{1}{2}$, erit AGq (= AD $\times$ AF) = $1 \times$

$\frac{1}{4} = \frac{1}{4}$; cui si addatur GHq = DCq = 10, fiet 10,5 = AHq,

ejusque radix $\sqrt{10,5} = AH$, cui si addatur HC = AD - AG
 = $1 - \sqrt{0,5}$, fiet tota AH + HC = $\sqrt{10,5} + 1 - \sqrt{0,5} =$
 3,53326 & amplius, cui tu curvam ABC æqualem esse asseris.
 Adeoq; majorem facis ABC curvam, quam est ambiens AOC,
 (ex duabus tangentibus AO, OC, conflata,) quod est abiurdum.

Eodem modo, si ponatur AD vel CE=2, DC vel AE=6,
 ideoque AO vel OE=3, & COq = CEq + OEq = $4 + 9 =$
 13, ejusque radix CO = $\sqrt{13} = 3,6056$ ferè: cui si addatur
 AO=3, fiet tota CO + OA = 6,6056 fere. At verò, secun-
 dum te, cum sit AD=2, AF=1, erit AD $\times$ AF = $2 \times 1 =$
 2 = AGq, cui si addatur GHq = DCq = 36, fiet 38 = AHq,
 ejusque radix $\sqrt{38} = AH$, cui si addatur HC = GD = AD
 - AG = $2 - \sqrt{2}$, fiet tota AH + HC = $\sqrt{38} + 2 - \sqrt{2} = 6,7502$
 & amplius. Adeoq; si illi æqualis esset (uti tu asseris) curva ABC,
 esset hæc maior quàm AOC sive tota AO + OC, quod est absurdum.

Si sumatur AD=1, DC=2, erunt Aggregata duarum AH +
 HC, & duarum AO + OC, invicem æqualia: adeoque neutrum
 æquale lineæ Parabolicæ, quod tu putas. Si autem inferiùs
 in Parabola sumatur ordinatim-applicata, ut diametri duplo mi-
 nor sit, duæ tuæ AH HC minores quidem erunt quam duæ
 tangentes AO OC, majores tamen adhuc aliquando quam cur-
 va Parabolica, ut plurium tangentium ope demonstrari poterit,
 aliquando etiam minores quod inscriptarum ope demonstrabitur.

Non est igitur exposita curva parabolica inventæ rectæ æqua-
 lis: quod erat demonstrandū. Ruit igitur, quod tu construxeras,
 quippe quod nullo fundamento nixum.

Si verò, propterea quod mensura tua sit aliquando iustâ maior,
 aliquando iustâ minor, putaveris igitur alicui saltem parabolæ
 æqualem esse: Fatemur quidem illud verū esse. Nempe recta tua
 est alicui Parabolæ æqualis (quod nemo unquam dubitavit: cum
 illud de qualibet rectâ verum sit:) cui verò, nescis: utut illud af-
 firmaveris de omnibus. Si verò rectam parabolicæ non quidem
 accurate sed quam proximè æqualem desideres: discas licet ex
 nostra

nostra *Aritmet. Infinit. prop. 38.* ubi illam exhibuimus.

Art. 2. Idem proponis de *Parabolastro primo*, quod in artic. præced. de Parabola: Nempe *Linea curvæ Parabolastri primi, sive Parabolæ cubicæ, rectam invenire æqualem*, & pari quidem successu. Constructio est præcedenti similis. Demonstratio nihilo melior: (ut enim illa ex cap. 16. art. 9, & 13. sic hæc ex eiusdem cap. art. 10. & 14 dependet, quos eiusdem esse farinae ad illos articulos ostendimus.) Sed & eodem modo refelli potest.

Constructio tua hæc est. Sit *linea curva parabolastri primi* (in fig. 2.) *ABC*, & *semiparabolaster iste ABCD*, in quo triangulum super eandem basem & eiusdem altitudinis *ACD*, & circa semiparabolastrum fiat parallelogrammum *ACDE*, & sumatur *AF* tertia pars diametri *AD*, & inter rectas *AF*, *AD*, sumatur media proportionalis *AG*, & ducta *GH* æquali & parallelâ *CD*, iungatur *AH*. Dico duas rectas *AH*, *HC*, simul sumptas, constituere rectam æqualem curvæ *ABC*.

Hoc autem falsum esse sic demonstro. Manente tuâ figurâ: ducatur ut prius recta *CO*, tangenti verticis occurrens in *O*, & diametro productæ in *P*. Erit ergo (per pr. 46 tractatûs nostri de *Conicis sectionibus*) $AD = \frac{1}{3} PD$: $OE = \frac{1}{3} DC$, & $OA = \frac{2}{3} DC$.

His ita constructis, ponatur AD vel $EC = 3$, $DC = 9$, ideoque $EO = 3$, $OA = 6$, & $COq = CEq + EOq = 9 + 9 = 18$, eiusque radix $\sqrt{18} = 4, 243$ ferè: cui si addatur $OA = 6$, fiet tota $CO + OA = 10, 243$ ferè. At verò, secundum te, cum sit $AD = 3$, $AF = 1$, erit $AD \times AF = 3 \times 1 = 3 = AGq$, cui si addatur $GHq = DCq = 81$, fiet $84 = AHq$, eiusque radix $\sqrt{84} = AH$, cui si addatur $HC = GD = AD - AG = 3 - \sqrt{3}$, fiet tota $AH + HC = \sqrt{84} + 3 - \sqrt{3} = 10, 433$ & amplius. Adeoque si illi æqualis esset (uti tu asseris) curva *ABC*, esset hæc maior quam ambiens *COA*, sive $CO + OA$. quod est absurdum.

Art. 3. Idem suscipis de *Parabolastris aliis*. Sed eodem successu. Et quod eodem modo refutabitur. Atque hætenus tua victoria. Jam Io triumphhe!

Exhibere itaque possumus, inquis, curvis *Parabolæ & Parabolastro* omnium quæ sunt in *Tabella art. 3. cap. 17. rectas æquales*. (Imò, inquam, neque omnium, neque ullius,) quamquam antehac nemo ullam curvam cum ulla recta comparare potuit, & plurimè omnis seculi *Geometræ summo conatu id tentârunt*. (Quàm igitur dolendum est, te tantis ausis excidisse, unde tantam sperabas tibi futuram gloriam, quæque tibi tantam præberent triumphan-

triumphandi materiam !) Cujus rei, inquis, causa est, quod cum nulla æqualitatis definitio tradita sit ab Euclide, (nec opus ut tradatur, quippe quæ erat vox significationis satis notæ;) neque ullam æqualitatis *ὑποτίθηται* præterquam (quod est in Axiom. 8. primi El.) congruentia, (Imò alia multa passim, quis enim dubitat, Euclidem sæpius eorum æqualitatem probare, quæ interim non congruunt. Quin vide, Annon tu ipse cap. 8. art. 13. Æqualitatem per Congruentiam definias? (quam accuratè tu vide.) nempe *Æqualia* ea definis esse corpora quæ eundem locum possidere possunt: & similiter de Temporibus, Velocitatibus, Motibus, &c. æqualibus, art. 16, 17, 18. nec aliam, ni fallor, uspiam habes Æqualitatis definitionem. Sed perge) quæ in comparatione curvi & recti nullius est usus. (Nempe, Tibi.) Posteriores, excepto Archimede & Apollonio (aliisque multis) & nostris temporibus (præter multos alios) Bonaventura, (& præ omnibus excepto etiam Thomâ Hobbes Malmesburiensi; nonne?) nihil esse in Geometria ultra horum industriam existimantes, (At quis quæso ita existimavit? num omnes? putan' tu Orontium & Josephum Scaligerum, qui tibi in Cyclometticis præiverunt, sic cogitasse? vel putas tu, post Archimedis & Apollonii tempora, nihil unquam in Geometria fuisse præstitum, præterquam à Te & Bonaventura Cavallerio? Putan' tu Canonis Trigonometrici perfectionem, Logarithmorum inventionem, Arithmeticæ speciosæ praxin, Analyticen redivivam & insigniter auctam, vel etiam, ne plura nominem, Figurarum Numeralium inventionem, calculique inde facilitationem incredibilem, si ad tua comparentur, res esse nihili? aut etiam ad Geometriam neutiquam spectare? Sed perge.) omnia ex eorum scriptis deducenda esse, aut inventu impossibilia putaverunt. (Tu autem dum ad ea te transfers quæ nec in eorum scriptis sunt, nec ab iis ullo modo deduci possunt, vides quam te præbeas ridiculum.) Et disputatum est à quibusdam antiquorum, an æqualitas possit esse nisi inter rectas. (Dic quæso quidam illi fuerint vel antiquorum vel recentiorum qui tam insani fuerint ut illud disputent. Putan' tu unquam aliquem dubitasse an sicut rectæ rectis sic curvæ curvis æquales esse possint? Numquis unquam, credis tu, dubitavit circulorum, quorum diametri sunt æquales, eorum perimetros item æquales esse? Fieri quidem potest ut aliqui dubitaverint, num curva rectæ æqualis esse possit: at certe nemo unquam putavit æqualitatem nullam nisi inter rectas esse.) quam, inquis, questionem Archimedes, qui sumpsit esse aliquam rectam circulo æqualem, videtur merito

merito contempsisse. (Et tu quidem, dum ostendis quænam sit illa recta, rem ultra omnem controversiam posuisti; nonne?) Sunt, inquis, qui sentiunt inter rectam & curvam æqualitatem quidem aliquam esse, sed inveniri non posse nunc; nunc, inquiunt, post Adami lapsum, nisi speciali divina gratiæ auxilio. Tu autem te etiam sine divino auxilio, invenisse putas; nonne? Scilicet, quia tam bellè peregeris.

Atque jam quidem me statim ad sequentia capita conferrem, nisi quod videam ea quæ tu hic habes severiori adhuc censurâ indigere. Sentio enim quàm hæc de divina gratia speciali, Scepticè dicta sunt & *αυθαίμακός*. Nempe tu tuo Marte te invenisse jactitas quod alii non sine speciali divina gratiæ auxilio inveniri posse sperabant. Lucianum, memini, tu in epistola laudas, à quo, inquis, irrisi sunt Philosophi: Lucianum, inquam, impurum illud os & Atheum; qui non tantum Philosophos sed & Deos irrisit, neque quia falsos sed quia Deos. Et tu pariter non contentus videris reliquos ante te Geometras ludificare, nisi & divina gratiæ insultes: Quam tu fortasse in eodem censu habes cum Religione Christianâ, quam in eadem tua Epistola, sub Atheniensis Empusæ comparatione, scurriliter defamas. Quod de Adami lapsu subjungis, sarcasnum auget: nempe inveniri non posse nunc; nunc, inquiunt, post Adami lapsum.

Quinam autem illi sunt quos hoc dictorio perstrictos vis, ego planè nescio. Nullos enim esse puto, qui, de hac nominatim quæstione, id tuis verbis affirmaverint; neque aliter ad hoc quam ad alia Naturæ mysteria enucleanda Divinæ gratiæ auxilio opus esse putant. At interim ego non diffiteor complures esse; & me quidem ex eo numero unum, qui non tantum in iis quæ ad æternam salutem immediatè spectant, verùm & in rebus quotidianæ vitæ, & speciatim in studiis sive Philosophicis sive Mathematicis, Divino putant opus esse auxilio, eoque gratuito. (Si enim à Deo edoctus sit Negotiator *discere*, Deut. 8. 18. aut etiam Colonus *terram colere*, Isai. 28. 24. 25, 26. quidni & Geometra *μετρεῖν*?) Neque illud tantummodo post lapsum, sed & ante, (non enim post lapsum primò suscepit Deus rerum nostrarum curam.) At interim Intellectûs nostri vires Adami lapsu multùm imminutas, nemo sobrius dubitabit; ut, quâ indiguimus Divinâ gratiâ, nunc adhuc magis indigeamus; neque illud ad præsentem tantùm sub manibus disquisitionem, sed & ad alia nostra negotia feliciter exsequenda.

Verùm tu fortasse totam de Adami lapsu historiam pro fabulâ habes, & ironicè inducendo sannæ materiam facis. Quod quidem

quidem de te mirum videri non debet, cum tu *Religionis*, id est, inquis, *Dei honorandi colendiq; regulas à Legibus petendas esse voles*, eoque *Exorcismo Empusam illam* (*Religionis Christianæ*) *exterritam atque abactam fore speras*. (Dum tamen tu ægrè feras ut *Religionis inimicus* habeâre.) Neque absolum illud est quod alibi habes de *Mundi Origine*; nempe non argumentis aut rationibus rem illam discussam vis, sed à Magistratu determinandam: Quasi quidem illud ex sacro codice non satis constet; aut à Magistratum suffragiis adhuc dependeat, num mundus olim originem habuerit necne. At quorsum ego sacrum codicem nomino? quem tu eadem forte religione colis, atque Religionem ipsam Christianam: nempe tantam tu illi concedis auctoritatem quantam ipse à Civili Magistratu obtinuerit, aliamque illi omnem derogandam vis: quasi quidem penes Magistratum sit, non modo an *Mundus aliquando inceperit*, sed & an *Sacra Biblia sint Dei verbum necne*. Sed neque de ipso Deo, quam de *Verbo Divino*, videris multo magis esse sollicitus, quem pari, credo, facilitate paratus es ablegare. Dum enim pro ridiculo habes, & quod nullâ unquam imaginatione concipi possit, ut quicquam uspiam ^{sub} existat quod corpus non est; adeoque (ut in calce hujus tractatus) *Substantias incorporeas omnes ad inania scholasticorum verba amandandas velis*; quis non videt te non modo *Angelos*, atque *immortales Animas*, sed & *Deum ipsum Optimum Maximum*, tantum non *pntes* abnegare; & nisi id *Legibus* cautum esset, (quæ tibi summa est *Dei honorandi atque colendi regula*,) id palam esse professurum. Et quamvis tu *Dei* nonnunquam atque *Scripturæ Sacræ* obiter memineris, (nescio an & *immortalis Animæ*,) meritò tamen dubitandum videtur annon pro more tantum atque ironicè potius, quam seriò atque ex animo, id facias.

At verò tutum non est ita cum sacris ludere. Delicata res est, mihi crede, quam tu contemptui habes, *Divina Gratia*, neque tua scommata patietur. Zelotypus ille Deus est, cujus tu mysteria vilipendis. Perpende tecum seriò, & maturè de *malitia tua respisce, Deumque, quem læseris, Optimum Maximum supplex venerare*, quò forte tibi remittatur *machinatio cordis tui*; & specialis illa, quam tu insulsè contempleris, *affulgeat Divina gratia*: Metuo enim ne & reliqua illa te spectent; *Perfentio etenim te in amarissimo felle, & impietatis vinculo, detentum esse*, neque tibi partem ullam neque sortem esse in hoc negotio

Gotio ; quippe cor tibi rectum non est in conspectu Dei. Neque id interim tu nihili putes, quod, quo loco tu tanto fastu Divinæ insultas gratiæ, eodem te exponas ludibrio; nam ea omnia quæ tu hic jactas (sed & quæ deinceps etiam, ut cap. 20. videbitur,) merè falsa sunt, & nullius pretii, ut potiùs *Veniam pro Laude petas.* *Ecquis enim tibi fructus est ex iis, de quibus jam erubescas?*

Sed videamus reliqua. Nam de his conclamatum est. Nec quicquam dictum est in hoc capite quod tu ipse non indictum malis. Mirum enim est qui semper proficias in pejus. Nempe in capitibus præcedentibus habuisti pauca vera falsis intermixta; hic falsa omnia.

IN CAP. 19.

Capite 19. de Angulis Incidentiæ & Reflexionis agis.

Quam autem habet illud vel cum antecedentibus vel cum consequentibus connexionem, ego non video; neque ullam methodi rationem. Sed esto; cohæreant sicut arena sine calce: parum id refert, modo vera sint quæ hic habes. De methodo enim non est ut multum simus solliciti.

An autem *Angulus Incidentiæ & Reflexionis sint æquales*, tu non hic inquiris: sed, hoc concessio, *non rei causas, sed consequentia aliqua investigare satagis.* Videntur autem methodi leges postulasse, ut huic saltem capiti præposuisses illud quod jam est cap. 24, vel hoc illi postposuisses. Quippe tu illic definiendo doces, quid sit *angulus incidentiæ*, quid *angulus reflexionis* (quæ quidem definitiones præire debuissent huic tractationi, & non post intermissa tot capita postponi,) atque etiam affirmando determinas *angulum reflexionis angulo incidentiæ æqualem esse*: quod quidem cum hujusce capitis tractatio supponendum postulet, cur tu illud non præmiseris ego non video. Sed, ne simus de methodo nimis solliciti, te sequar.

Putabam autem, primo intuitu, fieri posse ut hic inoffensus transirem. Vidi enim rem quæ agitur non admodum difficilem esse, neque speculationis admodum profundæ, sed in qua quilibet etiam Geometriæ tyrunculus, nedum vir tantus quantus tu haberi velles, tutò se posset exercere. Verùm & hic me video luto detentum, nec posse ad sequentia sicco pede procedere,

Art. 3. hæc tradis. Si in circuli circumferentiam à duobus punctis extra circulum sumptis incidant duæ rectæ parallelæ, earum reflexæ productæ introrsum facient angulum duplum ejus qui fit à rectis à centro ductis ad puncta incidentiæ. At hoc, inquam, variis nominibus vacillat. Neque enim semper angulum faciunt, possunt enim esse parallelæ; neque, cum faciunt, semper introrsum faciunt, sed nonnunquam extra circulum; neque hunc faciunt angulum earum semper productiones introrsum sed nonnunquam reflexarum altera cum alterius introrsum continuatione etiam ultra circulum productâ, nonnunquam etiam utraque reflexa: neq; denique angulus factus est anguli ad centrum semper duplus. Atque hoc, ne longas necesse ambages, sola inspectione schematis patebit. Si enim (in figura nostra) circumferentiæ circuli, cujus centrum C, rectæ incidant parallelæ, Aa, Bb, Dd, Ee, Ff, Gg, Hh, Kk unde reflectantur aA bβ, dδ, ee, ff, gg, hh, kk quæ introrsum, ubi opus, producantur. Concurrent quidem βb, δd, introrsum productæ in L, eritque angulus βLδ duplus anguli βCδ; & similiter βb, ff productæ facient angulum fMb duplum anguli fCb; (atque hic est unicus ille casus cujus tu solius demonstrationem aggredieris, nesciens id multis modis variari posse:) At βb hh, utcunque productæ nunquam coibunt, sed parallelæ erunt: sic & ee, kk, parallelæ: γg, δd introrsum productæ, angulum non facient, sed eandem constituent rectam; δd, hh, continuatæ, coibunt quidem introrsum in N, facient autem angulum dNh, non duplum anguli dCh, sed dupli residuum ad quatuor rectos: hh, ee, introrsum productæ, coibunt quidem, sed ultra circulum continuatæ, in O, angulumque facient hOe, non duplum anguli hCe sed dupli residuum ad quatuor rectos: eadem hh introrsum producta, sed & ultra circulum continuata, concurret ipsi ff, non introrsum sed extrorsum productæ, in P, angulumque faciet fPh, non duplum anguli fCb, sed ipsius residuum ad duos rectos: bn, kk, concurrent quidem, non introrsum sed extrorsum continuatæ facientque angulum hQk, duplum anguli hCk: ee, βb, coibunt in ipso puncto b, ipsâ βb ne omnino continuatâ; sic βb, kk, coibunt in ipso puncto k, angulumque facient bkk, non duplum anguli bCk; sed dupli residuum ad quatuor rectos. Quæ omnia, si opus sit, facile demonstrantur. Cum enim angulus, rectis incidente & reflexâ contentus, sit duplus distantia à diametro utrivis paral-

la, puta angulus $Bb\beta$ duplus anguli Bbc , hoc est ACb , & $Dd\delta$, duplus anguli ACd , &c.) reliqui anguli omnes calculo statim innotescunt.

Cum autem tu propositionem habueris $\mu\lambda\upsilon\pi\tau\omega\tau\omicron\nu$, variis casibus obnoxiam, istius $\mu\lambda\upsilon\pi\tau\omega\sigma\iota\alpha\varsigma$ sive nescius sive negligens, quod in uno casu deprehenderas tu statim universaliter effers. Quod quidem tyrunculo condonari posset: At verò in tanto aliorum censore, totiusque instauratori non Matheseos tantum sed & Philosophiæ, (præ quo aliorum scripta nil aliud censenda sunt quam *Phantasma quoddam, Philosophiæ aliquatenus simile, quam incauti homines Philosophiam esse arbitrati sunt,*) neque expectandum erat, neque est ferendum.

Demonstratio tua, quam tu unico illi casui adaptas, si reliquis applicetur statim evanescet: reperietur enim aliquoties petitione principii, variisque pseudographematis laborare, quæ, cum cuivis obvia sint, intacta propterea dimitto. Corollarium item, quod adjungis, non magis firmum est quam propositio principalis. Sed & idem in sequentibus peccas multoties.

Artic. 4. Est præcedenti omnino similis, & eodem morbo laborat. Si ab eodem, inquis, puncto extra circulum duæ rectæ incidant in circuli circumferentiam, earum reflexæ productæ introrsum, facient angulum æqualem duplo angulo qui fit à duabus rectis ductis à centro ad puncta incidentiæ, unà sum angulo quem faciunt ipsæ incidentes.

Hoc, inquam, falsum est: non enim illud universaliter continget. Fieri enim potest ut reflexæ illæ angulum non omnino faciant, sed sint in directum positæ; & quidem, ubi faciunt, non semper intra circulum, sed nonnunquam extra; neque ipsæ introrsum continuatæ, sed altera introrsum altera extrorsum, vel ne omnino quidem; neque quem faciunt angulus est ille semper quem tu assignas, sed alius ab illo satis diversus. Quæ omnia eadem facilitate ostendi possunt atque in præcedente articulo.

Demonstratio etiam pariter atque illa prior vacillat; quippe quæ uni aptata casui aliis inepta est; & principium petit. Sed & Corollarium pariter vacillat. Quæ omnia cum cuivis obvia sint, non est ut lectorem diutius detineam ea fusiùs ostendendo, quæ ipse si tua perlegerit non potest non videre.

Artic. 5. Idipsum peccatur. Nempe quas tu concursuras dicis non semper concurrent: neque cum concurrunt ita concurrunt

currunt uti tu vis, nec eos semper angulos faciunt quos tu assignas. Quod cum facile ostensu sit pari modo atque in præcedentibus, non opus est ut his insistam. Mirum autem est quod tu adeo cæcutias ut isthæc non videris.

Artic. 6. & 7, non tanti sunt ut multum operæ illis impenderem: quanquam & illic non desint quæ sint animadvertenda, quæ ut festinem, prætereo.

Artic. 8. Tu quasi malleum adducis quo occidas muscam. Problema nempe facillimum laboriosâ & constructione & demonstratione aggredieris, quod vel levissimo negotio faciendum erat, nec quicquam habet difficultatis. Nempe, *Datis in circuli circumferentia duobus punctis, ita ad ea puncta duas rectas ducere ut earum reflexæ sint parallelæ, vel ut contineant datum angulum.* Quid enim aliud opus est, ad hoc problema construendum, quam ut ad data puncta, puta (in figura nostra *b, d,*) ponantur utcunque rectæ, quæ vel parallelæ sint vel datam habeant inclinationem, puta *bB, dD,* vel *b3, dD;* quarum reflexæ sint incidentes quæsitæ: Nam, si quæ jam reflexæ sunt, fiant incidentes; quæ jam sunt incidentes erunt earum reflexæ; quæ &, per constructionem, vel sunt parallelæ, vel debitam habent inclinationem.

Tu verò, quasi quid magnum esset hoc præstare, eam profers & constructionem & demonstrationem, quæ duarum paginarum (pag. 167, 168,) maximam partem replent. Quibus interim tu vix aliud demonstras, quam te rem facillimam haud satis intellexisse: Nam & quam profers constructio & demonstratio, cum totæ dependeant ex art. 3, & 4, qui vitiis plus satis scatent, uti jam ostensum est, non expectandum esset ut sint admodum sanæ. Eas tamen, qui volet, apud te legat, ut videat quam tu operosus esse possis in re leviculâ.

Verùm id tu ubique fere peccas in hoc capite, quod propositiones limitandas, & variis determinationibus obnoxias tu universaliter effers, ubi autem limitatione opus non est (saltem non eâ) tu limitationem adjungis, ut utrobique ostendas, quam tu illas parùm intellexeris. Nihil autem est in toto hoc negotio difficile, si quis animadvertat (quod & prius monui ad art. 3.) angulum incidente & reflexâ contentum, (sive in peripheria concava sive convexâ,) duplum illius esse, quem, cum diametro utriusque parallelâ, recta facit à puncto incidentiæ ad centrum ducta.

Sta. Quo cognito ; reliqui qui ex reflexarum qualicunque coitione formantur anguli , ope 32 e 1 (de trianguli tribus angulis , duobus rectis , æqualibus ,) statim innotescunt. His igitur relictis , ad capitis sequentis considerationem me accingo , quò promissa *Circuli Quadratura* , *Angulique in data ratione sectio* , *Rectæque tum Circuli perimetrum tum spirali Archimedea æqualis inventio* , aliaque hujusmodi mira , me vocant.

In CAP. 20.

AD Cap. 20. jam devenimus, quod *De Dimensione Circuli ; & Arcuum, sive Angulorum Sectione* : inscribitur. Hoc autem caput fuisse video saltem bis impressum , si non & ter , ob toties variatam animi tui sententiam. Cùm enim quam primò imprimendam curaveras circuli quadraturam , amicorum judicio tu parum fuisse sanam intellexeras ; aliam substituísti nihilo meliorem : hanc autem cum (iisdem fortè monentibus amicis) neque admodum sanam videris ; petis ut quæ de *Dimensione Circuli & Angulorum* pronunciata sunt tanquam exactè inventa , accipiat Lector tanquam dicta *Problematicè*.

At verò , quid illud est , in Geometria , *Problematicè dictum* ? Solemus quidem in Geometriâ propositiones alias *Theoremata* appellare , alias *Problemata* , (sed & aliis nominibus alias , puta *Corollaria* , *Lemmata* , *Definitiones* , *Axiomata* , *Postulata* , &c.) Ex quibus quidem Theorema *enunciativè* proferri solet ; & , quod asseritur , proponitur probandum ; Problema verò *imperativè* ; & quod imperatur , proponitur faciendum : (Adeoque apud Euclidem , Theorema his verbis absolvi solet , $\delta\ \pi\epsilon\rho\ \epsilon\delta\epsilon\iota\ \delta\epsilon\iota\chi\epsilon\iota$: his autem Problema $\delta'\ \pi\epsilon\rho\ \epsilon\delta\epsilon\iota\ \pi\omicron\iota\nu\sigma\alpha\iota$.) Quid igitur est quod vis , dum hæc ut *Problematicè dicta* accipienda petis ? Num te *Problema* proposuisse ? (id quisque facere potest : quis enim non valeat dicere , *circulus quadretur*) ? An , te *Problema* absolvisse ? (O , utinam ! inquis.) Si neutrum horum ; quid igitur ? Num te *Problema* conatu irritato aggressum esse ? Si hoc intellegimus vis ; voti compos es : nos siquidem illud satis intelligimus.

Fortasse tu , per *Problematicè dicta* , intelligis , *probabiliter dicta* , adeoque vis ut hæc non tanquam argumento certo & demonstrativo , sed

sed saltem probabili conclusa lector habeat.

At, inquam, 1. Quis unquam ante te Geometra *Problematis* vocem hoc sensu usurpaverit? 2. Aut etiam quid opus est, in Mathematicis, argumento probabili? quippe demonstrationibus hic agenda sunt omnia. 3. Sed cur saltem ut *probabiliter dicta* accipienda erunt? Nempe tu, *post excusa hæc, tetragonismo antecedenti posse adhuc aliquid objici animadvertisti.* At verò, annon tu etiam animadvertisti num illud possit verè objici, necne? (Nempe tantum Geometram, num quod objicitur rectè obiiciatur necne, modò examinare velit, latere posse non putandum, credo, velles.) Si enim objici possit, non autem rectè objici, quidni igitur pro Demonstrato habeatur ille tetragonismus? Sin autem rectè objiciatur, cur igitur isthæc ut Probabiliter dicta haberi velles? & non potius, uti sunt, ut planè Falsa? Quid hæsitas igitur? Dic rotundè; (nam hoc dicendum erat,) Cum, *post excusa hæc, tetragonismum antecedentem* (utut emendatum, adhuc falsum esse, ab amicis indicatum fuerit; *visum est eade re Lectorem monere.* Quæ igitur de *Dimensione Circuli & Angulorum* pronunciata sunt, tanquam exactè inventa, accipiat Lector tanquam Falsò dicta: aut potius pro indictis habeat.

Et quidem, cum hoc in confessio sit, hæsitabam aliquantum num ullam hic refutationem adjungerem, aut conclamatis hisce ad sequentia procederem. (Quorsum enim actum agerem?) Aut quem ego aggrederer tetragonismum; num alterum, an utrumque, an neutrum. Nempe utrumque falsum esse tu fatearis: utrumque tamen, utut falsum, aspectui nostro objiciendum curas, (quippe tuis etiam Abortibus aliquid inesse pulchritudinis ratus:) Priorem scilicet, utut confessio falsum, in repetita etiam impressione saltem summarim recitas, ne illum penitus ignoremus; sed & in chartis abolendis, (saltem in multis exemplaribus, quorum ego aliquot vidi, atq; alia passim plura esse quæ non vidi auditu satis certo intelligo,) integrum adhuc conspiciendum relinquis, donec Bibliopecti curâ abscindatur; unde liquet te non admodum invitum esse ut totus perpendatur: Posteriores autem, ut & prioris Epitomen, tu ignorari nolis. Neque revera opus est, cum tu reliqua oculis exponas, cur horum te magis pudeat, non enim hæc pejora sunt reliquis quæ tu sine ullâ monitione, quasi essent verissima, protulisti, atque unde tu tibi sat ingentem laudem pollicitus fueris; saltem *deberi* tibi non dubites, utut ingrata hominum gens minùs fortasse sit solvendo, (sed seris aliquando posteris solvendâ relinquat;) videris enim metuisse ne non *minor tibi habebitur quam debebitur gratia.*

Libet igitur utrumque attingere: sed & breviter.

Articulus 1. in impressione priori hanc habet Epigraphen, *Inventio rectæ circuli perimetro æqualis; in posteriori, multò rectius, hanc habet, Quadratura circuli falsa ex falsâ hypothesi.* Ego priorem istarum paginarum impressionem sequendam duxi, quia, cum tibi perinde est utramvis sequar, prior illa fortasse lectori gravior erit, partim quod quid tu velis distinctius proponat, partim etiam quia illam sibi bibliopecti sedulitate ablatam aliàs conqueratur.

Propositum est *Circuli Perimetro invenire æqualem Rectam.* Sit, inquis, quadrans Circuli, in fig. 1. ABD , cui circumscribatur quadratum $ABCD$. Secentur latera ejus bisariam in E, F, G, H , Ductæ ergo FH, EG , dividunt arcum BD trifariam in I & K . Ducatur IM , sinus arcus BI , eritque IM semissis radii BC . Secentur quadrifariam arcus BI in L, N, O ; & recta MI in P, Q, R . Connectantur PL, QN, RO , ductoq; SN sinui arcus BN addatur in directum NT ipsi SN æqualis. Postremò, ducta recta IT producat ad BC in V . (Hactenus rectè.) Dico BV rectam arcui BI æqualem esse (Hoc autem non rectè; & proinde neque illud quod tu hinc inferis, nempe) & proinde BV triplicatam, quæ sit Be , æqualem esse arcui BD ; & eandem BV duodecuplatam æqualem esse perimetro circuli cujus ABD est Quadrans. Videamus autem quòd hoc probetur.

Quoniam, inquis, tam MQ, QI , quam SN, NT , sine æquales, erit ut ST ad SN , ita MI ad QI . (Rectè.) Producat TI ad occursum rectè BA productæ in q . Itaque producta NQ incidet in idem punctum q . (Rectè.) Ductæque qP, qQ, qR , & productæ ad BV secabunt eam quadrifariam in X, Y, Z . (Rectè. At non item arcum BI secabunt quadrifariam, neque per puncta L, O , transibunt, quod cum tu putaveris, tibi standi fuit.) Super rectas MQ, QI , constituentur duo triangula æquilatera MgQ, QhI , centrisque g & h ducantur arcus MQ, QI . Horum utervis æqualis erit utrivis arcuum BN, NI . (Rectè.) Rursus super rectas MP, PQ, QR, RI , constituentur totidem triangula æquilatera Mkp, PlQ, QpR, RbI : centrisq; k, l, p, b , ducantur arcus MP, PQ, QR, RS , (lege RI .) Horum quilibet æqualis erit cuilibet arcuum BL, LN, NO, OI . (Rectè.) Quoniam jam arcus IQ, IN , sunt æquales, motus rectus per qQ ponet punctum Q in N ; coincidentq; IN, IQ , (Rectè.) nimirum extenso aliquantulo arcu IQ qui aliquantulo est magis curvus quam IN . (Rectè.) Sed

H



& interim etiam aliquantulo magis curvato: Nam rectæ QN aliqua puncta sunt ipsi I propiora quam est punctum N , per quæ dum moveri intelligitur punctum Q magis curvabitur arcus QI . Sed hoc demonstrationi non obstat.) Et quia arcus duo IR , RQ , ambo simul æquales sunt arcui IN , extenduntur & illi eodem motu & ponuntur in arcu IN , quicum coincident. (Esto. Supponi enim possunt & hi arcus ita extendi, ut ipsi IN congruant.) Quare & motu recto per qR medium punctum R , quod fertur in medium rectæ IV , feretur per medium arcus IN , id est per O . (Nullo modo. Nam recta qRZ non transit per O . Quamvis enim qQN sit eadem recta, aut etiam qMB , non tamen est qRO , aut etiam qPL eadem recta. Quod quidem, si tu contenderis, id tibi restat probandum.) Similiter, quia motus per qQ ponit punctum Q in N , & motus per qM ponit punctum M in B , & sunt arcus MQ BN æquales, coincident arcus MQ cum arcu BN : & eodem motu ponuntur duo arcus MP , PQ , in eodem arcu BN , & cum eo coincident. (Esto.) Motus ergo per qP ponet medium punctum P in medio arcus BN , id est in L . (Nullo modo. Nam qP continuata non pertinget ad L ; neque sunt qP , PL , eadem recta.) Eodem modo perpetuâ bisectione rectæ MI , & super partes factas constituendo triangula æquilatera, orientur arcus infiniti numero, id est, quotcunque quis voluerit, inter se æquales, & omnes simul sumpti æquales arcui BI ; (Rectè.) qui per motum in rectis ductis à puncto q per singula puncta divisionis rectæ MI , (Non, inquam, per illum motum: ob rationem jam dictam de punctis L & O ,) collocabuntur in partibus totidem sibi æqualibus rectæ BV . (Nullo modo. ob dictam rationem.) Eadem autem recta ducta à q secabunt rectas BV & MI , & arcum BI in easdem rationes. (Verum hoc est de rectis BV , MI , non autem de arcu BI . Sed porro; Quorsum hoc & quæ sequuntur omnia? Si enim vera sint quæ prius protulisti, demonstratio jam perfecta erat; & quæ sequuntur superflua. Si enim singula partes arcus BI , collocentur in partibus totidem sibi æqualibus rectæ BV , adeoque & totus toti congruat; quidni statim addas, quod erat demonstrandum. Sed utcunque, perge.) Ducatur sinus arcus EL , qui sit aL , & producatu donec secet IV in c . Cum ergo MP sit quarta pars MI , erit & aL quarta pars $a c$. (Non sequitur. quia recta qP non transit per L .) Et quia qB major est quam qa , maior quoque erit BV quam ac . (For-

tasse

tasle quidē, at hoc inde non sequitur) *Maiores ergo est BV quā quatuor finis arcus BL* (Fortasse quidē, sed non ergo.) *qui arcus est ad arcum BI subquadruplus.* (Omnino.) *Eodē modo ostendi potest,* (si autem non meliore modo, possis tacere. Sin velis, perge.) *quod si arcus BI divideretur in partes aequales quocunque adeo ut differentia inter ipsum arcum, & aggregatum tot finuum unius ex istis partibus minimis quot partes factae sunt, minor esset omni quantitate datā; tamen recta BV omnibus illis simul sumptis major esset.* (Nempe, si, uti tu supponis, rectae qP &c, transirent per puncta L &c. quod tu nondum probasti, neque probaturus es.) *Non est ergo recta BV minor arcu BI.* (Fortasse quidem. Sed non ergo. quia nondum probatum est rectas qP &c sic transire.) *Major autem esse non potest:* (Quidni?) *propterea quod si ipsum punctum B pro finu partis minimae haberetur,* (Cave quā hic procedas: nam huiusmodi suppositio tibi fraudi fuit non semel.) *aggregatum omnium finuum consideratorum ut puncta, esset ipsa recta BV, & aequale ipsi arcui BI.* (Si hoc recte inferatur, tum, inquam, i. quid opus erat priori demonstrationis parte qua probares, non esse maiorem? nam si hoc demonstrationis membrum verum sit de non-minori, pariter etiam valeret de non-majori. Metuo autem ne dum tu nimium probes, nihil probes. 2. Tu etiam hic supponis rectam qPX &c, per puncta L &c transire secus enim nihil hic procedit: at id non probatum est. 3. Vide an non eodem argumento, ne dicam meliori, tu probes rectam MI aequalem esse eidem arcui BI, sive omnibus MP, PQ, &c, qui simul ipsi BI æquantur. Nam ubi continuata in infinitum bisectione, eo deventum est ut singulae partes rectae BV considerandae sint ut totidem puncta; erunt etiam & singulae partes homologae in recta MI totidem item puncta; & propterea qui illis ita insistere supponuntur arcus, eo modo quo ipsi parti MP insistit arcus MP, erunt totidem item puncta, adeoque horum omnium aggregatum sive ipsi æqualis arcus BI, illarum partium omnium aggregato, hoc est toti MI æquabitur. Sed & eodem argumento probare poteris quemlibet arcum cuilibet rectae æqualem esse.) *Est ergo, inquis, recta BV æqualis arcui BI, & Be æqualis arcui BD, & Be quadruplicata æqualis perimetro Circuli cuius ABD est quadrans. Inventa est ergo recta perimetro circuli æqualis. Quod erat faciendum.* Nempe haec omnia sunt

pariter vera. hoc est, non omnino.

Coroll. Omnes rectæ ductæ à puncto q per rectam MI, dividunt eam, & rectam BV, & arcum BI in easdem rationes, ut apparet ex ipsa demonstratione. (Divident, inquam, rectas MI & BV in easdem rationes; sed non & arcum BI.) Ndm ubique quota pars abscinditur rectæ MI, eadem pars abscinditur arcus BI. (Nullo modo, ob rationem jam sæpius dictam.)

Hanc autem ubi tu quadraturam in lineis consecutus eras, eandem ad numeros, saltem quam proximè, reducendam aggredieris. Verùm tu & hic à scopo aberras. Quod an tibi condonandum sit, nescio. Quamvis enim tu illam quadraturam jam falsam esse videaris agnoscere, nondum tamen falsus es hunc tuum quem subjungis calculum, cum illâ (sive verâ sive falsâ) quadraturâ non convenire. Illud igitur mihi restat adhuc ostendendum: ut scias te turpius errâsse quam tu forte adhuc sciveris. Sic tu igitur computum instituis.

Ad rationem arcus BI ad radium AB investigandam quam accuratè fieri potest per solas tabulas sinuum: (At quorsum tu hunc suscipis laborem? hoc enim jam accuratiùs longè cognitum est, quàm tabula sinuum ullo modo poterit ostendere. Sed videamus utcunque.) & *ad inveniendum punctum q etsi non præcisè, tamen proximè:* (At cur non etiam præcisè voles? potest enim illud præcisè inveniri: uti ego te mox docebo. Videamus autem utcunque quid tu proferas.) Cognita BM addo duplam diagonalem AC cognitam, ex quibus fit Bi cognita; quæ ablata à tribus radiis, id est à Bm, relinquit im cognitam; quam si divido in q ita ut iq ad qm sit ut 3 ad 8, cognita erunt qM & qB; cognita est autem MI semissis radii; & sunt qM, qB:: MI, BV, proportionales. Et per regulam trium invenitur BV esse 5235980, earam partium quarum radius habet 10000000.

Calculus hunc cum ipso tuo calculi fundamento, nempe cum hac posteriori constructione lineari, satis congruere; Ego non nego. Sed Ambitum hoc calculo indicatum iusto minorem esse affirmo. Nempe si ponatur Radius 1, erit (per canonem Sinuum) BM (sinus versus gr. 30.) 0,1339746; cui si addatur dupla diagonalis AC, hoc est dupla secans grad. 45. nempe 2,8284272, erit aggregatum Bi 2,9624018, quod si auferatur ex Bm, hoc est, tribus radiis, seu 3, residuum im erit 0,0375982; hujus autem si sumatur pars iq, quæ sit ad reliquam qm, ut 3 ad 8; hoc

hoc est, quæ sit ad totam *im*, ut 3 ad 11, erit ea pars *iq*, 0,0102546; cui si addatur prius inventa *Bi*, 2,9624018, fiet tota *qB* 2,9726564; unde si auferatur *BM* prius inventa, 0,1339746, manebit *qM* 2,8386818. Tum quoniam est ut *qM* ad *qB*, hoc est, 2,8386818 ad 2,9726564, sic *MI* hoc est 0,5000000 ad *MV*, erit (per auream regulam) *MV* 0,5235980 quam proximè: (vel si illud malles, $\frac{17+16\sqrt{2}-4\sqrt{3}}{12+32\sqrt{2}+3\sqrt{3}}$ accuratè:)

Hujus autem duodecuplum est 6,2831760, vel ad summum 6,2831765 ferè. Atque hunc tu vis esse ambitum Circuli cujus radius est 1,0000000. Cum tamen certum sit eum majorem esse quam 6,2831853. Est igitur ambitus ille quem hic ostendit calculus justo minor.

Verùm, quod magis adhuc dolendum est, neque calculus hic tuus, neque illud cui nititur fundamentum, cum primaria tua constructione convenit, sed immane quantum discrepat. Quibus tu rationibus ductus hanc posteriorem constructionem statueris, ad inveniendum punctum *q*, (& consequenter, magnitudinem rectæ *BV*,) ego sanè nescio: Cùmque tu illi nullam adjungis demonstrationem qua confirmes, non opus est ut ego admodum de ea sollicitus sim. Sufficiat ut ego demonstrem, quantitatem illam quam tu hic assignas non esse veram quantitatem rectæ *BV* quæsitam, sed ipsâ multo minorem. Quod ego, sine novâ constructione, sic ex priori tua evincam. Idque primò quidem methodo tuâ, nempe juxta canonem Sinuum, quam proximè; deinde & methodo nostrâ accuratè.

Si ponatur *AB* radius 1,0000000; erit *MI* (sinus grad. 30.) 0,5000000; ejusque semissis *MQ* 0,2500000; & *MB* (sinus versus) 0,1339746. Item *SN* (sinus grad. 15.) 0,2588190, & *SB* (sinus versus) 0,0340742; & propterea *MS* (sinuum versorum differentia) 0,0999004 & differentia rectarum *SN-MQ* 0,0088190. Cum igitur, per constructionem, recta *NQ* continuanda est ad *q*: erit ut differentia *SN-MQ*, ad differentiam *qS-qM*, hoc est *MS*; sic *MQ*, ad *qM*. Hoc est, ut 0,0088190 ad 0,0999004; sic 0,2500000 ad 2,83195..., quæ est igitur lōgītudo rectæ *qM*; & cōsequēter *qB=qM+MB* est 2,9659246 circiter. Jam verò, ut *qM* ad *qB*; sic *MI* ad *BV*. Hoc est ut 2,83195'', ad 2,9659246; ita 0,5000000 ad 0,5236541 circiter: quæ propterea est magnitudo rectæ *BV*; (non autem uti tu computas, 0,5235980.) Eaque magnitudo duodecies sumpta 6,283850, circiter, est ambitus circuli juxta priorem

tuam constructionem qui quidem iusto maior est. Est enim verus ambitus minor quam 6,2831854. Est igitur quadratura tua juxta constructionem iustā major; juxta calculum tamen tuum iustā minor.

Si autem velles non tantum quam proximè sed & accuratè quantitatem istius rectæ BV invenire; id sic efficias. Esto ut prius radius 1; erit igitur $MI = \frac{1}{2}$, $MQ = \frac{1}{4}$, $MB = 1 - \frac{1}{2}\sqrt{3}$,

$$SN = \frac{1}{2}\sqrt{2 - \sqrt{3}}, SB = 1 - \frac{1}{2}\sqrt{2 + \sqrt{3}}, MS = \frac{1}{2}\sqrt{2 + \sqrt{3}} - \frac{1}{2}\sqrt{3},$$

$$SN \cdot MQ = \frac{1}{2}\sqrt{2 - \sqrt{3}} \cdot \frac{1}{4} = \frac{1}{8}\sqrt{2 - \sqrt{3}}. \text{ Ideoque, cum sit, ut}$$

$$SN : MQ \text{ ad } MS, \text{ sic } MQ \text{ ad } qM, \text{ erit } qM = \frac{\sqrt{2 + \sqrt{3}} - \sqrt{3}}{4\sqrt{2 - \sqrt{3}} - 2} \text{ Et}$$

$$qB = \frac{\sqrt{2 + \sqrt{3}} - \sqrt{3}}{4\sqrt{2 - \sqrt{3}} - 2} + 1 - \frac{1}{2}\sqrt{3} = \frac{\sqrt{2 + \sqrt{3}} + 4\sqrt{2 - \sqrt{3}} - 2\sqrt{3} - 2}{4\sqrt{2 - \sqrt{3}} - 2}$$

$$\text{Et consequenter, cum sit ut } qM \text{ ad } qB \text{ sic } MI \text{ ad } BV, \text{ erit } BV = \frac{\sqrt{2 + \sqrt{3}} + 4\sqrt{2 - \sqrt{3}} - 2\sqrt{3} - 2}{2\sqrt{2 + \sqrt{3}} - 2\sqrt{3}} \text{ accuratè. (quæ quantitas ab ea}$$

quam tuus exhibet calculus satis est diversa.) quæ ad veros numeros reducta, erit 0,5236542 $\frac{1}{2}$ proximè, adeoque ambitus

circuli 6,2838511 proximè. qui, ut prius dictum est, iusto est maior; quem autem tuus exhibuit calculus, iusto minor. Adeoque nec computus tuus constructioni convenit, neque vel hæc vel ille veræ circuli magnitudini.

Si autem nondum lassata est satis Lectoris patientia; videamus, si libet, quid tu porro habes. Nempe sicut tu arcum BI aptasti rectæ BV , placet tibi & arcum reliquum ID (qui arcus BI duplus est) aptare rectæ Ve , (quæ dupla est rectæ BV .) Non quòd id omnino opus sit, (quis enim nescit, si curva rectæ æqualis sit, esse & duplam duplæ æqualē? sed quod libuerit tibi delicatulum tuum Tetragonismum blandius tractando te oblectare, & quaquaversum versare. Videamus ergo.

Ut reliquum, inquis arcum ID comparemus similiter cum reliquâ rectâ Ve : Ducatur recta eD , & producat ad rectam qV in o , & in ipsa Ve sumatur recta Vn æqualis radio: & à puncto o ducatur or æqualis & parallela rectæ Vn : & ducatur nr secans De in s : à puncto autem s ducatur st parallela rectæ Ve , secans qV in t : eritq; ts æqualis radio sive rectæ Vn . Dividatur ergo ts quadrifariam in u, x, y : ductæque ou, ox, oy , producantur ad Vn in z, α, β . Super rectas æquales tu, ux, xy, ys , constituantur quatuor

quatuor triangula æquilatera tyu , uxx , xyy , $y\zeta s$, centrisque y , s , e , ζ , ducantur arcus tu , ux , xy , ys . Hi arcus æquales erunt totidem quartis partibus arcus ID , (Rectè. At interim te non dedecuiſſet aliquali id probatiunculâ ostendere, quâ illud sequi lector intelligat. quamvis enim id verum sit, non tamen est tam obvium ut quilibet consequentiæ rationem statim animadvertat. Sed perge.) *vel rectæ Ve*, (Hoc autem neque probatum est, neque verum. Et quidem, si verum esset, non tamen gratis assumendum erat, sed probandum, cum sit ipsum $\zeta\eta\tau\epsilon\mu\epsilon\nu\omicron\nu$ aut quidem, si id assumere voluisti, cur non id statim ab initio factum est, ut totus operosæ constructionis labor evitetur? quis enim non huius consequentiam, [Singulæ quartæ partes arcûs ID æquantur singulis quartis partibus rectæ Ve , ideoque totus roti] sine hoc tanto labore, statim persentiscat. Sed perge.) & per motum rectum in ot , ou , ox , oy , os , ponentur puncta t , u , x , y , s , in punctis V , z , α , β , e . (Nempe, si illud verum sit quod tu probandum primò suscepisti, & jam modò postulasti: si autem, quod res est, verum illud non sit, sed singulæ quartæ partes rectæ Ve singulis illis arcubus tu , ux , xy , ys , sint majores; non poterunt singula puncta t , u , x , y , s , singulis V , z , α , β , e , aptari, nisi supponas arcus illos non modò in rectum extendi, sed etiam extendi in longum. Sed perge.) & diviso arcu ID quadrifariam in n , K , θ , quoniam motus rectus per ol , oD , ponit puncta I & D in V & e , motus rectus per on , oK , $o\theta$, ponet puncta n , K , θ , in z , α , β . (At cur non tu simul inferas, Quoniam homo est animal, ergo Bucephalus est asinus. & Hobbius est Geometra? (nisi adjuncta transponenda mallee.) Eadem enim & hic est vis consequentiæ. Sed videamus quâ probes.) Nam arcus In , nK , $K\theta$, θD , æquales sunt arcubus tu , ux , xy , ys (Rectè.) tum etiam, (quod tu probandum pridem susceperas & nuper postulabas,) rectis Vz $z\alpha$, $\alpha\beta$, βe , singuli singulis. (Nempe $\alpha\upsilon\tau\omicron\delta\epsilon\epsilon\phi\omicron\varsigma$.) Transibit ergo ad Græcas Calendas: Nam si illud tam verum esset quam est falsum, non tamen hoc sequitur.) ou , per n , ox per K , oy per θ . Idem contingit si rectæ tu , ux , xy , ys , dividerentur rursus bifariam & sic in infinitum. (Nempe, neque hoc tibi magis favebit quam illud prius.) Itaque rectæ omnes ductæ ab o dividunt rectas Ve , ts , & arcum ID , in eadem rationes. (Vide annon supplenda sit vox *non*.) Quin dic mihi; cur in hac tota constructione, mutaveris punctum q in o ? Nempe rectæ omnes quæ curvam BI & rectam BV secant proportionaliter, ducuntur à puncto q ; quæ autem earum continuationes ID & Ve ita secant, non amplius à q sed ab o ducuntur. Quid novum obsecro in punctis V & I

contingit, quod non in singulis ultra citrave punctis contingat, unde hæc mutatio oriatur? Vel igitur in singulis punctis mutandus erit terminus à quo, vel ne hic quidem, sed ducendæ omnes à q . At dices, si recta à q ducta per D continuetur ad BV productam, non ea abscinderet *Ve* duplam rectæ BV (prout arcus ID est duplus arcus BI ,) sed aliam breviorē. Equidem hoc inquam, verum est, (atque tu inde, si sciperes, prioris demonstrationis inconsequentiam videre posses, quæ te ad hoc absurdum ducit:) at interim demonstratio tua non minus procederet de ista recta breviori quam de ipsa *Ve*. Quidni igitur & istam breviorē, arcui ID æqualem probaveris? Quamvis enim tu non æquè velis, tamen id argumento tuo æquè probabitur. Sed de his hætenus. Tu jam, ni fallor, aliud quid aggredieris. Videamus quid illud sit.

Si ducatur recta *Be* secans CD in λ , erunt arcus BD , radius AD , & recta $D\lambda$ in ratione continuâ; (& quare? quæso.) & centro D ductus arcus quadrantis $\lambda\mu$ æqualis erit radio AD (videamus quæ tu id probes) quoniam enim similia sunt triangula ABe , $AD\lambda$; Be est ad BA id est ad AD ut AD ad $D\lambda$, (Rectè) Sunt ergo in ratione continuâ Be , AD , $D\lambda$. (Omnino.) Sed recta Be & arcus BD sunt æquales (supple non.) In continua ergo ratione sunt (vel potius non sunt) Arcus BD , recta AD , & recta $D\lambda$. Quod est primum. (Benè est. Videamus an iecundum sit illo rectius.) Secet recta AE arcum BD in v . Erit ergo ut radius Av , ad arcum quadrantis BD , ita $D\lambda$ ad arcum quadrantis $\lambda\mu$ (Omnino.) & invertendo, ut BD arcus ad radium Av , ita $\lambda\mu$ arcus ad $D\lambda$. (Atque hoc rectè.) sed ut BD arcus ad Av , ita AD ad $D\lambda$; (quare? quia BD , AD , $D\lambda$, sunt in ratione continuâ; nonne? Benè est. Perge.) sunt ergo radius AD & arcus $\lambda\mu$ inter se æquales. (quia nempe, uno absurdo posito, mille sequuntur.) Quod erat ostendendum.

His absolutis, tu (art. 2. impressionis prioris cui hæc ἐμπειρὴ, Divisio arcuum & angulorum in data ratione;) hoc subjungis problema, Data rectæ non majori quam arcus Quadrantis, partem ipsius arcus invenire æqualem. Pulchrum equidem problema. Videamus quæ tu hoc absolvas. Sit, inquis, data recta primo BF . (adde, aut alia quævis minor quam BV .) cui æqualis inveniendus est arcus. Ducatur qF secans arcum BD in i . Dico arcum Bi æqualem esse rectæ BF . Quoniam enim recta omnis ducta à puncto q ad rectam BV secat arcum BI , & rectam BV (prout tu falsò supponis.) in easdem rationes, erit ut Bi

ad

ad BV , ita B_1 ad BF : sed BI & BV sunt æquales (sic enim tu supponis) æquales ergo sunt etiā B_1 , BF . (nempe si duo illa quæ tu falsò supponis sunt utraq; vera.) sit deinde data recta BC major quam BV . Ducaturq; recta oC secans arcū BD in x . Dico arcum Bx æqualem esse rectæ BC . Arcus enim ID & recta Ve secantur à rectis oI , ox , in easdem rationes. (si nempe quod tu falsò supponis verum sit.) Est ergo ut ID ad Ve ita Ix ad VC ; sed ID arcus & Ve recta æquales sunt, (nempe si tuus pseudotetragonismus verus sit;) sunt ergo Ix , VC , æquales. Sunt autem arcus oI & recta FV æquales, (nempe hoc non minùs verum est quam reliqua;) arcus ergo ix & recta FC æquales sunt. (nempe pariter æquales.) Est autem arcus B_1 æqualis rectæ BF , (nempe ita ut priùs dictum est) quare duo arcus B_1 , ix , æquales sunt duplæ BF , (puta si quæ præcedunt omnia vera sint. At interim ego adhuc dubito an probari possit arcum Bx bisectum esse in i .) id est, arcus Bx æqualis rectæ BC . Quod erat demonstrandum; nec demonstratum est.

Sequitur aliud problema. Data parti arcūs BD invenire rectam æqualem. Quod sic aggredieris. Sit datus arcus ix pars arcus BD ubicunque sumpta. (non, credo, ubicunque, sed saltem inter I & D , nisi tu jam tandem velis puncta q & o confundere.) Ducantur rectæ ox , $o\xi$ & producantur ad Ve in C & π . Dico arcui ix æqualem esse rectam $C\pi$. Cum enim rectæ ox , $o\xi$, dividant arcum ID & rectam Ve in easdem rationes (nempe tu adhuc illud suppones) erit ut ID arcus ad Ve rectam, ita $I\xi$ arcus ad $V\pi$ rectam, sunt ergo arcus $I\xi$ & recta $V\pi$ æquales. (quia nempe tu falsò supponis ID & Ve æquales esse.) Eadem ratione (neutiquam meliori) ostendi potest æquales esse arcum Ix & rectam VC , reliquus ergo arcus ix æqualis est reliquæ rectæ $C\pi$. Quod erat &c. (Nempe hæc omnia pariter vera sunt; id est, ne omninò quidem.)

Quod si arcus datus, vel recta data major sit quam arcus quadrantis: tamen arcui illi recta, & rectæ arcus æqualis dari potest; nempe inveniendò parti aliquotæ arcūs dati rectam, vel parti rectæ datæ notæ arcum æqualem. (Et quidem reliquis concessis, hoc non esset negandum.) Datur ergo cuilibet arcui rectam & cuilibet rectæ arcum æqualem, (nempe ut cuivis, sic cuilibet,) & inter duos arcus datos medium invenire proportionalem, (nam, ostensis reliquis, hoc etiam ostendi posse non erit negandum.)

Datur item secare arcum datum in ratione data. Datur enim dato arcui rectam invenire æqualem, ut modò ostensum est (tuo more,) & rectam inventam secare in ratione data (hoc, fateor, datum

datum est ; sed non item quod sequitur) & secare rectam & arcum in easdem rationes.

Itaque si volumus habere datam partem arcus BD , abscindemus eam a utrovis termino B , vel D , vel ubicunque, hoc modo. Sumatur à puncto e , verbi gratia, septima pars rectæ Be , quæ sit ep , ducaturque op secans arcum BD in σ , eritque arcus $D\sigma$ septima pars arcus BD . Similiter si sumatur Bu æqualis ep , id est septimæ parti rectæ Be , et ducatur quæ secans arcum BD in φ , erit tum $D\sigma$, tum $B\varphi$ septima pars arcus BD . (At ego interim non dubito, quin si quis volet rem accuratiùs examinare, inveniet arcus $B\varphi$ & $D\sigma$ non esse æquales, & similiter alibi multoties.) Erit. que ut Be recta ad arcum BD , ita $B\varphi$ recta ad arcum $B\sigma$, et ita quoque reliqua recta pe ad reliquum arcum $D\sigma$. (Non est autem cur hæc toties ad nauseam inculces, nisi saltem meliori insisterent fundamento: quis enim, si de prioribus constet, horum ignarus esse possit?) Sed BD , Be , sunt æquales, (neque illa vera sunt, neque hoc, nec quæ sequuntur.) æquales ergo pe , $D\sigma$; quare $D\sigma$ est septima pars arcus BD . Similiter ostendi potest $B\varphi$ esse septimam partem ejusdem arcus BD . Vel si à quolibet alio puncto α sumatur $\alpha\chi$ æqualis rectæ pe (annon hic deest limitatio, nempe, ita ut sint utraque puncta α & χ in ipsa recta Ve ? nisi tu jam voles ut q & o sint eadem puncta, aut saltem ut perinde sit, ab utro recta ducatur. Quod quamvis nos perinde esse putemus; tamen tu fortasse non ita putas.) ductis $o\alpha$, $o\chi$, secantibus arcum BD in K et Ψ , eadem methodo ostendi potest arcum $K\Psi$ septimam partem esse ejusdem arcus BD . (certè tu tuos lectores satis obtusos fore credebas, ut crambe toties recocta opus habeant.)

Coroll. Liqueat hinc circulo dato inscribi vel circumscribi posse non modo Heptagonum, sed etiam quodlibet polygonum æquilaterum (Imò, inquam, de hoc eodẽ modo liquet atque de præcedentibus)

Vel si arcum datum minorem arcu quadrantis dividere velimus in rationem datam (num igitur iterum reponenda est crambe? perge igitur) sumamus in recta Be rectam ei arcui æqualem, et dividamus illam in rationem datam. Exempli causa, datus sit arcus $B\zeta$, dividendus trifariam. Ducatur $o\zeta$ et producat ad Be in π , et secetur $B\pi$ trifariam in F et C , ductæque sint qF , oC . (Certe ipsa variatio punctorum q & o sat esset indicio cuivis sobrio quadraturam tuam erroris suspicandam; ut non tibi opus sit vel malevolorum insultibus, vel amicorum monitionibus, ut illam abjicias. Sed perge.) secantes BD in i et κ . Dico arcum $B\zeta$ divisum esse in i et κ trifariam. (Dic igitur si voles,

Et, qui volet, credat.) Id quod modo in hoc ipso articulo ostensum est. Quid igitur opus erat ut tu iterum ostendas? nisi posses rectius.

Quæ articulo 3 continentur, *De dati sectoris & Segmenti Circuli quadraturâ*; non opus est ut repetam; Cum nihil ibidem magni momenti contineatur: (Nam Sectorem æqualem esse radio in semissem arcus ducto; Et, Sublato ex Sectore triangulo, reliquum æquari Segmento residuo; nemo nescit:) atque hoc etiam, quicquid sit, postea, quoad sensum, repetitur sub finem articuli tertii iteratò impressi. Similiter quæ articulo 4. *De Recta Spirali Archimedæ æquali, atque etiam Rectâ Spiralem illam contingente* habueras, verbatim etiam recitantur & novæ tuæ quadraturæ, prioris loco substitutæ, annexa sunt; ut nec illa opus sit hic recitare.

Quos autem tu deinceps habes insultus, & quas tibi tu deberi laudes somnias mox videbimus.

Quam autem art. 5. habueras *De Analyticâ Geometrarum digressionem*, eadem, credo, erat (paucis mutatis) quæ adhuc conspicienda est, art. 6. impressionis iteratæ; ubi tuam Analyticam novam aliorum omnium methodis anteponis. Cujus quidem insignem, ni fallor, instantiam te apposuisse putaveras, in ipsâ, quâ tu tuam Quadraturam inveneras, *Analyti.* Quamvis enim ultima pars istius Capitis, prout primò impressum erat, desit; tamen, ex Articulorum Epigraphis Capiti præfixis, intelligimus Articulum sextum exhibuisse *Analytin*, quâ inventa est æquatio rectæ & arcus Circuli. Eam autem non ita-tim post quadraturam inventam, posuisti, artic. 1. traditam; (ubi locus illi fuisset satis opportunus;) sed Digressioni tuæ de Geometrarum Analyticâ subjungis, quam tu novâ methodo, cujus hoc erat exemplum, te auxisse putaveras. Eadem autem est, ni fallor, quam (emendatam fortasse) conspiciendam habes *Analytin*, pag. 180. 181. impressionis posterioris (nempe post detectum tetragonismi prioris errorem, sed dum posteriorem adhuc sanum putaveris, ut ibidem liquidò patet;) quam tamen iisdem paginis jam ultimò impressis (post secundi item insani errorem detectum) penitus abolendam putaveris. Atque hæc, ni fallor, omnia illa erant, quæ, quantum ex articulorum Epigraphis conjicere licet, prior illa impressio Capitis hujus vicelimi continebat.

Atque hætenus priorem tuam Quadraturam ex impressione priori recitavimus, & quantum opus est, refutavimus: Quam utut confessò falsam, ignorari tamen penitus tu omnino nolles, adeoque ipsius saltem Epitomen tu palam exponis

exponis. Ego fusiore tuam illius traditionem potius secutus sum ob rationes supra memoratas. Reperi autem hæc saltem duo errata: Nempe neque constructionem tuam veram esse, (quod tu revocando fateris,) neque etiam (quod fortè nondum advertisti) calculum tuum cum illa Constructione congruere. Et quidem eousque dissentire, ut cum constructio tua circuli ambitum exhibuerit justo majorem, calculus eum exhibeat justo minorem. Ea verò quæ tu huic tetragonismo adjunxeras Consecraria, cum illo simul ruere mirandum non est.

Hanc autem quadraturam postquam tu in chartis postremò impressis recitaveras, sub titulo *Quadraturæ falsæ ex falsa hypothesi*, ipsi subjungis breviter Confutationis etiam argumentum, (illud, credo, quo usus est amicus ille tuus qui tibi detexit istius pseudotetragonismi errorem:) aliud quidem ab eo quo ego usus sum, tale tamen ut tetragonismo tuo evertendo abunde sufficiat.

At, inquis, rectam BV arcui BI præcisè æqualem esse per te edidissim pro demonstrato, nisi me præpropere malevolorum insultatio cohibuisset, fecissetque ut rem examinarem diligentius cum amicis. Qui illi sint malevoli, & quæ illorum insultatio, ego quidem nescio. Nec multum interest ut inquiram. Me certè in eorum numero non habes, (utut fortasse posthac habiturus sis,) quippe qui tibi, credo, non minùs sum ignotus quam tu mihi. Dicam tamen liberè: Ego quum primum audiverim te tam facili negotio rem tam arduam absoluturum suscepisse, neque alio opus habere quam rectarum aliquot linearum ductu, satis audacter pronunciavi (licet tu fortasse id non noveris) te alicubi deceptum esse. (Quippe, qui rem factu impossibilem se fecisse suscepit, necesse est ut fidem fallat.) At fateor interim, me nullo modo expectasse ut tu tam turpiter & ubique peccares. Putavi enim, ut fatear quod res est, cum audiverim, te tantum ubique Geometriæ tribuisse, quasi quidem sine illâ vix quicquam expectandum sit in Philosophiâ sanum, atque interim te tantum Philosophum professum esse, ut, Aristotele cum reliquis posthabito, *Leviathanem* tuum, tanquam solum veræ Philosophiæ ducem, Academiis Scholisque publicis publicè legendum fore absoluto summæ potestatis imperio mandatum sit, modestè postulaveris: Putavi, inquam, te Geometriâ saltem mediocriter imbutum esse, neque tam turpem Elementorum ignorationem proditurum. Sed quicquid sit, aliqui, quicunque demum fuerint, tibi (ut tu putas) insultarunt, (hoc est, prælagiebant te deceptum esse,) idque præpropere, (nempe citius

citiùs quam tu velles , ut ut non citiùs quam meruisses , nempe tu prius exsultaveras , falsò tamen , quod illi non difficulter præsagiebant , & pariter elocuti sunt.) Hæc autem eorum præpropera insultatio in causa fuit, uti ais, cur tu *rem examinare diligentius cum amicis*, imo verò , ni fama mendax sit , in causa fuit potius cur amici tui , de tua fama solliciti , à te tandem (ægrè) obtinuerunt ut rem eorum alicui communicares priusquam tu in scenam prodires , quod illi (ni fallor) non sine aliqua difficultate obtinuerunt , adeo tu eras de hoc negotio securus. Sed, ut ut sit, amicorum (uti videtur) consilio usus, tetragonismum tuum de quo tu antea fueras gloriatus , erroneum esse deprehendis , quem secùs ut accuratum editurus esses: Opotandum autem erat , tuæque famæ consultius , ut & reliqua eidem amico communicasses, qui tibi tetragonismi tui errorem detexit , (novi enim quis ille fuerit,) qui eâ pollet in Mathesi peritiâ, ut nunquam tibi author esset , ut, ea palam divulgando, te tanto exponas ludibrio.

Quo autem te putemus animo detectum hunc tetragonismi tui errorem tulisse ? Falsus est quidem. Attamen tuus est : & tua tibi solent summopere placere. Et mirum est ni hæc tua proles sit tibi admodum chara , deque ipsius abortu præmaturo tibi multum doleat. Atque hinc, credo, est, quod tetragonismum hunc tuum quamvis erroris convictum , ignorari tamen nolles. Utut enim sanus non sit , pulchellus tamen visus est, quia tuus est. Et quamvis tu mox alterum (nihilò tamen meliorem) ipsius loco substitueris, non potes tamen illius unde tu tantam spem conceperas statim oblivisci : sed & illum etiam repetita impressione recitandum curas : tuis siquidem vel abortibus non parum inesse pulchritudinis ratus.

Neque tamen simpliciter recitatum vis , sed & Analyseos qua illum inveneris rationem tradis ; nempe sub finem capitis, secundò uti videtur impressi. Hæc enim post errorem detectum scripta esse liquet. *Quibus autem ego cogitationibus* (supple ductus sum) *ut putarem rectam* (in fig. 1.) *EV æqualem esse arcui BI*, quia aliqui fortasse tanti esse existimabunt , breviter ostendam. Sed dicetis alii deceptum me id putare. (Fortasse quidem; neque tu, credo; diffitebere.) *Fieri potest : nam Homo sum. Neque ignoscetis; Credo; nam & vos homines estis.* (Imo vero , ego falso facile concederem veniam , modo spes esset in posterum modestius te gessurum , teque Hominem esse recordaturum errori pariter cum reliquis mortalibus obnoxium , neque te supra humana

nam sortem uti soles elaturum. Sed videamus si placet quid est quod te dicis ostensurum.) *Videte tamen, inquis, nam hoc certe utile est scire, quo loco & quomodo in errorem inductus fuerim.* (*Errorem igitur detexeras priusquam hæc scripsisti: Et propterea hæc charta, quæ tamen inter abolendas est, secundis saltem curis debetur, nec ea est quæ primò impressa fuit.*)

Primò, inquis, si arcus BI, & recta MI, perpetua bisectione dividerentur quoties dividi possunt, videbam super segmenta rectæ MI, constitui posse arcus totidem numero quot sunt ex perpetua bisectione arcus BI, & ipsis æquales, ut MP, PQ, QR, RI, totidem numero & æquales arcibus BL, LN, NO, OI. (*Rectè.*) *Et proinde si daretur recta ut BV, incognita quidem sed forte fortuna æqualis arcui BI, id est, omnibus arcibus æqualibus constitutis super rectam MI, fore ut per motum terminorum M & I omnes illi arcus coinciderent cum recta BV, (nempe curvis omnibus in rectum extensis;) & per motum rectum (per motum quidem aliqualem, sed quære an necessario per motum rectum,) terminum I, fixo puncto B, ut arcus BI coincideret cum eadem BV.*

Secundò manifestum erat quod partes æquales rectæ BV, (id est, partes extensi arcus BI. sive arcus ipsi extensi MP, PQ, QR, RI,) si connecterentur cum rectis MP, PQ, QR, RI, rectæ BM, XP, YQ, ZR, VI, quæ ipsas coniungunt, concurrerent in uno atque eodem puncto, ut in q: propterea quod partes rectæ BV ad partes rectæ MI eandem haberent ubique rationem. (*Rectè quidem. Sed non item partes curvæ BI.*)

Tertiò, videbam prout sensim extenderentur arcus MP, PQ, QR, RI, etiam chordas eorum, nimirum omnes simul sumptas quæ faciunt rectam MI, sensim augeri: quod necessarium erat, cum arcus facti super rectam MI, curviores sint quam arcus ipsis æquales sumpti in arcu BI. (Neque hoc malè. Annon autem dolendum est quod hæc tua Analysis, hucusque perducta, tandem infæliciter exeat? tuaque proles formosa supernè, desinat in piscem?)

Quarto, quoniam recta SN est semissis chordæ arcus BI, apparebat, quando punctum Q erat in N, duplam SN, nempe ST æqualem fore chordæ arcuum simul omnium MP, PQ, QR, RI, ita extensorum ut ejusdem essent curvatis cum partibus totidem æqualibus arcus BI & proinde talem arcum SLTT iisdem motibus rectis per MB, IV, necessario collocari in eadem recta BV. Ex quo intelligi facile poterat
rectam

rectam IV necessario transiuram esse per T. Itaque notis duobus punctis I & T, cognita facta est recta BV. Atque hæc quidem Analysis erat ex BV supposita. Constructionem ergo, id est, Synthesin, coactus sum incipere à recta ST. (Atque hanc quidem Analysis, post agnitam tetragonismi falsitatem, apponendam nihilominus duxisti, ut videaris saltem non sine ratione insanire.) At, inquam, hæc quarta pars Analyseos tuæ est mendosa tota. Quodque tu apparere dicis; erat fortasse (tibi saltem) apparenter verum, sed revera falsum: & multis nominibus vitiosum. Nam. 1. Quid sibi illud vult, Quando punctum Q erat in N, &c. Annon ubicunque fuerit punctum Q, modo interim arcus illi eam habeant curvaturam, eandem etiam chordam haberent quam habituri sunt si illic ponatur Q? Longitudo certè chordæ non dependet à loco in quo fuerit arcus, sed ab arcûs potius longitudine & curvatura determinatis. 2. Si autem hoc velis, nempe, arcuum extensione in rectum gradatim faciendâ, eam arcuum MP, &c, curvatem, quam habent segmenta arcûs BI, tunc primùm acquiri quando Q ad N movetur; Oportuit te id aliqua ratione ostendisse; ut videamus quare tu ita putes. Nobis enim (adeo sumus ingenio hebeti) nulla adhuc apparet manifesta causa, cur non vel citiùs vel saltem seriùs, eam possint acquirere curvatem, non minus quam eo momento quo Q ad N pervenerit. 3. Oportuit te etiam animadvertisse, singulos illos arcus MP, PQ, &c, quamvis sensim extendantur, terminos tamen suos habere in ipsa rectâ (simul cum illis extensa) MI, quæ igitur tota æqualis erit totidem chordis ejusmodi arcuum; & propterea ubi quatuor illi arcus MP, &c, eam habent curvatem quam totidem quartæ partes arcus BI, earum omnium chordæ æquabuntur quatuor chordis ejusmodi quartarum partium arcus BI. Cum igitur vis horum arcuum chordas omnes, quæ simul ipsam MI constituunt, ita in longum extensas ut MI æquetur ipsi ST, ipsam autem ST, æqualem esse vis subtenfæ arcus BI, manifestum est te facere quatuor subtenfas quartarum partium arcus BI, æquari subtenfæ totius, hoc est, quatuor subtenfas arcûs simpli, æquari subtenfæ arcûs quadrupli. Quod satis est absurdum. Non igitur, cum singuli arcus MP, &c. curvatem eam habent quam totidem quartæ partes arcus MI, eorum omnium chordæ simul sumptæ (hoc est, recta

MI extensa,) æquabuntur rectæ ST subtensæ totius BI, uti tu supponis. 4. Porro si tu ad hoc te astrictum non velis, ut arcuum MP, &c, termini in ipsa MI recta permaneant, (quod tamen totus demonstrationis tuæ processus supponit sed in unum jam arcum continuari, qualis sit ipse BI, alio quidem situ eadem curvaturâ: tamen ne sic tu recte procedis. Quamvis enim tum verum esset, quod arcus ille atque ipse BI (qui mutuò applicari congruent) æquales habituri sint chordas, quanta nempe est ST: cum tamen tu addis *proinde talem arcum videlicet SLYT*. &c. iterum hallucinaris. Nam per puncta SLYT neque arcus ille neque ullus circuli arcus transibit, sed potius arcus Ellipseos; ista enim quatuor puncta in eadem circuli peripheria non sunt; (vel, si tu fuisse supponas, ostende tu id. si poteris, legitimâ aliquâ demonstratione:) quod tu fortasse fateberis ubi advertas rectas XL, YN, rectæ ST, non perpendiculares esse, sed ipsi obliquè insistere. 5. Item cum tu porro inferas ejusmodi arcum, *ab iisdem motibus rectis per MB, IV, necessario collocari in eadem recta BV*, (nempe in qua prius collocaveras arcum BI extensum in rectum:) tu iterum ex malè suppositis procedis; non enim tu adhuc ostendisti in arcûs BI æquabili in rectum extensione, puncto B manente, punctum I rectâ ferri in V: est enim adhuc indemonstratum quam illud lineam describet, adeoque dum illam rectam fore supponis, principium petis. 6. Potest quidem tam recta MI quam ipsi insistentes arcus ita inter movendum extendi ut singula puncta P, Q, &c, totidem describant rectas quales PX, QY, &c. (si nempe ita extendantur ut chordarum incrementa sint spaciis emensis proportionalia.) At verò has rectas easdem ipsas lineas esse quas describunt analogâ puncta arcûs BI dum in rectum extenditur, non inde sequetur, sed ulteriori adhuc probatione indigebit. Et quidem si concederetur (quod concedendum non erit) utrobique lineas rectis describi, non tamen statim sequetur easdem utrobique rectas esse. 7. Eadem suppositione manente, nempe ut æquabili istâ arcuum MP, &c, extensione, puncta M, P, Q, &c, rectâ perveniant ad S, L, N, &c; satis quidem constare poterit ad quæ puncta rectæ BV eadem rectæ pertingent, puta ad BXY; adeoque quanta futura est, verbi gratia, chorda MQ, ubi ad rectam BV, pervenerit, nempe tanta quanta est BY: An verò arcus MQ tunc primum in lineam rectam extendatur, (sitque propterea rectæ BY æqualis,) an citius, an serius, nullo modo poterit inde constare. Adeoque quamvis

vis constaret, rectam totam MI , ubi ad situm ST pervenerit, ipsi ST æqualem esse, & propterea cum pervenerit ad situm BV æqualem fore rectæ BV ; an autem hæc recta BV sit illa BV quæ supponitur æqualis arcui BI , nullo modo constabit nisi prius constare possit (quod est ipsum quæsitum) an omnes arcus MP , &c, tunc primum sint in totidem rectas extensæ. 8. Non sequitur igitur ex prædictis rectam IT transfiguram ad punctum V quæsitum, illud nempe quod terminabit rectam BV æqualem arcui BI ; neque, ex notis punctis I T , cognitam esse quæsitam illam rectam BV . Nihil igitur ex *Analy*si hac tua innoscit eorum quæ quærebantur, quam tamen aliorum omnium *Analyticae* præferendam esse tu hoc exemplo te indicaturum sperabas. Constructionem ergo undecunque incipias, perinde erit, nihil enim magni inde erit expectandum. Atque hæc quidem est *Analyseos* tuæ *analysis*. Videamus quid tu interim de illa putes. *Cogitationum*, inquis, *meorum hæc series vim habet in seipsa; ut mihi saltem videtur, legitimæ demonstrationis.* Itane verò? num etiam post rejectam illam quadraturam, tibi adhuc videtur illi inesse vim legitimæ demonstrationis? Cur igitur non retinuiisti? Si enim *Analysis* legitimæ demonstrationis vim in se habeat, quidni & Constructio illi congrua eandem vim habeat? veramque exhibeat Problematis effectiorem? Mirum est autem te tanto aliis omnibus esse oculatiorem, ut cui illud videatur, nam certè nemo alius id videt. *Constatq;* inquis, *ex Analysis non alicujus propositionis, sed ipsius rei generatæ.* Quasi quid est aliorum *Analyses* ex resoluta Genesi non constaret. Quocunque autem constet, jam vidimus quanti sit: ne quidem teo runtii. *Considerabam enim*, inquis, *arcum* BI *generari posse ex perpetuâ & æquali fractione rectæ* BV *in partes suas minimas.* (Bene est. Quid inde?) *Itaque id egi ut totidem arcus illis minutis partibus æquales restituere rursus possem in rectam* BV . (Hoc est, id saltem agere voluisti, an autem id egeris necne, jam vidimus.) *Atque hoc est*, inquis, *compositum sive generatum resolvere & restituere, id est, Analysis & Synthesis.* Quæ quam accuratè tu peregeris abunde vidimus.

Priusquam autem hanc priorem tuam quadraturam dimitto, libet eos quos huic subjungis insultus paucis perpendere, magnosque quos tu inde concipis animos. Quod quidem eò liberius fecisse licebit, quòd ubi tu reliqua deinceps revocaveris (sub Capitis finem) quæ tamen ad *Vindicem* pertinent immota velis. Eum igitur tu primò sic aggredieris (impressionis primæ pag. 175, 176.)

Inveni ergo (inquis) Circuli quadraturam , (admodum feliciter ;) quadraturam cujuslibet dati Sectoris , & Segmenti Circuli , (eadem felicitate ;) rectam Spirali , rectam parabolicæ æqualem (non minus accuratè) anguliq; dati in data ratione sectionem , (idque adeo exactè , ut ne latum digitum aberres :) Imo , inquam , tu nihil horum invenisti. Sed perge : Quid si ?

Tu verò libelli famosi , (nempe quicumque te perstringit libellus , dicendus statim erit famosus ;) cui titulus Vindiciæ Academicarum , quicumque celato nomine Author es (nosti tu quis ille est , & brevi , credo , cognosces rectiùs ;) Academicarum quas nunquam læsi inepte Vindex (Adeone verò , te Academiæ nuncquam læsisse dices ? cum tamen tu nullum vel Scholarum publicarum olim fuisse , vel Academicarum nunc esse utilitatem scriptis editis contendis ? idque mendaciis mendacissimis ex professo tuendum suscipis ? atque hoc eâ tempestate qua novisti malè feriatos homines id totis viribus agere , ut Academiæ nostræ , per totum terrarum orbem celebres , extirparentur penitus ? earumque prædiis venditis & latifundiis , nulla super sit spes in posterum restituendarû ?) Accusator mei mendax , (quippe qui illa dixit quæ utut vera sint tu tamen dicta nolles ,) promissas mihi ob soluta hæc problemata (festina lentè ; nondû soluta) laudes istas tuas tibi condono , (imò verò , ubi te laudaverit , metuo ne aliorum potiùs condonatione indigeat :) Laudari ab homine tuis moribus quam vituperari aliquanto minus honestum esse judicans . (Atque id ipsum alii judicabunt . Si enim viriis moribus , ea prudentia , eaque eruditione , ut quàm hæc tua vana sint omnia non possit non intelligere , te tamen ob hæc problemata tanquam à te soluta laudare volet , Laudator tui mendax sit necesse erit ; adeoque te sic Laudari , quam Vituperari multò minùs esset honestum .) Nam quem non nôris , (imò verò novit te rectiùs quam tu velles ,) eum Iracundum , Plagiarium , Religionis inimicum , scripto in publicum edito appellare , (Num Iracundus sis necne , qui hæc tua legerit dubitare non poterit ; quam Religionis Christianæ parum sis amicus , nos brevi diximus ad finem cap. 18. & qui tua legit passim videbit ; Plagiarius autem an fueris necne , (quanquam ille hoc nomine nuspiam , credo usus est ,) tu maxime noveris , cur autem nec hujus te criminis immunem putemus diximus ad calcem Cap. 17. & plura mox dicentur .) etiam si verum esset quod objicitur , (quod quidni sit ? nam ne tu quidem negas ,) tamen quia tu id nescis , (noli tu de hoc nimis securus esse , novit ille fortasse melius quam tu velles ,) nec prætendis scire (admodum eleganter !) præterquam ex auditu ,

(Imò

(Imò verò eorum multa non tam auditu quam inspectu novit, de quo ne dubites, ex scriptis tuis non pauca protulit testimonia, quibus constet quam vel Religionis Christianæ vel etiam Academiarum sis amicus, dum neque Veterum Scholas publicas neque Recentiorum Academias vix ullius unquam fuisse utilitatis, scripto in publicum edito tueris, neque unquam ad bonam frugem redituras spem esse, nisi, Aristotele reliquisque eliminatis, tuum tandem Leviathanem, reliquaque fortasse tua scripta, summo supremi Magistratus imperio, *summæ potestatis absolutæ absoluto exercitio*, quæ tua erat modestia, publicè prælegenda fore fuerit imperatum; hæc, inquam, non auditu tantum, sed tuorum librorum inspectu didicit; atque ubi alii id ipsum videant citatis paginis indicavit. Iracundia verò tua, si antehac auditu tantum innotuerit; jam satis, inspectu, famam illam non fuisse mendacem, scire poterit. At saltem illud de Plagio, (nam eò potissimum hæc referenda judico, quanquam tu secus loqui videaris) non prætendit, inquis, scire nisi ex auditu,) *quem tu (inquis) facile fingere potuisti, & cum non ex quo audieris dicas, finxisse videris*, (nempe qui se quicquam audisse dixerit, nec tibi interim dicat à quo audiverit, mendax est,) *facere est*, inquis, *non dicam stultè, sed (etsi nulla nequitia sine stultitia est) sceleratè*.

Bona verba, quæso. Tunc is es qui pro *Iracundo* haberi nolles atque interim hæc loqueris? Quis, quæso, tu es mortalium? aut unde tua tam sacra persona, ut de te etiam *Vera* dicere, modo quæ tu dicta nolles, sit *stultum*, *mendacem*, *sceleratum* esse? dum tibi interim licere putes, non modo de singulis personis, sed & de *Academiis* *Scholisque* publicis in universum omnibus omnia mala dicere, atque audacter (nequid gravius dicam) calumniari. At, inquis, *te non novit*. Quid tum? anne qui te non norunt omnes sunt propterea *stulti*, *mendaces*, *scelerati*? At, inquis, *quem non novit*, *eum Iracundum* appellat. Quid si? Neque ego te novi; (nescio enim an unquam viderim;) An autem igitur me dubitare putas num *Iracundus* sis, necne? Quis, quæso, tuorum amicorum, qui te norunt optimè, de hoc dubitat? Sed & *Plagiarium*, inquis, & *Religionis inimicum* appellat. (Nempe tu hæc insinuata putas. Non enim meministi eum his vocibus usum.) Annon autem de hisce constare posse putas ex scriptis tuis, nisi & te noverit? Annon & tu ipse

(ut tecum loquar) *prætendis* nescire quis fuerit istius libelli Author ? dum interim eum *stultum*, *mendacem*, *sceleratum* appellas, *iisq; moribus*, ut ab eo laudari minus sit honestum ? At, inquis, *non prætendit scire præterquam ex auditu*. Quid si ? An igitur ille protinus mendax est qui isthæc se audivisse dicit; quæ non prætendit scire præterquam ex auditu ? An qui quicquã se audivisse dicit, propterea mendax est nisi & se dicat vidisse ? At, inquis, auditum hunc *facile potuit fingere*. Potuit quidem; si mendax esset. At hoc, inquam, tibi probandum erat, non postulandum. Adeone tu perpetuò tibi licere putas, tum in Mathematicis, tum in moralibus, principium petere ? & postulare quod erat probandum ? Sed &, inquis, *cùm non ex quo audierit dicat, fluxisse videtur*. (Nempe à posse ad esse valet consequentia. Nonne ?) At multa videntur quæ non sunt. Videbaris tu aliquando, saltem videri velles, Philosophus esse & Geometra. Quin audi tu : Num *nequitia*, *stultitia*, *sceleris*, *mendacii* absolvetur tandem, si se *vidisse* dixerit ? nempe hæc tota culpa videtur quòd non *prætendit scire præterquam ex auditu*. At non dicit, inquires. Esto. Fieri tamen potest ut ea viderit quæ nondum dixerit se vidisse. Non enim necesse est ut quis omnia sua simul proferat argumenta cur quid verum esse credat. Quin dicam tibi ; Fortasse ne audivit quidem. Dices, ergo tantò est mendacior. Sed neque hoc ; ego enim non video ubi se audivisse dicit. Dicit quidem, se *ab eo qui viderit certissime intellexisse* ; an autem auditu illud an indicatu sive aspectu intellexerit, an utroque, non dicit. Vin tu igitur ut hoc ænigma solvam ? Volo igitur, modò id expetas : sed *conjecturâ meâ*, (non enim ego eum hac de re compellavi, neque ille jam domi est, ut, si velim, id faciam,) sed quæ suo tamen non caret fundamento. Nempe tu hoc inter alia *inquerebaris*, quod cum tu statueris *sensum nil aliud esse quam motuum in Organo perceptionem*, Scholæ tamen philosophicæ per omnes totius Europæ Academias, *textu Aristotelico ductæ*, *aliâ doctrinam doceant*, nempe *sensationem per species fieri*. (At mirum interim quidni omnes toties Europæ Academiæ te potius quam Aristotelem sequantur.) Ad isthæc ille, inter alia, hæc reponit. *Illa autem altera Hypothesis, qua sensus ex motuum principis explicatur, apud nos etiam passim amissa erat, priusquam illius (Hobbii) liber prodiret* : ut quæ satis à Cartesio, Gassendo, Digbeio, tradita fuerat, priusquam ille quicquam hoc in genere in publicum emisserat. (Adde : Id ipsum etiam ante hos omnes, & fortasse omnium primus, invenit Gilbertus ille qui de Magnete

gnete scripsit ; uti patet ex posthumo illius opere Philosophico , non ita pridem edito : Tantùm abest , ut tu sis istius author :) *Atque illud ipsum de quo tantopere gloriatur, ipsius inventum non est, sed, quoad substantiam, (uti ego ab eo qui vidit, certissimè intelligo,) in D. Warneri Schediasmatis continetur, quæ D. Hobbs jamdiu antehac apud se habuit : traditur autem in ipso principio istius tractatus de Visione, qui de Penicillo Optico agit. Si autem id D. Hobbs ipse invenisset, (qui, quantum ego intelligo, nil magni momenti aliorum inventis addidit,) non tamen necesse habuit, ut, tam levi de causa, omnibus totius Europæ Scholis insultet. Hinc illæ lachrymæ. Nempe hoc est de quo tu tantopere debaccharis. Quod igitur integrum apposui, ut videat Lector quam illi cautè agendum est, qui tecum rem habet, ne quid fortè excidat quod tibi bilem moveat, cum tantillum illud tantos æstus pareat. Non enim tu negas quin hæc vera sint. Non negas Warneri Schediasmata apud te jam olim fuisse. Non negas illud, de quo agitur, loco citato reperiri. Illud autem te malè habet, quod quæ (uti tu putas) ille non viderat, se tamen ab eo qui viderit intellexisse, dixerit, & propterea mendax, stultus, sceleratus dici, jure optimo meruerit. Liceat verò mihi, pace tuâ, quid ego hac in re sentiam, aperire, quod istius fortasse reprehensionis acrioris aciem tollat. Nempe, primò, non illi admodum succensendum judico, qui, cùm ab oculari teste fide digno aliquid acceperit, dicat se audivisse : nisi forte tu testem nullum, ne ocularem quidem, te unico excepto, fide dignum judices. Deinde, ocularis ille testis de quo hic agitur, erat, ni fallor, ille ipse. Quodque ipse viderit, potuit, fide minimè dubiâ, se ab eo qui viderit (nempe à seipso) certissimè intellexisse. At ais, non dicit se vidisse. Recte quidem : Sed neque negat. Hoc autem se ab illo qui viderit (quisquis ille demum fuerit) satis intellexisse, potiùs quàm, se ipsum vidisse, dixit, hac forsàn de causâ ; quia nomen suum subticuit, adeoque illa, ut istius libelli Author Anonymus, de seipso, ut personâ notâ, loquitur in tertiâ persona. (quod & alibi in eo libello passim facit.) Cur ego hoc credam, paucis accipe. Nempe memini me ante paucos annos, cum illum visendi causâ accesseram, vidisse fortè coràm jacentes libros aliquot manuscriptos, quorum quidem volumen sat magnum complere possint. Petebam, quinam erant ? Dixit mihi posthumos illos libros esse à D. Warnero conscriptos, egregio dum vixit Mathematico, (eodem nempe qui Harrioti *Artis Analyticæ praxin* olim ediderat,) eos-*

que se nuper accepisse à D. Pain, (Viro item Mathematico, tibi que, ni fallor, noto,) cui illi non ita pridem sive redditi sive traditi fuerant, postquam apud D. Hobbes aliquandiu jaccuissent. An autem eadem ipsa ibidem reperiantur quæ tu alibi, de *Visione* pro tuis venditasti, aut etiam ea quæ de *Motu per concursum* (sed à te misère depravata) hoc ipso in libello protulisti; nolo quidem ego audacter asserere, quoniã jam aliquot anni præterierunt ex quo viderim, neque adsunt præ manibus libri illi ut jam iterum consulam. Verùm dum eos ibidem ego obiter pervolvebam, memini me de *Visione* aliqua, aliqua de *Motu*, scripta vidisse; neque simpliciter de *Motu*, sed de *Motu per concursum* duorum pluriumve moventium. Et quidem quæ ea, quæ passim habes, quam tu parum intelligas, satis perpenderit, vix dubitare poterit, quin quicquid illud est sani, quod tuis perperam traditis & misère depravatis videatur nonnunquam subesse, si non ex illis Schediasmatis, saltem aliunde habueris; utut tu malè recitando tua feceris. Hæc autem cum ita sint; ego quidem minimè dubito, eum illa, de quibus agitur, *Warneri Schediasmatis* (& quidem loco citato) inesse, non auditu tantùm accepisse, sed & (utut illud non statim dixerit) vidisse; adeoque totam istius criminationis tuæ materiam tolli.

Atque jam quidem de prima tua quadratura, & quæ inde consequuntur, eamve comitantur, satis superque dictum est.

Articulo 2, iteratæ impressionis, secundam proponis quadraturam præcedente nihilo meliorem. Quæ cum longa, perplexa, & tota putida sit, vellem ego lubentèr eam intactam dimittere; nequè vel mihi vel Lectori, jam satis superque nugæ pertæ sis tuas, ulterius molestus esse. Quippe jamjam nugatum est satis. Cùm tamen tu fortasse nonnihil & hic sis expectaturus; &, si nihil invenias illi repositum, triumphaturus, quasi hæc saltem esset vera quadratura; libet & huic pauca reponere quibus constet & hanc ejusdem cum reliquis tuis esse farraginis.

Quod autem hîc agis, non est, ut perimetrum accuratè determines, sed saltem quam proximè. Quod cùm antehac multoties ab aliis præstitum fuerit & quidem satis feliciter; potuisses quidem huic labori supersedere, saltem ni id meliori successu aggressurus esses.

Perimetrum, inquis, *circuli ita numeris Geometra determinare possunt, ut minùs à vero aberrant quocunque errore proposito.* Rectè quidem. Videamus autem an ductu linearum rectarum fieri

fieri possit idem. Potest, certò certius. Nempe, inventis ejusmodi numeris, si fiant rectæ illis proportionales, fit quod imperatur. Vel etiam, si operationes illæ Arithmeticæ, quibus ad eos numeros pervenitur, in lineis peragantur. Et quidem quot modis id in numeris fieri possit, totidem & in lineis præstabitur, si eadem operationes (quod facile fiat) in lineis exercean- tur. Adeoque si hoc præstiteris, nil tamen magni præstabis, cum illud multis modis jam fieri posse constet. Sed utcunque, videamus quam tu illud bellè præstiturus es.

Sit ergo inquis, in fig. 2. (quam cum magna sit, non opus est ut ego repetam, præsertim cum non sit mihi animus per totam hanc prolixam operationem te sequi,) *BD arcus quadrantis inscripti in quadrato ABCD divisus bisariam in E.* Centro autem B. ducatur arcus CF grad. $22\frac{1}{2}$ (Benè habet) intelligatur arcus BE esse immobilis, & tam arcus BE quam tangens BC transmitti tanquam per annulum in puncto B, ita ut contineantur ne possint disjungi : Super Centrum ergo B, radius BC motus uniformiter per arcum CF. faciet ut annellus eodem tempore percurrat etiam uniformiter arcum BE. (Quid annello opus sit, non video. Quod velis hoc est. Si manente arcu BE, recta BC, quæ jam circulum tangit ita circumducatur, centro B, ut ipsius puncto C describat arcum CF uniformiter, eadem recta sic circumducta, variis sui punctis successive secabit in variis item punctis arcum BE; quæ quidem intersectionum puncta, quæ tu annelli motu designata vis, cum sint perpetuo in ipso arcu manente BE, illum describere supponi possunt; & quidem uniformiter; quia cum ad punctum B fiant in uno circulo anguli ad centrum, in alio anguli ad peripheriam, erunt hi illis, ut & arcus subtensi, proportionales; nempe arcus his subtensi arcuum illis subtensoium, ubique dupli. Atque hætenus quidem rectè; utur satis obscurè.) *Ex concursu ergo, inquis, duorum motuum, quorum alter est à B ad A rectus, alter à C ad B circularis, uterque uniformis, in tempore dato quod sit CF describetur arcus BE uniformiter.* (Hoc autem neque est perspicue traditum, neque verum. Quod tu velle videris, hoc est. In motu jam exposito (quo arcum BE descriptum vis) radio BC, centro B, describitur arcus BF, qui continuatus pertingit ad A, quem tu vocas motum à C ad B circulare, quia nempe punctum C hac latione, à recta CD retrorsum fertur ad parallelam rectam BA, quem quidem motum circularē, uniformem esse non nego. Interea verò propter

I 4

promotum

promotum annulum à *B* versus *E* in arcu *BE*, & simul à *B* versus *C* in rectâ *BC* circumlatâ, quæ eadem tandem erit (absoluto quadrante *CA*) atque ipsa *BA*, dici poterit *motus rectus à B ad C*, sive, ut tu loqui malis, *à B ad A*. (Hoc autem te velle credo, ut ut admodum obscure hoc tradas, quoniam nullum ego alium commodiorem sensum video quem tua verba ferant; suntque revera hi duo, motus illi quorum concursu describitur, ad mentem tuam, arcus *BI*.) At motus hic, utut *rectus* sit, *uniformis* tamen non est, uti tu affirmas; cum enim motus hic nil aliud sit quam continua chordæ prolongatio prout augetur arcus, non potest hic uniformis esse nisi & chordarum prolongatio sit ubique arcuum augmento proportionalis, hoc est, nisi chordæ omnes ejusdem circuli sint subtenis arcubus proportionales; quod quam falsum sit, ne tu quidem ignoras. Et quidem si proportionalis esset, non circulus sed spiralis describeretur; uti omnes norunt. Cum igitur tu hoc fundamento totam quæ sequitur superstruis quadraturam, necesse est ut misere hallucineris. Si autem non chordis hisce motum illum rectum mensurandum velis, sed potius rectis quæ rectæ *BC* sint perpendiculares (qualis esset recta *FG* à te mox designata, sed a cœlatore omissa,) nihilo tamen melius, res succederet; nam (præterquam quod motus ille prior sit tuo negotio magis accommodus, & qui motum illum per concursum rectius refert,) perpendiculares illæ rectæ sunt arcuum, in peripheria *CFA*, sinus recti; qui quidem suis arcubus non magis sunt proportionales quam ipsæ chordæ.

Cur autem tuum motum illum rectum quem vocas à *B* ad *A* uniformem esse putaveris, non minus quam alterum illum circularem quem vocas à *C* ad *B*, etsi tu nullam rationem assignes, sed gratis affirmes, (ubi tamen quam maxime opus erat demonstratione,) conjicio hanc fuisse. Cum videris motus illius recti, atque alterius circularis, secundum peripheriam *CFA* mensurandi, concursu describi arcum *BE*; atque hujus quidem *BE* segmenta segmentis ipsius *CF* proportionalia quidem, sed ubique in ratione dupla, tu interim (quasi idem sit ratio dupla & ratio duplicata) quærebas fortasse, quis ille motus erat, qui, cum alio uniformi concurrens, alium produceret qui sit in illius uniformis ratione duplicatâ, cumque tu hoc fieri posse putabas per concursum alterius item motus uniformis, sine ulteriori disquisitione tu statim concludebas, etiam motum illum rectum esse uniformem. Atque hæc fortasse, vel certe nihilo melior, illa erat ratiocinatio quæ te in hunc deduxit errorē.

Quæ

Quæ in hac tuâ quadraturâ deinceps habentur, sunt hisce nihilo rectiora. Tu enim in alios item errores, illo quem jam deteximus non minus absurdos multoties incidis. (Quod qui volet totum processum retexere, faciliè deprehendat.) Verum quum nos jam abunde vidimus ineptiarum, & satis lassati fuimus illis detegendis, sublato hoc tuo fundamento contenti, lectorem longiori ea de re tædio liberabimus.

Tu verò, quasi re jam penitus confectâ, post tres circiter paginas paralogismis refertas, tandem concludis *Inventâ ergo Bæ; &c. Quæ est Quadratura Circuli.*

Atque jam iterum Io triumphhe! Academiæ Vindici, iteratâ impressione, jam denuò insultandum est: quem igitur (quæ tua est Rhetorica) *Ineptum, Stultum, Mendacem, Nequam, Sceleratum*, appellas, iisque moribus ut ab eo laudari quam vituperari minus sit honestum. Nempe quem non nôris, (ut tecum loquar) vel saltem non prætendis scire, eum tu hoc elogio dignaris; quod quidem, si tibi credendum sit, *facere est, non dicam stultè, sed (etsi nulla nequitia sine stultitia est) sceleratè.*

Quicquid autem id rei sit, videris tu hîc mihi (quasi aliquantulum despondeas) minores quam prius animos habere, ut ut non minùs sis maledicus. Nempe tu prius, instar alicujus Pyrgopolinici absentem aliquem ad pugnam provocantis, (quem fortè præsentem satis formidaret,) quantâ cum confidentiâ, sic præfatus es; *Tu vero libelli famosi, cui titulus Vindiciæ Academiæ, quicumque celato nomine author es, Academiæ quas nunquam læsi in epte Vindex, Accusator mei mendax, promissas mihi ob soluta hæc problemata laudes istas tuas tibi condono: Laudari ab homine tuis moribus quam vituperari aliquantò minùs honestum esse judicans. &c.* Atque hæc quidem, ne quis non statim videat, mutatâ characteris formâ edenda curabas. Jam verò minori saltem confidentiâ, eâdem item cum reliquis characteris formâ, & in tertiâ persona, hæc habes; *Scio Authorem libelli famosi &c, promissas mihi laudes non præstiturum, (Ego tibi injurato credam; quippe quia nondum ea solveris problemata,) sed dicturum, non deberi. (Dic, quæso, num tu Hariolus es, an Necromanticus? qui tam rectè vaticinaris.) Libenter autem illis careo, (quam libenter, tu maximè nosti;) vel si debeantur, condono, &c.*

Mirabitur fortasse aliquis, quænam sint illæ promissæ laudes de quibus tu tam es sollicitus, quasque dicis *Academiæ Vindiciæ* tibi fuisse pollicitum. Nempe hæc sunt. Postquam te meritò increpâset, quod, *Veterum Scholis illud quicquid sit quod in Geometria*

Geometria habemus neutiquam deberi, asserueris, hæc habet 3
Audivi (inquit) D. Hobbs perhibuisse, se Problematum ali-
quot solutionem invenisse, quæ tantundem valent atque quadraturam
Circuli: Quorum ubi laborum suorum inspectu nos beaverit, ego
illis concinam qui ipsius laudes quam maxime vociferantur. (Nem-
pe hæ sunt illæ promissæ laudes.) Interea verò temporis, dis-
simulare non possum, quin malè metuan, ne hoc ipsius Geometri-
cum conamen (quantum ad hæc sublimia problemata) haud ab-
simile reperiat nupero ipsius conamini Optico, de Vitris sive lenti-
bus Conicis in modiolis sive proplasmate fundendis, quo quidem vix
quicquam suscipi posset, quod tantum quantum se cogitat virum mi-
nus deceat. (Tu autem jam vide, annon ille nimis rectè
conjecerit.) Quod autem rem præsentem, hæc breviter. Scho-
larum illarum (Atheniensem intellige Platonis, & Alexan-
drinam Euclidis, &c, eorum deinceps successoribus continua-
tas, de quibus ille jam dixerat) vel notitiam habuit D. Hobbs,
vel non habuit. Si non habuerit, ausim ego spondere, non tantum
illum esse Geometram quantum se esse perhibet, adeoque etiam po-
tissimis suis armis deesse. Si autem earum notitiam habuerit, inge-
nuitatem in eo desideramus, qui illas inutiles prorsus fuisse asserit,
nec quam habemus Geometriam illis omnino acceptam deberi. (Vide
etiam quæ tu tibi ab hoc dilemmate cavebis.) Quibus & illud
subungere libet, quod tibi, ubi Geometria defectum impu-
taveras, alibi reponit; nempe, Geometria nunc temporis eo us-
que in Academiis obtinuit, ut, ubi D. Hobbs opera ipsius Philoso-
phica & Geometrica ediderit, ego nullus dubitem, quin com-
plures possim in Academia reperire, qui de illis satis superque in-
telligant, & quidem plusquam ille intellectum vellet, plus nempe
quam ut tantum de illo, quanta ipsi satisfacere valeat, admirationem
retineant. Nescio autem annon hic doctissimum illum virum fe-
fellit expectatio. Vel enim ego fallor, vel post hoc editum opus
tuum, major futura est tui quam olim admiratio: (miran-
tur enim, quæ tu possis tam penitus insanire:) An autem
ea sit quæ tibi satisfaciatur necne, tu maxime noveris. Sed de
his hætenus.

Articulo 3. jam (præter expectationem) tertiam proponis
 Circuli quadraturam, eamque, si tibi credamus omnium optimam.
 Nempe quæ non sit, *Quadratura falsa ex falsa hypothesi*, ut prima,
 neque etiam quamproximè vera, sive (ut tu loqueris) *Inventio*
rectæ arcui quadrantis tam prope æqualis quam quis velit, quæ erat
secunda, sed accuratè, sive, ut tua promittit Epigraphæ, Omnimoda
sectio anguli, & Quadratura Circuli vera.

At verò, mihi crede, me tuī revera miseret. Quamvis enim *αὐδαίσεια* tua, atque intolerabilis animi elatio, cum aliorum contemptu conjuncta, postulent, ut severiùs tecum agam; non tamen illud sine aliqua tui miseratione factum est (non enim ego naturā sum crudelis) quā me multoties tactum non diffiteor. Cū in primā tuā quadraturā cœno volutaveras, dixisti te amicorum auxilio ereptum esse. Quis autem crederet in id ipsum cœnum, in eandem foveam, unde te nuperrimè eripuerunt, te protinus relapsurum? Ostendit tibi, credo, amicus ille tuus, qui istius quadraturæ errorem detexit, deductione forsan ad impossibile, (cujus tu fundamentum recitas ad finem articuli primi,) quadraturam illam veram non esse, (quod tibi suffecisse posse ipse judicavit,) cū autem non te item prehensa manu duxerit per singulos istius processūs errores, & singulos eorum fontes digito indicaverit, *Cogitationum illa tuarum series* (utut falsum esse jam fastus fueris quod inde sequatur) *legitimæ demonstrationis vim in se habere tibi adhuc visa est*, (uti post recitatam tuam Analysin, quā eò deventum erat, te modò loquentem audivimus,) adeoque eādē ipsā semitā in eandem iterum foveam dilaberis. Est enim hæc tua tertia quadratura, adeo primæ similis, eodem erroris fundamento nixa, ut potius eadem repetita, quam ab eā diversa, dici mereatur; ut mirum sit, qui illam falsam esse noverit, hanc esse veram putasse posse. Nempe id utrobique tibi fraudi fuit, quod putaveris, rectis duas parallelas rectas proportionaliter secantibus, interjectum illis arcum circuli proportionaliter item secari: quod quidem mirum est virum in Geometricis vel mediocriter exercitatum putasse posse.

Ego rem paucis expediam, atque hanc etiam quadraturam dimittam. Cum enim eadem ferè sit cum primā, quæ ad illam fusiùs diximus non opus erit ut hic prolixè repetam. Adeoque nec totum processum repetam, nec etiam figuram tuam, quæ apud te conspici possunt. Sed nonnulla leviter attingam. Nempe 1. Sumantur, inquis, *utrinque rectæ cf, cg, arcubus ca, cb, utraq; utrique æquales*. Dic autem, annon hoc est egregium postulatū? præsertim in eadem ipsa propositione ubi propositum sit circulum quadrare? Dices forsan, te propositione præcedente id docuisse, ut & quadrare circulum; hic autem agi tantummodo de angulorum & arcuum sectione. At, inquam, Epigraphe tua etiam circuli quadraturam in hoc articulo spondet, & quidem *veram*, cum illa præcedentis articuli sit tantum *quamproximè*. Item in hujus articuli fine tu hoc articulo *inventam* concludis *rectam exactè æqualem arcui acb, & proinde toti circuli perimetro; & area circuli æquale quadratū*: ubi autē hæc erant cōcludenda, dic, quæso, num

tu illud postulandum putes. Denique quod ad præcedentem articulum attinet, tu illic nil aliud suscipis quam ut inveniatur recta arcui æqualis quam proximè, at hic tu illud fieri jubes accurate. Nam nisi illud sit, non inveniatur recta *exactly* æqualis arcui *abc*, quod tamen tu hic factum esse perhibes. 2. Si illud postulandum esset, & quidem factum esse concedatur, nempe rectas *cf*, *cg*, arcubus *ca*, *cb*, sigillatim æquales esse: tu tamen hinc tua methodo ad quæsitam anguli sectionem in ratione datâ nunquam pervenies. Dum enim tu putes rectis à puncto *q* ductis, quæ rectas *cf*, *ki*, in eadem ratione secant, arcum item *ca* in eadem ratione secari; quam tu miserè hallucineris, ostendimus supra ad primam tuam quadraturam. 3. Cum autem tu hujus probationem aliquatenus aggredieris, atque constructis reliquis, arcuque *ca* in *t* bisecto, hæc habes, Si jam *qr* transsit per *t*, arcus ac & recta *ux* secantur in easdem rationes, quia *ux* dupla erit *xt*; (quod quidem eo concessio verum esset, id autem ita esse tu cogere te posse putas hoc modo, nempe,) Sin non transeat *qr* per *t*, ducta *mt* producat ad *cf*. (quod si fiat, non pertinet ea recta sic producta ad punctum *r*, uti tu putas, & quod jam probandum est.) A duobus ergo motibus per *mt*, *kc*, ponentur *m* & *k* in *c* & *t*, nec dum plenè ibi extendentur duo arcus *mn*, *nk*, (supponis tu tamen eos ita saltem extendi ut evanescat angulus qui jam conspicitur ad *n*, ut duo illi arcus jam unus fiant, qui arcui *ct* coincidat; quod ita quidem supponi posse non negamus, utur non æquabili motu quod tu videris putasse. Sed quid porro?) Quare in productâ *mt*, stante puncto *c*, extendentur tandem in sibi æqualem, id est in *cr*. (At hic vacillat tua demonstratio, & manifestò petit principium. Quamvis enim concedamus extensum arcum *ct*, rectæ *cr* quæ ipsi æqualis supponitur congruere posse, adeoque punctum *t* ad punctum *r* pervenire, attamen tu nusquam ostendis, an motus ille à *t* ad *r* fiat in linea rectâ *tr*, annon potius in aliqua curva. Et quidem si recta eò tendat, non tamen sequitur rectam illam *rt* esse ipsius *mt* continuationem, sive in ipsâ *mt* productâ jacere; quod dum tu supponis, principium petis, nam hoc id est quod iam erat probandum. Non sequitur igitur quod tu inferis, cadet ergo *rt* producta in *m*: neque illud, In eadem ergo sunt rectâ *mt* & *qr*. Adeoque tota cadit tua demonstratio. 3. Cum tu sic ulterius procedis, Eodem modo si sumatur *zC* sinus quartæ partis arcus *ca*, & producat ad *af* in *y*, erit *zy* ad ipsum sinum quadruplus: (notet autem lector, quod coelatori imputandum erit, literam *x* quæ in schemate deest, illic ponendam fuisse ubi jam est litera *y*, ipsam autem *y* literam ad reliquum ejusdem rectæ

rectæ terminum ponendam inter literas *f* & *u*;) tu id ipsum peccas quod in quadratura prima peccatum fuisse amicus tuus jam ante ostenderat. Ut enim illic *AL* non erat præcisè quarta pars rectæ *ac*, ita neque hic est *z6* pars præcisè quarta rectæ *zy*. Atque hæc ad tertiam item quadraturam tuam eliminandam sufficiant.

Ad illud autem ἐπιφώνημα tuum, vel Epiphonema triumphale, quo tu jam terriò de Vindice triumphas, *Et laudes mihi tuæ deberentur (Vindex) nunc, nisi noluissem:* (Quod mutatâ characteris formâ, quò magis sit conspicuum, pingendum curâsti; quasi tu animos, modò languescentes, jam iterum revocaveris;) Hoc tantum reponendum judico; Non multum tibi opus esse, ut metuas, ne Vindex ille te velit nolentem laudare.

Quod habes de quadratura Sectoris, vel etiam Segmenti circuli, ex data longitudine tam radii quam arcûs; nemo nescit.

Articulus 4, totus est ex Archimede de Lineis Spiralibus. prop. 18. Nempe si sumatur (in figura tua 4.) *AI* recta æqualis peripheriæ *BCDE*, & perpendicularis radio *AB*, quod sit item principium circulationis in spirali *AFGHB* describendâ, recta *IB* Spiralem tanget.

Articulus 5. (ubi proponitur *Data Spirali rectam æqualem invenire;*) est totus putidus. Linea Spiralis *AFGB*, non est (quod tu affirmas) duabus rectis *MP*, *PK*, æqualis. Demonstrationi tuæ per partes respondebimus.

1. Curvam parabolæ à duobus motibus describi posse, quorum alter (puta sinistrorsum) sit uniformis, hoc est spacia absolvat temporibus proportionalia, alter (puta deorsum) uniformiter acceleratus, (ut tuis verbis loquar,) sive spacia absolvat in ratione temporum duplicata (à motûs principio inchoanda;) quod tu à Galilæo ostensum dicis; nos item concedimus. Sed interim notamus non id frustra à nobis superiùs dici; nempe quòd verum illud quod propositionibus tuis falsis aliquando subesse vidimus, suspicandum sit non tuum esse; sed aliunde acceptum, à te solummodo depravatum; quamvis non statim dicere valeamus unde habueris. Hoc enim quod tu ex Galilæo desumpseras verum, quàm tu miserè depravatum tuis assumentis edidisti, ut inde efficias tuum art. 9. cap. 16. nos suprà ostendimus ad illum articulum. Nam id unicum quod isti articulo suberat veri, tu ex Galilæo assumpseras, (quod quidem ego tunc nesciebam, utut suspicabar tuum non esse,) reliqua ibidem omnia sunt depravatissima.

2. Helicen

2. Helicen Archimedeam describi ex duobus motibus, altero recto, altero circulari, (sed utroque uniformi) ostendit Archimedes. Motum autem ex his compositum ita accelerari, ut spacia absoluta (à motus principio inchoanda) sint in duplicata ratione utriusvis, (adeoque & temporis,) quatenus verum est ostendimus nos, prop. 10, 11, 13. *Arithmet. Infinit.*

3. Tu verò, dum motum hunc ex utrisque compositum, habeas pro componentium uno, perperam concludis *Similem esse generationem Parabolicam & Spiralem*. Cum tamen, si utriusque generationem intellexisses, conclusisses potius earum generationem dissimilem esse; quippe illa generatur ex concursu duorum motuum quorum alter uniformis est alter uniformiter acceleratus; hæc autem ex concursu duorum motuum quorum uterque est uniformis. Adeoque cum totus deinceps processus ex ea quam somniabas generationum similitudine (quæ sunt revera dissimiles) dependeat; sublato hoc fundamento, reliqua simul ruunt.

4. Dum tu velocitatum simul omnium, seu (ut loqui solebas, idque definitionibus tuis conformiter) impetuum simul omnium, aggregatum, (quæ est ipsa velocitas, juxta definitiones tuas cap. 15, & 16. traditas, à quibus recedendum jam non erat,) circulo designari vis; ego non repugno. Cum enim, inter describendum spiralem impetus continuo crescant in ratione temporum (unde tu colligis emensa spacia, esse in duplicatâ ratione temporis) possunt quidem illi designari non modo rectis parallelis in triangulo (secundum art. 1. cap. 16.) sed etiam non minus totidem peripheriis concentricis in circulo; nam ut illæ distantis à vertice, ita hæc distantis à centro sunt proportionales.

5. Cur autem velocitatum (seu potius impetuum) simul omnium, quibus describitur curva parabolica, aggregatum, parallelogrammo designetur, uti tu hic vis: nullam rationem vel ego video vel tu assignas. Sed omnia potius contrarium suadent. Impetus enim continuo crescere, certum est; cum tamen rectæ in parallelogrammo parallelæ sint æquales.

6. Cum igitur tu, ex æqualitate circuli & parallelogrammi, probatum is, æquales esse lineas Parabolicam & Spiralem, nihil concludis. Quod interim num verum sit necne, colligere possis ex Scholio prop. 38. *Arithmet. Infinit.* modò calculum illic indicatum rectè instituas.

7. Imò verò, si verum esset, impetuum aggregatum alterum circulo, alterum parallelogrammo ritè designari; non tamē inde de linearum æqualitate quicquam concludi possit: nam ut illud quovis circulo, ita & hoc quovis parallelogrammo designari posset.

Cum

Cum enim siue peripheriæ concentricæ in circulo, siue rectæ parallelæ in parallelogrammo, non tam impetuum magnitudinem positivam, (cum enim linea & impetus sint res heterogeneæ, nulla inter eas vel æqualitas vel inæqualitas intercedit, adeoque quilibet impetus qualibet linea pro designantis arbitrio designari potest,) quam duorum pluriumve ad invicem rationem designent, sit autem in figuris similibus siue majoribus siue minoribus eadem homologarum rectarum ad invicem ratio; non hic magis quam ille circulus (& similiter de parallelogrammo) requiritur ad ejusmodi impetus designandos, sed ad libitum quilibet assumi potest. Alia igitur determinatione opus erat, quam tu adhuc hic attulisti, priusquam huiusmodi argumentis aliquid firmiter concludatur.

8. Denique si demus omnia hucusque vera esse, cum tamen spes tua, de inveniendâ Rectâ datæ Spirali æquali, tota hinc dependeat quòd tu te putaveris cap. 18. art. 1. invenisse rectam æqualem lineæ Parabolicæ: Nos illic te ostendimus planè hallucinatum esse. Adeoque & hic etiam hallucinaris. Rectam autem utrivis quam proximè æqualem invenire, docuimus ad prop. 38. *Arith. Infnit.*

Atque jam quidem, cum tu antea jactitaveris te *Circuli quadraturam* invenisse; *quadraturam cujuslibet dati Sectoris, & Segmenti circuli; rectam Spirali, rectam Parabolicæ æqualem; Angulique in data ratione sectionem*: atque inde tibi nescio quas ingentes deberi laudes somniaveris: Nos sigillatim suis locis ostēdimus te horum nihil invenisse.

Articulo 6. longam habes de *Analyticâ Geometrarum digressionem*. Quæ, ut nil magni continet, ita passim immista habet, quæ vel falsè vel saltem minus accuratè dicta sunt. Putà, cum in *Definitionibus omnibus contineri vis constructionis causam efficientem*, quam tu affirmas *in motu consistere vel concursu motuum*. (quippe tu, propter vertiginem tui cerebri, putas omnia in motu consistere; atque ea quæ vel maximè stare videantur vel permanere, non posse aliter quam *motu & tempore* definiri.) Item, cum *terminos omnium rectarum quotquot esse possunt ab aliquâ lineâ rectâ ductarum, & transeuntium per idem punctum, si partes illarum sint in eadem ratione, desinere affirmas in unâ lineâ rectâ*. (Quod, inquam, utut verum sit, minùs tamen accuratè dicitur, cum dicendum esset *in parallelâ rectâ*; saltem illi qui nuperrimè dixerat, *In quæstionis siue problematis cujuscunque Analyfi & Synthesi*, quòd tu illam propositionem spectare vis. oportere terminos *omnium propositionum esse convertibiles; vel si hypotheticè enunci-*
entur,

entur, non modò ex veritate antecedentis veritatem consequentis, sed & contrà, ex veritate consequentis, antecedentis veritatem inferri necesse esse. Quod vide an tuæ isti propositioni conveniat. Non enim, è conversò, Si ad unam lineam rectam terminentur illæ rectæ, tu affirmabis eas in eadem propterea ratione puncto illo secari.) Quod autem affirmas idem accidere puncto sumpto inter duos circulos, (intelligis, credo, inter duas in eodem plano peripherias, saltem concentricas,) omnino falsum est. Similiter, cum dicas, ut *Termini rectarum parallelarum ad eandem rectam applicatarum, cujus rectæ ad quam applicatæ sunt partes duplicatam habent rationem ejus quam habent inter se contiguæ applicatæ, omnes eorum termini erunt in sectione conicâ*: Hoc, inquam, minùs accuratè dictum est: nam (præterquam quòd verticis nulla sit mentio unde inchoandæ erant partes illæ, neque etiam de Syntaxi satis constet,) pro *sectione conicâ*, ob rationem modò dictam, dicendum erat *parabolâ*, non enim in ullâ aliâ sectione conicâ illud continget. Et similiter alia passim, quæ partim falsè, partim incommodè & minùs accuratè dicta sunt.

Id autem, quod tibi in hac digressionem videatur maximè propositum, est, ut *Analyticæ tuæ per computationem motuum* (ut loqueris,) quia motu, inquis, & tempore æqualibus æqualia describuntur *Spacia*, (quasi ad hoc unum omnia sint revocanda, quia tu adeo motum deperis, præ aliorum *Analyticâ*, quam *Analyticam per potestates* appellas, ostendas excellentiam. Quippe *Analyticæ pars ea quæ est per potestates, etsi quibusdam Geometris (non illis ex primâ classe) ad problemata omnia, quæcunque illa fuerint, solvenda, idonea visa est: angusta tamen res est,*) nempe præ tuâ illâ per computationem motuum: quasi quidem hæc computatio, sine debitâ potestatum consideratione fieri possit, aut etiam ubi rectè instituitur ipsius pars non sit:) adeo ut etsi venerint ad æquationem quæ quantitatem quæsitam determinat, in plano tamen eam quantitatem aliquando exhibere per artem non possunt, (nempe, non regulâ & circino, quod tu tamen arte tuâ semper te posse putas,) sed in sectione aliquâ *Conicâ*, cuiusmodi problemata *Solida* appellant; & quando neque ope sectionis conicæ exhibere eam possunt, problema appellant *Lineare*; (cum tu tamen arte tuâ planorum speculatione absolvis omnia.) Itaque, inquis, in quantitatibus angulorum & arcuum circuli usus *Analyticæ per potestates* nullus est, (nempe quem tu noris.) Antiqui igitur sectiones angulorum ultra bisectionem & bisegmentorum bisectiones, in plano, nisi mechanicè, exhibere impossibile esse pronuntiârunt: (Nempe per planorum Geometriam, ut loquuntur, id fieri posse non putabant.

bant. Quid tum?) *Videtur autem non parvum peccatum esse apud Geometras (uti tu ex Pappo refers) cum problema planum per conica vel linearia ab aliquo invenitur. (Videamus ergo, quid tu eos excuses?) Quid ergo? Geometra antiqui qui ad rectam invenendam arcui circuli æqualem per Quadratricem, & ipse Pappus qui per Hyperbolem invenit anguli dati trisectionem, an peccaverunt? an ego fallor qui utrumque problema solâ regulâ & circino construxisse me opinor? (sic enim in impressione penultimâ habetur; cum autem tu in ultimâ hanc postremam clausulam omiseris, manentibus reliquis: sensum ita imperfectum reddis ut quò tendant ea non faciliè sit hariolari.) Neutrum. inquis. (Imò certè alterum dicendum erit, ob rationem à te ex Pappo citatam; cum autem te falli nondum putes, videamus quidni eos putes peccasse?) Nam (inquis) utebantur antiqui *Analysi* hac per potestates, (& propterea per ea quæ tu modo innuebas, non illis ex prima classe *Geometris* annumerandi sunt,) & quæ per proximas fieri potuere, peccatū erat si facerent per remotiores; argumentū enim illud erat (lege esset) quod rei naturâ non satis intelligerēt. Hâc igitur tu solâ excusatione illos defendis, quòd eorum per Potestates Analyticâ non possit illud expeditiùs fieri, quam ab illis factum est; tuam autem, per motuum computationem, Analyticam si novissent, excusandi non fuissent, per quam id expeditiùs fieri posse te ostendisse putas. Quàm autem imbellis sit istæc excusatio, inde patet, quòd tu ne tuam quidem methodum illis ignotam fuisse suprâ monuisti, cum dixeris hâc methodo usum esse *Archimedes* in *Spiralibus*. Dixissem ego potiùs veteres illos ritè fecisse, te autem perperam.*

Deinde, postquam *Analyticam* per potestates ulteriùs adhuc vilifeceris, novam tuam, per motuum computationem, ut rectiùs commendes, hujus exemplum tradis (saltem in impressione penultimâ;) ostendis nempe, quibus te motibus illa ad primam tuam quadraturam perduxerit; quam nos *Analytin* superiùs examinavimus.

Tū autē, quasi adhuc securus, si non primâ tuâ quadraturâ (quæ tum utut veræ demonstrationis vim in se habere putaveris, rejiciendam tamen ut falsam monitus ab amico fueris, adeoque secundam & tertiam istius loco substitueris, unde hoc saltem acquisiveris, ut si non veritate, tamen numero tetragonismorum gloriari possis,) saltem secundam & tertiam veras esse: Sic impressionis penultimæ caput concludis (quæ impressionis etiam primæ conclusio fortasse fuerat;) *Ex his quæ dicta sunt de circuli dimensione tam multa deduci alia possunt, ut videatur mihi Geome-*

tria, quæ longissimo tempore hoc loco hæsit tanquam ad Herculis columnas, propulsa jam in Oceanum ad alium Theorematum pulcherrimorum Orbem navigatura. Etenim non dubito quin ex cognita ratione rectæ lineæ, ad arcum Circuli, ad Parabolicam, ad Spiralem; cogniti tandem exitura sit rationis ejusdem rectæ etiam ad Hyperbolicam, & Ellipticam, atque etiam inventio mediarum inter duas extremas continuè proportionalium quocunque: (Optandum sanè ut tu etiam hæc sublimia problemata nobis exposuisses; potuisti enim, non dubito, eadem felicitate qua Circulum quadraveris; metuo autem, ne, si tu nobis hac in re tuam negaveris opem, nos hebetes ex tuis hucusque traditis principiis ea nostro Marte nunquam inveniamus:) quæ Analytica per potestates nullam præbent *Λάβην*. (quam autem labem tua nacta est Analytica nova jam vidimus.) Et fortasse nisi properarem, (instar canis festinantis,) scilicet amicis ea quæ parata habeo flagitantibus, aliisque causis quas dicere non est necessarium urgentibus, ego invenire eas possem. (Quidni enim, cum Geometriam jam ultra Herculis columnas in Oceanum promoveris, etiam ipse in novum Orbem naviges? Nisi malis navigare Anticyras.) Ea itaque laus (proh dolor!) aliis reserve-
tur, & si ita contingat, (quod te malè haberet admodum) Vindici Academiæ (quem tu jam quartâ vice lacestis,) qui methodum illam Antiquorum, (id est, ut mihi quidem videtur, Euclidis, Archimedis, Apollonii, Pappi,) verbosam, & omnium ferè recentiorum, quales sunt Clavius & alii, deseruisse (ni tu fidem fallas) se jactabundus dicit, captum scilicet omnipotentia methodi Symbolicæ. Ubi ille se vel veteres, (Euclidem, Archimedem, Apollonium, Pappum,) vel recentiores, (non quales tu, sed) quales Clavius & alii, deseruisse dicat, ego non video. Si autem ille alicubi dixerit, Recentiorum aliquot methodum Symbolicam, Veterum, verbosâ traditione, commodiorem esse, quod vel plura paucis ostendat, sive (ut tuis pag. præced. verbis utar) sit Analytica ut ita dicam *Βραχυλογία*, sive ars inventa Geometrarum celeriter & compendiò in Commentarios redigendi, (quod quid aliud sonent, quam minus verbosam esse, ego non intelligo,) vel quod tam inveniendi quam demonstrandi via sit magis expedita, (contrâ quam tu asseris, nempe artem esse neque docendi neque discendi Geometriam,) ego non video cur vel ille culpandus sit, vel te malè habeat: quod enim tu te certè nescire profitearis, an valdè utilis existimanda sit, id tuæ potius ignorationi quam artis illius inutilitati dandum erit.

Tandem verò, cum (amicis forsan monstrantibus) quadraturam tuam secundam item & tertiam non minus esse quam primam

primam vitiosas, intellexeras: loco istius Epilogi, hanc substituis, (unde spes tuas de quadratura jam cassas esse videamus, & rem penitus conclamata,) Cum, post excusa hæc, tetragonismo antecedenti (seu potius, tribus antecedentibus) posse adhuc aliquid obijci (nempe plane falsas esse,) animadvertissem, visum est potius de ea re Lectorem monere, quàm (cum nulla tibi spes restet meliores inveniendi) totius libri editionem (postquam jam tribus annis sub prælo fuerat) diutius retardare. (ne forsan amicus idem qui priores illos errores jam deprehenderat, reliqua etiam, si forte conspiciat, abjicienda suadeat.) Placuit quoque ea stare (elegantè) quæ meritò pertinent ad Vindicem, (qui, jam quintò laceffit, se fortè olim vindicabit.) Sed quæ de dimensione Circuli & Angulorum promunciatæ sunt tanquam exactè inventæ, accipiat Lector tanquam dicta Problematicè. Quod quem sensum ferat suprâ diximus, ad hujusce Capitis initium.

IN CAP. 21, &c.

HOC autem Capite sic absoluto, cum vires tuas jam satis experti videamur, tempus est ut præsentî negotio periodum imponamus. Sequuntur quidem jam adhuc quatuor capita quæ tu huic parti Geometricæ accenses: verum ea non purè Geometrica sunt, sed ad Philosophiam potius naturalem spectant, vel ad eam saltem viam sternunt, adeoque ad illam potius releganda iudico. Nempe in Cap. 21. de Systemate Coperniceo agitur; de Fermentatione item aliisque motibus corporum internis. In cap. 22. de cætera Motuum varietate; puta de varietate mediorum, de Fluido, Lento, Molli, Duro, Vacuo, Pleno, &c, de motûs propagatione, de corporum compressione, penetratione, nixuq; opposito, de dilatatione, contractione, tractione, pulsione, vactione, percussione, pondere, reactione &c. In cap. 24. de Refractione agitur, & Reflexione Physicâ. Quæ omnia cum Physicam magis postulant speculationem quam Mathematicam, à suscepto nostro videantur remotiora. Est autem caput 23, ubi de Æquilibrio agitur, cæteris *περὶ τοῦ κέντρου*. Quæ autem illic habentur, præter trita quædam sub initio, à capitis 17 art. 9. dependent omnia, qui item ab ejusdem capitis art. 2. totus dependet. Quos quidem articulos cum suprâ perpendimus, invenimus planè indemonstratos esse nec ullo legitimo argumento munitos. Cum igitur tu nihil adhuc produxisti quo suadeas eos veros esse, sed quæ obtendis demonstrationem planè putidam invenimus, non est cur de iis quæ inde dependent admodum simus solliciti. Quamvis enim, præter illam fundamenti imbecillitatem, alia passim animadver-

animadvertenda sint vitia, non tamen tanti erit ut iis sigillatim retexendis Lectorem diutiùs detineamus. Dummodo enim de figurarum illarum, quas tu ibidem considerandas suscipis, magnitudine per tua nondum constet, (nec quidem tuâ methodo, quam art. 2. c. 17. proponis, unquam constare possit,) frustratu ex eâ quasi inde cognitâ de centro Gravitatis inquiris; si autem de magnitudine tandem aliunde constiterit (uti quidem ex nostra *Arithmet. Infinit.* constare poterit.) de Centro etiam Gravitatis non difficulter constabit per ea quæ ab Archimede aliisq; de illo negotio scripta sunt. Si autem in tuis illis aliquid fortasse aliquando veri inesse contigerit, id tibi nullo modo imputandum erit, cum tuâ methodo quâ tu illud te invenisse perhibes eò nunquam ritè perveniri possit; (ut ad cap. 17. art. 2. abundè ostendimus;) ideoq; te vel fortè fortunâ in illud incidisse, quod non videtur probabile, vel potius aliunde, celato authore, illud habuisse. Atq; hæc erant quæ de hoc negotio dicenda primum putaveram.

Postquam autem hoc opus penitus finiveram, eique supremam manum me apposuisse putaveram; ejusque magnam partem absolverant Typographi; insperatò incidi in locos aliquot *Mersenni*, qui illud abundè confirmant quod ego superiùs aliquoties innuimus nempe quod tuis aliquando subesse verum deprehensum est, id tuum non esse, sed aliunde desumptum.

Monuerat fortè amicorum aliquis, apud *Mersennum* aliquid occurrere de mensurâ lineæ Spiralis: quod ansam dedit *Mersennum* eâ de re consulendi. Cujus *Cogitata Mathematica* mutuò nactus, ad Prop. 25. *Hydraulicorum*, Coroll. 2. reperi te tuam lineæ Spiralis & Parabolicæ comparisonem, quam habes cap. 20. art. 5. inde desumpsisse. Quæ quidem, si vera sit si vera falsa, saltem tua non est, sed *Robervalli*, ut ex *Mersenni* loco citato pater. Eras fortasse tu *Vir doctus* ille ibidem memoratus, qui restam helici æqualem se invenisse falsò putaverat, vel ab illo saltè viro docto edoctus; nam id illis quæ tu de hac re profers articulo citato omnino quadrat; quæ quamvis *Robervallus* ut videtur erronea fuisse demonstraverat, tu tamen adhuc retinenda putasti. At quæ de Helice & Parabolâ comparandis illic habentur, *Robervallo* (quem *Geometrae nostri* nomine se semper intelligere dicit *Mersennus*) diserte tribuuntur. Te autem inde desumpsisse, quò quis minus dubitet, etiam errores simul transumpsisti.

Dum verò *Mersennum* sub manibus habebam, libuitque cursoriè pervolvendo sparsim inspicere quid contineat, alia passim reperi, quæ cum immista tuis antea deprehenderam, nec sciveram uspiam extare, mirabar unde

tu illa desumpseras. Nam ea te primitus invenisse ne suspicabar quidem.

De Parabolastrorum mensura Cap. 17. Et centro Gravitatis, Cap. 23. quod tu Veri profers, (quod quidem præcipuum est eorum quæ tuus liber habet) videre est in præfatione *Mechanicorum* Mersenni, punct. 3. & 4. Nempe rem illam quam (referente Mersenno) quidam *Vir Illustris* inceperat, & promoverat *Vir alius summus*, idem vir summus cum *Geometra* tertio, (*Robervallo*,) eò perduxit, ubi tu illam invenisti; ut nihil tibi supersit quod in illo negotio tuum dicatur, nisi quod cum illic demonstrationes desint, tu falsas subjunxeris, (quibus ostendas inventa illa, tua non fuisse, nec quidem à te satis intellecta;) adeoque quæ illi (sed sine demonstratione) rectè statuerant, tu turpiter depravando suspecta reddidisti. Quinam illi fuerint *vir illustris* & *vir alius summus*, non statim liquet; si autem Clarissimi Viri quem hac de re consului (qui & Mersenno fuit familiariter notus) conjecturæ standum sit, *Cartesius* alter, alter *Fermatius* putandus erit; tertium verò, *Geometra* nomine indicatum, *Robervallum* fuisse satis constat. At, inquires, quidni tu eorū unus habearis? Fortasse quidem, (quod tamen haud crediderim:) at certè tu tres illi non fuisti; cum tamen quod illi omnes præstiterant, tu jam ut tua venditas. Cur autem te ne unum eorum esse putaverim, id maximè facit, quòd cum Cap. 17. art. 2. (quod reliquis fundamentum est) demonstrationem aggredieris, tu te adeo ridiculum præbes, ut nisi aliter inventa fuerint quam tu illic perhibes, neque adhuc pro inventis habenda erunt. Et quidem ego, per ea quæ tu illic habes, ne suspicarer quidem quicquam subesse veri, nisi id ipsum ante aliquot annos ipse invenissem; nam id alii cuiquam suboluisse planè nesciebam.

Vide etiam annon Methodus illa tua *per motuum compositionem*, quam tantopere deperis (ut uti nescias, sed abutaris miserè.) *Robervallo* sit in integrū tribuenda, per ea quæ habet Mersennus *Manito* post prop. 32. *Ballisticorum*; quem testatur Mersennus tantum ex motuum compositione profecisse, ut illorum ope (inter alia) *generalem methodum invenerit ad cujuslibet curvæ tangentes facillimè reperiendas*. Credo tamen istius methodi originem Galilæo deberi, progressum *Robervallo*, tibi autem in hoc negotio, præter eorum quæ illi invenerant depravationem, prorsus nihil. Quæ autem de *Tangentibus* ipse protuleris cap. 17. art. 5. nescio an à *Robervallo* habueris, an potius à *Cartesio*, quem audio (præter illa quæ in *Geometriâ* suâ occurrunt) alia de *Curvarum Tangenti-*

bus invenisse; ea forsā quæ habentur punct. 3. præfat. Mechanicorum Merseñni; unde tu desumpsisse videris, Robervalli forsā ope adjutus.

Quæ de Conoidibus habes ejusdem capituli art. 7. & 8. inde desumpta sunt unde reliqua, nempe ex Mechanicorum Merseñni præfatione, punct. 3. & 4.

Quod de Systemate Coperniceo profers Cap. 21. nihil in se habet novi; cum enim Copernicani omnes Terræ motum annum talem supponunt, ut dum Terræ Centrum Eclipticam describat, illius interim Axis situ sibi semper parallelo feratur; quem motum duobus circularibus æquipollere docent: Tu dum duos illos motus circulares lationi illi doceas æquipollere, quid quæso novi profers? nisi tu id aliquid magni putaveris quod tu novum huic lationi nomen indideris, (quam accuratè, judicent alii,) dum *Motum Circularem simplicem* appelles. Audio tamen te de hoc etiam, quasi tu hic magni aliquid præstiteris, gloriari.

Art. 9. cap. 16. Quod unicum illic subest Veri (quod & de sequentibus aliquot articulis ad istius imitationem constructis judicandum puto) Nempe Parabolam duobus ibi memoratis motibus describi, ex Galilæo desumptum esse discimus ex cap. 20. art. 5. (sed mediante forsā Merseño.) Quæ autem de tuo conaris superaddere ut parabolam determines, sunt depravatissima.

Si quid autem, præter hæc, alicujus esse momenti tu putaveris, (quod quidem quid sit, non video,) non dubito quin faciliè ostendi poterit, vel non tuum esse, vel non sanum.

Tandem, dum hæc ago, incido in Merseñni locum *Reflexionum Physico-Mathematicarum*, cap. 1. art. 5, qui conjecturam modò memoratam confirmat; Nempe, duorum, de quibus dubitavimus præfat. Mechan. memoratorum, alterum *Chariesium*, alterum *Fermatium* esse, Merseñnus ipse prodit. Ut jam dubium non sit, tuas in ea re partes (si errores excipias) omnino nullas fuisse. Adeoque in totâ tuâ Geometriâ vix quicquam reperiri alicujus momenti, quod & tuum simul sit & sanum.

Si quid autem in posterum moliturus es, ego tibi author essem, ut, non unum aliquod capitulum, quod hic factum videtur, sed totum opus, priusquam prodeat, amicorum tuorum alicui qui sanioris sit cerebri examinandum permittas, vel potius ut ipsius ope in toto opere concinnando utaris, ne te iterum pariter exponas ludibrio. Quo an fueris usus consilio, ubi tuum aliquod Geometricum deinceps prodierit citò cognoscemus. Si enim hisce simile sit, tuum esse putabimus, (neminem enim alium ita scripturum credo;) sin rectius quidpiam, amicorum auxilio te fretum esse minime

minime dubitabimus, qui solus quàm tanto impar sis negotio luce meridianâ clariùs innotescit.

Epilogus.

Verùm aliud adhuc tibi dicendum habeo, quod quidem te potissimum spectat. Es tu, uti audio, jam senex: Neque diu erit antequam tibi de Rationalis Animæ Immortalitate constabit, quam an tu pro rato habeas, necne, meritò dubitandum est. Velim igitur ut tecum seriò perpendas, quid de te tandem fieri contingat, si forte contigerit vel animam tuam corpori superstitem, vel eidem aliquando reunitam, istius Numinis tribunalis sistendam de quo (ne gravius quid dicam) tu parùm dignè senseris. Velim ut revolvās, quæ tu, ut alibi, ita Leviathan præsertim tuo passim inserta habes, quæ de Deo secus quam pro tanti Numinis Majestate te sensisse ostendant: de Sacra item Scripturâ, cujus tu auctoritatem plus satis elevas, eaque audacter enuncias quæ Historiæ Sacræ satis sunt adversa: de Peccato item, quod quidem tu omnino nullum esse audacter asseris, præter unum illud *Inobedientiæ in magistratum civilem*, ut cui magistratus civilis vel nullus sit, vel nihil vetet, ei nihil non liceat: de toto denique Cultu Divino & speciatim Religione Christiana, quam tibi non ulterius curæ fuisse, quàm quatenus sanctione civili munita videatur, videtur metuendum. Quid tu de hisce, aliisque, præcipuæ notæ, Religionis apicibus senseris, tu optimè noveris: Quàm autem tu id rectè senseris, non tuo standum erit iudicio. Novisti porro quàm de te tuisque sublimia cogitaveris, quàmque alios eorumque vel scripta vel cogitata superciliosè contempseris. Religionem quippe Christianam, ab ipsis usque Apostolorum temporibus hætenus traditam, Empusam esse vis, luce tuâ protinus fugandam: Aliorum hætenus Philosophiam, Phantasma quoddam solo risu dignum: Metaphysicam, veris tuis clarèque ordinatis Physicæ principiis dissipandam: Doctrinam Civilem, libro tuo *De Cive* nihilo antiquiorem, sed mundo priùs penitus incognitam: Omnes insuper hætenus sive Veterum Scholas, sive recentiorum Academiās, nulli unquam usui fuisse; nec quidem aliquando fore, nisi à te forsan edoctas: Regimen denique omne, tam Ecclesiasticum quam Civile, te tandem arbitro, firmissimis à te rationibus statuminandum. Unde autem hos animos? unde tibi hanc tantam confidentiam concepisti? Nempe, si de superioribus agatur; ad Philosophiam recurris, cui istarum rerum fundamenta deberi perhibes, neque de tuis alibi dictis æquos esse

arbitros æstimandos qui illum nondum sint edocti. Si de ipsa Philosophiâ tuâ dubitetur, neque ei statim assensus præbeatur; ad Geometriam statim tanquam Asylum confugis (quò vel nullos fortè vel quam paucissimos repertum iri sperabas, qui te prosequi valeant,) id nempe in causa esse cur de illis minus satisfactum sit, affirmas, quod tu non omnia omnibus, sed aliqua Geometris solis te scripsisse profitearis; & quidem qui philosophiam naturalem quærunt, nisi à Geometria principium quærendi sumant, frustra (inquis) quærunt, & qui de ea scribunt differuntve, Geometriæ ignari, lectoribus auditoribusq; suis abutuntur. Nos igitur ad Asylum illud tuum & penitus Adytum te secuti nihil illic esse vidimus cur tu illa tuta putes, nisi quod putaveris inaccessible. Cum autem ea quibus maximè confidebas refugia penitus dejecta videas; cogita tu tecum seriò, annon & in prædictis illis gravioris momenti rebus lapsus sit nihilo minùs facilis, utut tu fortasse te lapsum fuisse difficiliùs agnoscas. Adeoque de tuis illic cogitatis nollem te nimis securum esse, cum te videris in rebus illis, ubi minus erat labendi periculù, tam turpiter impegisse. Atq; hoc quidem eò potiùs faciendum judico, quoniam, ut, in Theologicis, quam Mathematicis, majus est labendi periculum, ita longe gravior lapsu ruina. Nempe, in erroribus alteris, de famâ tantum periclitamur; in alteris de salute. Dum enim opinione tuæ præ aliis peritiæ elatus (heu nimium!) videaris, ut propterea divina pariter atque humana contempseris; vides te interim ibidem unde tu tibi maximas sperabas laudes ita turpiter lapsum esse, ut te simul omnibus contemptui præbeas atque ludibrio: quasi id tibi jam contigerit, quod Romanis olim, qui *φάσκοντες τῇ σοφίᾳ ἐμαρτυροῦναι*: quod quidem obtigisse testatur Paulus *διότι γινώσκεις & θεόν, & χεὶς θεόν ἐδόξασα*. Tibique forsan (modò Deus ita voluerit) hoc ipsum obtigisse possit, ut majore deinceps sentire discas, de tuis, modestiâ; de divinis; humilitate. Quò quidem si hæc errorum tuorum (utut in re levicula, præ illis aliis,) qualiscunque detectio reapse conducat, teque deinceps videro ad bonam frugem redeuntem, ego libentiùs te redeuntem amplexabor quam errantem fuerim prosecutus; (neque enim ego tibi alio nomine inimicus sum, quam quòd tu tibi.) Atque id quidem faxit (animitùs precor) Deus ille Optimus Maximus, cujus est lapsorum misereri, lapsis succurrere, palantes reducere, reductos stabilire.

FINIS. Aug. 27. 1655.



Wallis, John,

Elenchus Geometriae Hobbianaë Sive, Geometricorum, quae in ipsius
Elementis Philosophia, à Thoma Hobbes Malmesburiensi proferuntur,
Refutatio

Oxoniae 1655

Math.p. 631

urn:nbn:de:bvb:12-bsb10083066-7